


O LE EKALESIA A IESU KERISO O LE AU PAIA O ASO E GATA AI • SETEMA 2012

O Le Liahona



**Tofia e Auauna
Atu: O Le Taimi
Lenei, i. 20**

**Malamalamaaga i le
Tusi a Mamona mo
Taimi Faigata, i. 30**

**O Lē Fea Luko O Le
A E Fafagaina? i. 52**

**Gaoioiga Faaleaiga:
Sauniuniga e oo atu
i le Konafesi, i. 63**



© ELSPETH YOUNG, ELE MAFAI ONA KOPINA

Ua Galue i Ona Lima ma le Fiafia, saunia e Elspeth Young

O Litia o se faatau ie paauli o le nuu o Tuatira. Faapei o le fafine amio lelei o loo faamatalaina i le Faataoto, sa galue Litia i “ona lima ma le fiafia” (Faataoto 31:13). Sa i ai o ia faatasi ma i latou o e sa faalogologo i le Aposetolo o Paulo ma “ua tatalaina e le Alii lona loto ia naunau i upu na tautala a’i Paulo” (Galuega 16:14). Ina ua uma ona papatisoina o ia ma lona aiga, sa ia valaaulia Paulo e sau i lona fale ma aoao atili i latou (tagai i le Galuega 16:15).



Liahona, Setema 2012

12

O SAVALI

4 Savali a le Au Peresitene Sili: Faasoaina atu o le Talalelei mai le Loto i le Loto

Saunia e Peresitene
Henry B. Eyring

7 Savali a Faiaoga Asiasi: O I Latou o I Ai Manaoga Faapitoa ma le Auaunaga o loo Tuuina Atu

TALA FAAALIA

12 Atiina Ae o le Faatuatua ia Keriso

Saunia e Elder
D. Todd Christofferson

*E mafai ona tele atu se uiga o lo
tatou faatuatua nai lo le na o se
mataupu faavae o le faatinoga.*

I LE FAAVAA

Luma: Ata na pueina e Robert Casey.
Tua: Atapue mai faaloaloga a Grant
ma Terri Whitesides.

16 Faasoaina atu o le Talalelei e ala i le Faasoaina atu o Oe Lava

Saunia e Stephanie J. Burns
ma Darcie Jensen

*Pe a liua patino i tatou, o
le a mafai ona tatou faasoaa
atu le talalelei e ala i le
auala o tatou ola ai.*

20 Faifeau Faamisiona Matutua: O Le Tali Atu i le Valaau a le Perofeta

Saunia e Kendra Crandall
Williamson

*O le foiaina o faafitauali o
le galuega faafai featalai e
manaomia ai le faatuatua
ae aumai ai ni taui maoae.*

30 O Le Auala e Ola ai Soo o Keriso i Taimi o Taua ma Fetauaiga

Saunia e David Brent Marsh

35 O Le A Oo mai le Seleselega

Saunia e Michael R. Morris
*A tatou usiusitai, o le a mautinoa
le oo mai o faamanuiaga a le Atua.*

MATAGALUEGA

8 Tusigāmanatu Konafesi Aperila

9 Mo Le Malosi o le Autalavou: Faaaogaina ma le Atamai o le Faitalia

10 Tatou te Talanoa ia Keriso: Alofa i O'u Fili

Taofia le igoa

26 O Tatou Aiga, O Tatou Auaigna: O Faamanuiaga o le Taulai Atu i le Malumalu

Saunia e Joshua J. Perkey

38 O Leo o le Au Paia o Aso e Gata Ai


74 Tala Fou o le Ekalesia

79 Manatu mo Afiafi Faaleaiga

80 Seia Tatou Toe Feiloai: O Le a Lo'u Tau?

Saunia e Adam C. Olson

AUTALAVOU MATUTUA



42

- 42 Sa Latou Saunoa Mai ia i Matou: O Outou o le Malamalama o le Lalolagi**
Saunia e Adrián Ochoa



48

Vaai pe mafai
ona e mauaina le
Liahona o loo natia
i le lomiga lenei.
Faaiteite: O le
auai atu i le
"Peraimeri."

AUTALAVOU

- 46 Tuusao i le Mataupu**
48 Tausia o Lou Olaga ia Paleni
Saunia e Elder M. Russell Ballard
*O le a fesoasoani ia mataupu
faavae nei e valu e faapalenii na
oe i se lalolagi le paleni.*
- 51 Pepa Lautele o I Ai se Savali:**
Faaaoga ma le Atamai le Taimi
- 52 Mo Le Malosi o le Autalavou:**
Faitalia ma le Tali Atu
mo Oe Lava la
Saunia e Elder Shayne M. Bowen
- 54 Faamanuiaina e ala
i Faataitaiga**
Saunia e Elder O. Vincent Haleck
*O le avea ma se faataitaiga lelei
e mafai ona oo atu ona aafiga
i le lumana'i.*

- 57 O Le Vaegaau e
Sili ona Malosi**
Saunia e H. Daniel Wolke Canales
*Sa ou iloa ou te fia auauna
atu, peitai e tatau ea ona ou
auauna atu i le vaegaau
a lou atunu po o le
vaegaau a le Atua?*
- 58 O La Tatou
Avanoa**

TAMAITI



64

- 59 Aoao e Faitautusi**
Saunia e Elder Larry R. Lawrence
*O le aoao e faitau na fesoasoani
ou te maua ai le talalelei.*
- 60 Uo Faifeautalai**
Saunia e Jane McBride Choate
*Pe mafai ona tutusa le faigofie
o le faasoaina atu o le talalelei
ma le valaaulia o se uo i
le Peraimeri?*
- 62 O La Tatou Itulau**
- 63 Sauniuniga e oo atu
i le Konafesi Aoao**
*Faaaoga le gaoioiga lenei
e saunia ai mo le konafesi.*
- 64 Aumaia o le Peraimeri i le
Fale: E Aoao A'u e Tulafono
e Sefulu ina ia Alofa i le
Atua ma Ana Fanau**
- 66 Talofa! O a'u o
Timofei mai Kyiv, lukureini**
Saunia e Chad E. Phares
*Sa valaaulia e Timofei ni uo
se toatolu ina ua tatala le
malumalu mo maimoaga.*
- 68 Tala ia lesu: Sa Asiasi lesu
i Tagata Sa Nifae**
Saunia e Diane L. Mangum
- 70 Mo Tamaiti Laiti**
- 81 Faatusa o Tagata o loo i
Mau o le Tusi a Mamona**

O Le Lomiga Faamaonia Faa-Samoa a le Eklesia a Iesu Keriso o le Au Paia o Aso e Gata A

Susuga a le Au Peresitene Sili: Thomas S. Monson, Henry B. Eyring, Dieter F. Uchtdorf

O Le Korama a Apostolo e Toasefululuua:

Boyd K. Packer, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, Neil L. Andersen

Faatonu: Paul B. Pieper

Fautua: Shayne M. Bowen, Craig A. Cardon, Bradley D. Foster, Christoffel Golden Jr., Anthony D. Perkins

Pule Faatonusili: David T. Warner

Faatonusili e Fuafuaina ma Faatonutonu:

Vincent A. Vaughn

Faatonu o Karafi: Allan R. Loyborg

Pule Faatonutonu: R. Val Johnson

Pule Faatonutonu Lagolago: Jenifer L. Greenwood, Adam C. Olson

Au Faatonu Fesoasoani: Susan Barrett, Ryan Carr

Aufaigaluega Faatonutonu: Brittany Beattie, David A. Edwards, Matthew D. Flitton, LaRene Porter Gaunt, Carrie Kasten, Lia McClanahan, Melissa Merrill, Michael R. Morris, Sally J. Odekirik, Joshua J. Perkey, Chad E. Phares, Jan Pinborough, Paul VanDenBerghe, Marissa A. Widdison, Melissa Zenteno

Pule Faatonusili o Faatufugaga: J. Scott Knudsen

Faatonusili Tusiata: Scott Van Kampen

Pule i le Gaosiga: Jane Ann Peters

Au Mamana Sinia: C. Kimball Bott, Colleen Hinckley, Eric P. Johnsen, Scott M. Mooy

Aufaigaluega e Mamanuina ma Gaosia: Collette Nebeker Aune, Connie Bowthorpe Bridge, Howard G. Brown, Julie Burdett, Bryan W. Gygi, Kathleen Howard, Denise Kirby, Ginny J. Nilson, Gayle Tate Rafferty

Tailolomi: Jeff L. Martin

Faatonusili Lolomiga: Craig K. Sedgwick

Faatonusili o le Tufatufaga: Evan Larsen

Mo le okaina o mekasini, alu i le store.lds.org po o le Faletutuonu i Pesega. Telefoni 64127. Totogi o le Mekasini: \$0.55 (Samoa) ī le kopī. Totogi mo le Tausaga Atoa \$6.60 (Samoa).

Auina atu tusitusiga ma faafesili i luga o le initoneti i le liahona.lds.org: pe meli mai i le *Liahona*, Rm. 2420, 50 E. North Temple, Salt Lake City, UT 84150-0024, USA; po o le i-meli: liahona@ldschurch.org.

O Le *Liahona* (o lona uiga i le Tusi a Mamona o le "tapasa" po o se "faatonuala") e lomia i le faa-Alepania, Aminia (Sasae), Pisilama, Palekeria, Kemupotia, Sepuanu, Saina, Kalaotia, Siekislovakia, Tenimaka, Take, Igilisi, Eritonia, Fiti, Finelani, Farani, Siamani, Eleni, Hanikeri, Initu, Iselani, Initonesia, Italia, Iapani, Kiripati, Korea, Latvia, Lituna, Malakasa, Masela, Monokolia, Nouei, Polani, Potukale, Romania, Rusia, Samoa, Saina (ua faafagofieina), Slovenia, Sipaniolo, Suetena, Tagaloka, Tahiti, Tai, Toga, Lukureini, ma Urutu, ma Viatename. (E eseese lava gagana.)

© 2012 Puletaofia e le Intellectual Reserve, Inc. Ua taofia aia tatau uma. Lomia i le lunate Setete o Amerika.

E mafai ona kopī tala ma ata o le *Liahona* mo le toe faaaogaina i lotu po o le aiga ae ia le faia ai ni pisinisi. E le tatau ona kopī ni tala po o ni atā po afai o faasa mai i le laina o loo ta'ua ai le e ona lea faatufugaga. Auina atu fesili e uiga i le puletaofia e le Intellectual Property Office, 50 East North Temple Street, Salt Lake City, UT 84150, USA; i-meli: cor-intellectualproperty@ldschurch.org.

For Readers in the United States and Canada:

September 2012 Vol. 36 No. 9. O LE LIAHONA (USPS 311) Samoan (ISSN 1045-0947) is published monthly by The Church of Jesus Christ of Latter-day Saints, 50 East North Temple, Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address must be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Poste Information: Publication Agreement #40017431)

POSTMASTER: Send address changes to Salt Lake Distribution Center, Church Magazines, PO Box 26368, Salt Lake City, UT 84126-0368.

Initoneti

[Liahona.lds.org](http://liahona.lds.org)

MO TAGATA MATUTUA

Faitau i tala musuia e uiga i faifeau faamisiona matutua o loo foiaina ni faafitaui ina ia auauna atu (tagai i le itulau e 20). Tagai i ata ma molimau o nisi faifeau faamisiona matutua i nofoaga eseese i le liahona.lds.org.



MO LE AUTALAVOU

O le itulau e 52, o le a e maua ai le tusiga muamua mai le tele o tusiga e uiga i tulaga faatonuina o i le tamaitusu fou *Mo Le Malosi o le Autalavou*. Saili ia anotusi faaopoopo e faatatau i tulaga faatonuina uma i le youth.lds.org.

MO TAMAITI

Faataitai le gaoioiga o le "Sauniuniga e oo atu i le Konafesi Aoao" o i le itulau e 63 ma saili nisi gaoioiga o le konafesi i le lds.org/general-conference/children.

I LAU GAGANA

O loo maua le *Liahona* ma isi tusi a le Eklesia i le tele o gagana i le languages.lds.org.

AUTU I LENEI LOMIGA

E ta'u mai e numera le itulau muamua o le tusiga.

Aiga, 26, 40, 66

Alofa, 10

Auauna atu, 7, 20, 44

Faalagolago o le tagata ia te ia lava, 35

Faamagaloga, 10

Faamanuiaaga, 35

Faataitaiga, 42, 54

Faatuatua, 12, 20

Faioga asiasi, 4

Faigata, 30

Faitalia, 9, 51, 52

Feagaiga, 12

Filemu, 38

Galue, 35

Galuega faafaifeautalai,

4, 12, 16, 20, 39, 40, 41, 42, 46, 57, 60

Galuega faalemalumalu, 26

Iesu Keriso, 68

Iloa tusitusi ma faitau-tusi, 59

Konafesi aoao, 8, 41, 63

Liua, 26, 54, 59

Maliu, 26, 30, 38

Molimau, 47

Ofusa o le Malumalu, 47

Paleni, 48, 51

Peraimeri, 70

Poloaiga, 64

Salamo, 30

Tatalo, 48, 58

Taua o le tagata lava ia, 80

Toetu, 68


Tulaga faatonuina, 40

Tusi a Mamona, 30, 68, 81

Usiusitai, 30, 35, 64

**Saunia e Peresitene
Henry B. Eyring**

Fesoasoani Muamua i le
Au Peresitene Sili



Faasoaina Atu o le Talalelei MAI LE LOTO I LE LOTO

Ole a tuu e le Atua ia tagata ua saunia e talia le talalelei i le ala o Ana auauna ua saunia e faaso atu le talalelei. Sa tupu lena mea i lou lava olaga. O le faatele ona tupu e fuafua lea i sauniuniga o lou mafaufau ma lou loto.

E i ai sa'u uo e tatalo i aso uma ina ia feiloai i se tagata ua saunia e talia le talalelei. Na te tauaveina se kopi o le Tusi a Mamona. O le po a o lei alu i se malaga puupuu, sa ia filifili ai e na te le aveina se kopi ae nai lo lena sa ia aveina se kata fepasai. Peitai a o ia sauni e malaga ese atu, sa oo mai ia te ia se musumusuga faaleagaga. "Alu ma ave se Tusi a Mamona." Sa ia tuuina se tusi se tasi i lana ato.

Ina ua saofai se tamaitai la te masani i ona autafa i le taimi o le faigamalaga, sa ia mafaufau, "O le tagata ea lea?" Sa la toe o faatasi foi ina ua la toe foi. Sa ia mafaufau, "E faapefea ona ou amataina se ma talanoaga e uiga i le talalelei?"

Ae, sa ia fai mai ia te ia, "E totogi a outou sefuluai i la outou ekalesia, a ea?" Sa ia fai atu ioe. Sa ia fai mai sa tatou ona ia totogi le sefuluai i lana lotu, peitai e na te lei faia. Ona ia fesili mai lea, "O le a se mea e mafai ona e tau mai ia te au e uiga i le Tusi a Mamona?"

Sa ia faamatala atu o le tusi o se tusi paia, o se isi molimau ia Iesu Keriso, na faaliliuina e le Perofeta o Iosefa Samita. Sa foliga mai sa ia fia iloa, o lea sa ia aapa ai i totonu o lana ato ma fai atu, "Sa musuia lava au ou te aumaia le tusi lenei. Ou te manatu e mo oe."

Sa amata ona ia faitauina. Ina ua la faamavae, sa ia fai mai, "O le a tele nisi a ta talanoaga e uiga i lenei mea."

O le mea e lei mafai ona iloa e la'u uo—ae o le mea *sa silafia* e le Atua—o lea sa saili e le tamaitai lea se ekalesia. Sa silafia e le Atua sa matauina e lenei tamaitai la'u uo ma mafaufau pe aisea na matuai fiafia ai o ia i lana lotu. Sa silafia e le Atua o le a ia fesili e uiga i le Tusi a Mamona ma o le a malie o ia e aoaoina e faifeautalai. Sa saunia o ia. Faapea foi la'u uo. E mafai foi e oe ma a'u ona saunia.

O le sauniuniga tatou te manaomia o loo o i ai i totonu o o tatou mafaufau ma o tatou loto. Sa faalogo le tamaitai ma manatuina ni upu e faatatau i le Tusi a Mamona, le Ekalesia toefuataiina a le Alii, ma le poloaiga e totogi le sefuluai i le Atua. Ma sa ia lagonaina le amataga o le molimau mai o le upumoni i totonu o lona loto.

Sa fetalai mai le Alii o le a Ia faaalia mai le upu moni i o tatou mafaufau ma o tatou loto e ala i le Agaga Paia (tagai i le MF&F 8:2). O le toatele o tagata o le a e feiloai i ai sa i ai i le amataga o lena sauniuniga. Sa latou faalogo pe na faitau foi e uiga i le Atua ma Lana afioga. Afai e lava le faamahuluina o o latou loto, ua latou lagonaina se faamau-tinoaga o le upumoni, e tusa lava pe itiiti.

Sa saunia le tamaitai. Faapea foi la'u uo, o le tagata o le Au Paia o Aso e Gata Ai lea sa suesue i le Tusi a Mamona. Sa ia lagonaina se molimau e moni, ma sa ia iloaina le taitaiga mai le Agaga e alu ma ave se kopi. Sa



saunia o ia i lona mafaufau ma lona loto.

O loo saunia e le Atua ia tagata e talia lau molimau e uiga i le upumoni toefuataiina. E manaomia e Ia lou faatuatua ona sosoo ai lea ma lau faatinoga e faasoaa atu ma le le fefe ia i latou o e e te alofa i ai mea ua matuai taua lava ia te oe.

Sauni e faasoaa atu e ala i le faatumuina o lou mafaufau i aso uma i upumoni o le talalelei. A o e tausia ia poloaiga ma faamamaluina au feagaiga, o le a e lagona le molimau mai o le Agaga ma le alofa atili mai o le Faaola ia te oe faapea ma i latou e te feiloai i ai.

Afai e te faia lau vaega, o le a faateleina ona e maua le aafiaga fiafia o le feiloiat atu i tagata o e ua saunia e faalogo i lau molimau o le upumoni—e ofoina atu mai lou loto i o latou loto. ■

AOAO ATU MAI LENEI SAVALI

Mafaufau e faitau faatasi ma le aiga le savali ma talanoa i le parakalafa e sosoo ma le parakalafa mulimuli, lea e talanoaina ai e Peresitene Eyring ia auala e faamalosia ai se molimau a se tasi. Talatalanoa ma le aiga e uiga i le taua o le tuuina atu o se molimau pe a fefaasoaa e uiga i le talalelei. Atonu o le a iloa ai e tamaiti o le aiga le aoga pe a fai se faatinoga o le auala e tuuina atu ai se molimau i uo.

AUTALAVOU

Iloaina o le Mea e Ta'u Atu

Afai e te lagona e le o lava lou iloa e uiga i le talalelei e faasoa atu ai i isi, ia e maua le toafilemu i folafolaga nei mai tusitusiga paia:

"la sii a'e o oulua leo i lenei nuu; tautala atu mafaufauga o le a Ou tuu i o oulua loto, ma o le a le faafememeaiina oulua i luma o tagata;

"Aua o le a tuu atu ia te oulua i le itula tonu lava, ioe, i le minute tonu lava, mea e te lua fai atu ai" (MF&F 100:5-6).

"A o le Fesoasoani, o le Agaga Paia lea, e auina mai e le Tama i lo'u igoa, o ia lava na te aoao ia te outou i mea uma lava; e faamanatu mai foi o ia ia te outou i mea uma ua ou fai atu ai ia te outou" (Ioane 14:26).

O ni folafolaga maoae nei, ae ina ia mauaina, e tatau ona faia le tatou vaega. O lenei savali, ua aoaoina ai i tatou e Peresitene Eyring i le auala: "Sauni e faasoa atu [le talalelei] e ala i le faatumuina o lou mafaufau i aso uma i upumoni o le talalelei." O le a se mea e mafai ona e fai e faatumu ai lou mafaufau i upumoni o le talalelei?



TAMAITI

Sauni e Faasoa Atu

Saunoa mai Peresitene Eyring faapea o se auala taua e saunia ai e faasoa atu le talalelei o le faatumu lea o o tatou mafaufau i upumoni o le talalelei, e pei o loo faia e tamaiti nei.

Vaai i ata o i le laina i lalo ma sue se mea e ese ai mai le ata o i luga ae.



O a nisi o mea e mafai ona e faia e saunia ai e faasoa atu?

Suesue ma le agaga tatalo i mea nei, ma pe a talafeagai ai, ia talanoaina faatasi ma uso e te asia. Faaaoga fesili e fesoasoani ai ia te oe e faamalolosia ai ou uso ma avea ai le Aualofa ma se vaega ola o lou lava olaga.

O I Latou o I Ai Manaoga Faapitoa ma le Auaunaga o loo Tuuina Atu

Ei ai lava manaoga o isi,” na saunoa ai Peresitene Thomas S. Monson, “ma e mafai e i tatou uma taitoatasi ona faia se mea e fesoasoani ai i se tasi. . . . vagana ua tatou faamaumau o tatou ola ona o isi, o le a ititi se faamoemoega o o tatou lava olaga.”¹

I le avea ai ma ni faiaoga asiiasi ua mafai ai ona tatou iloa ma alolofa ma le faamaoni i uso taitasi o loo tatou asia. O le a tafe fua atu lava auaunaga ia i latou tatou te asia ona tatou te alolofa i ai (tagai i le Ioane 13:34–35).

E mafai faapefea ona tatou iloa ia manaoga faaleagaga ma le faaletino o o tatou uso ina ia mafai ai ona tatou tuuina atu le auaunaga pe a manaomia? I le avea ai ma ni faiaoga asiiasi, ua tatou maua ai le aia tatau o le mauaina o se musumusuga pe a tatou tatalo mo i latou tatou te asia.

O le faatumauina o le fesootaiga faifai pea ma o tatou uso e taua foi. O asiasiga patino, valaau atu i le telefoni, o se tusi faamalosiau, i-meli, saofai faatasi ma ia, se upu faalaeiau faamaoni, aapa atu ia te ia i le lotu, fesoasoani atu ia te ia pe a ma’i po o se mea e manaomia, ma isi galuega tau auaunaga e fesoasoani uma lava ia i tatou e tausia ma fefaamalosiau ai i le tasi ma le isi.²

Ua talosagaina faiaoga asiiasi e lipoti atu le soifua manuia o uso, soo se manaoga faapitoa ma le auaunaga o loo tuuina atu ia i latou. E fesoasoani ia ituaiga lipoti ma a tatou auaunaga i o tatou uso e faaalia ai lo tatou tulaga o le avea ai ma soo.³



Mai Tusitusiga Paia

Ioane 10:14–16; 3 Nifae 17:7, 9;
Moronae 6:3–4

FAAMATALAGA

- Thomas S. Monson, “O Le A Se Mea Ua Ou Faia mo Se Tasi i le Aso?” *Liahona*, Nov. 2009, 85.
- Tagai i le *Tusitalima 2: Taitaiina o le Ekalesia* (2010), 9.5.1.
- Tagai i le *Tusitalima 2*, 9.5.4.
- Mary Ellen Smoot, i le *O Afafine i Lo'u Malo: O Le Talafaasolopito ma le Galuega a le Aualofa* (2011), 126.
- Aooga a Peresitene o le Ekalesia: Spencer W. Kimball* (2006), 82.

O Le a se Mea e Mafai ona Ou Faia?

- Pe o ou sailia ea ia musumusuga faaletagata lava ia ina ia iloa ai le auala e tali atu ai i manaoga faaleagaga ma faaletino o uso taitasi ua tofia i ai a’u ou te vaia?
- E faapefea ona iloa e tamaitai ou te vaia ou te amanaia i latou ma o latou aiga?

Faatuatua, Aiga,
Toomaga



Mai lo Tatou Talafaasolopito

O le auauna atu i isi ua avea lava pea ma faamoemoega tutotonu o faiaoga asiiasi. O le faatinoina o auaunaga faifai pea o le a tatou aumaia ai le agalelei ma le faauoga lea e sili atu nai lo asiasiga faalemasina. E taulia lo tatou amanaiaina o i latou.

“O lo’u faanaunauga o le talosagaina lea o o tatou uso ina ia soia le popole e valaau i se telefoni po o se asiasiga faalekuata pe faalemasina,” o le tala lea a Mary Ellen Smoot, o le peresitene aoao lona 13 o le Aualofa. Sa talosaga mai ia i tatou ina “ia taulai atu i le faa-faileleina o agaga mu’amu’a.”⁴

Sa aoao mai Peresitene Spencer W. Kimball (1895–1985) faapea, “E taua tele lo tatou auauna atu o le tasi i le isi i le malo.” Peitai sa ia silafaina e le o auaunaga uma e tatau ona avea ma se tulaga lototoa. “E tele naua taimi, o a tatou aga o le auauna atu e aofia ai ni nai faamalosiauga faigofie po o le tuuina atu . . . fesoasoani i ni galuega masani,” sa ia saunoa mai ai, “ae maeu le matagofie o tau-nuuga e mafai ona tafe mai . . . nai galuega faatauvaa!”⁵

Tusigāmanatu Konafesi Aperila

"O le mea ua fai atu ai A'u o le Alii ua Ou fai atu ai; . . . pe i lo'u lava leo po o i le leo o a'u auauna, ua tutusa lava" (MF&F 1:38).

A o e iloiloina le konafesi aoao ia Aperila 2012, e mafai ona e faaaogaina lenei itulau (ma Tusigāmanatu o le Konafesi i lomiga i le lumana) e fesoasoani ai ia te oe e suesue ma faaaoga aoaoga talu ai nei a perofeta soifua ma aposetolo ma isi taitai o le Ekalesia.

O TALA MAI LE KONAFESI

O Lo'u Valaauga Muamua i le Ekalesia

Sa matou auai ma lo'u aiga i le paranesi a le Ekalesia i Frankfurt, Siamani. Sa faamanuaina i matou i le toatele o tagata lelei sa auai i la matou tamai paranesi. O se tasi o i latou o lo matou peresitene o le paranesi o, Uso Landschulz. . . .

I se tasi Aso Sa, sa fesili mai ai Peresitene Landschulz pe mafai ona ma talanoa. . . .

Sa [ia] valaaulia au i totonu o se tamai potuaoga—e leai se ofisa o le peresitene o le paranesi i lo matou falesa—ma o iina sa ia tuuina mai ai ia te au se valaauga ina ia ou galue o se peresitene o le korama a tiakono.

"O se tofiga taua lenei," sa ia fai mai ai, ona ia faifaimalie lea ma faamalamalama mai le mafuaaga e taua ai. Sa ia faamalamalama mai le mea o loo la faamoemoe mai ai ma le Alii ia te au ma le auala e mafai ai ona ou maua le fesoasoani.

Ou te le manatua le tele o mea sa ia fai mai ai, ae ou te manatuaina o'u lagona. Sa faatumulia lo'u loto e se Agaga e paia ma faalelagi a o ia saunoa mai. Sa ou lagonaina o le Ekalesia lenei a le Faaola. Ma sa ou lagonaina o le valaauga lea sa ia tuuina mai sa musuia e le Agaga Paia. Ou te manatuaina lo'u savali mai i fafo o lena tamai potua'oga ma le lagona ua fai si ou umī atu nai lo le taimi muamua. . . .

. . . sa ou lagona le faamamaluina, ma sa ou manao e auauna atu i le mea e gata mai ai lou tomai ma aua nei faatoilaloia lo'u peresitene o le paranesi po o le Alii.

Punaoa faaopoopo i lenei autu:
O Le Taiala i Tusitusiga Paia, "Valaaau, Valaaufina e le Atua, Valaauga," scriptures.lds.org; Henry B. Eyring, "Tulai i Lou Valaauga," *Liahona*, Nov. 2002, 75–78.

Ua ou iloa nei sa mafai lava ona tau ina tuu mai e le peresitene o le paranesi le valaauga e aunoa ma se mafaufau tele i ai ina ua ia valaaufina au i lenei tofiga. Sa mafai lava ona tau ina ta'u mai ia te au i le alasavali po o le taimi o se sauniga perisitua, o au o le peresitene fou o le korama a tiakono.

Ae, sa ia faaluina le taimi faatasi ma au ma fesoasoani mai ia te au ia ou malamalamalama e le gata i le o le a o lo'u tofiga ae, o le mea e sili ona taua, o le aisea. . . .

. . . O se faataitaiga lea ia te au o le mana musuia o le taitaiga faaleperisitua lea e fagua ai le agaga ma musuia ai ia faatinoga.

Peresitene Dieter F. Uchtdorf, Fesoasoani Lua i le Au Peresitene Sili, "O Le Aisea o le Auaunaga Faaleperisitua," *Liahona*, Me 2012, 58.

O Fesili e Manatunatu Loloto i ai:

- E faapefea e le taliaina o valaauga o le Ekalesia ona faamalosia oe ma i latou o loo e auauna atu i ai i?
- O le a se mea e mafai ona e faia e saunia ai oe lava i le taliaina o se valaauga o le Ekalesia, e tusa lava pe o e pis?

Mafaufau e tusi ou mafaufuga i lau api talaaga pe talanoaina foi ma isi.



Ina ia faitau, matamata, pe faalogologo foi i lauga o le konafesi aoao, asiiasi ane i le conference.lds.org.

FAAAAOGAINA MA LE ATAMAI O LE FAITALIA

O se tasi o upumoni sili ona taua e mafai ona tatou aoaoina i lo tatou talavou e faapea o le saolotoga moni ma le fiafia tumau e oo mai i le faaaogaina o lo tatou faitalia e tausia ai poloaiga a le Atua.¹ O itulau e 52–53 o lenei lomiga, o loo faamamafa atu ai e Elder Shayne M. Bowen o le Fitugafulu lenei mataupu faavae.

“Ua ia te outou le gafatia e maua ai mea uma o i ai i le Tama. O le filifiliga e a oe lea,” sa ia tau atu i le autalavou.

I se lalolagi ua faatumulua i le amioleaga ma le lamatia, ua i ai i matua se matafaioi taua i le sauniaina o a latou fanau ina ia faia filifiliga sao ma ia manumalo mai i faaososoga. O le mea moni, ua poloaiina e le Alii ia matua “ia tausi ae a [latou] fanau i le malamalamala ma le upumoni” (MF&F 93:40).

Ua saunia e le Ekalesia ia punaoa mo matua ina ia fesoasoani ai i a latou fanau e aoao ma ola ai i lenei tulaga faatonuina. Atonu o le a aoga ia fautuaga nei.

Fautuaga mo le Aoaoina o le Autalavou

- Faitau faatasi ma lau fanau talavou le vaega o le faitalia ma le tali atu mo oe lava ia i le *Mo Le Malosi o le Autalavou*. O le faia o lena mea o le a e maua ai se avanoa e talanoaina ai ia tulaga faatonuina ma tali ai soo se fesili o i ai i lou atalii po o lou afafine.
- Faitau i le tusiga a Elder Bowen i itulau e 52–53 i le lomiga lenei. Mafaufau e faaaoga le tala e uiga i le fafagaina o le luko sa’o e fesoasoani ai i lau fanau talavou ia malamalamala i le taua o le faia o faaiuga lelei.
- Alu i le youth.lds.org, kiliki i le “Mo Le Malosi o le Autalavou” i lalo o le “Youth

Menu,” ona kiliki lea i le “Faitalia ma le Tali Atu mo Oe Lava Ia.” O le a e maua ai iina ni mau faasino, vitio, fesili ma tali, ma ni tusiga.

- Mafaufau e fai se afiafi faaleaiga po o se faigalotu faaleaiga i le taua o le lototele ma le tu atu mo mea tatou te talitonu i ai.²

Fautuaga mo le Aoaoina o Tamaiti

- O Le Aumaia o le Peraimeri i le Fale i lenei masina o loo faatatau lea i le filifiliga e tausia ia poloaiga (tagai i itulau 64–65 i le lomiga lenei). Faitau faatasi ma le aiga le tala ma fai atu i lau tama e faamaumau le aofaiga o faaiuga na faia i totonu o le tala. Faamalamalama atu e faatagaina i tatou e le Tama Faalelagi e faia ni faaiuga ina ia mafai ai ona tatou aoao ma tuputupu ae. Faasoatutu nisi o mea sa e aoaoina mai i le faia o ni faaiuga.
- Faamaea le Gaoioiga a le FMT i totonu o le Aumaia o le Peraimeri i le Fale. Ona talanoa lea e uiga i taunuuga o le faia o ni filifiliga lelei. Faasoatutu nisi o mea sa e aoaoina mai i le faia o ni faaiuga amiotonu.
- Mo nisi manatu faaopoopo e faatatau i le aoaoina atu o le faitalia ma le tali atu mo oe lava, tagai i le vaega o le *2012 Otootoga mo le Taimi o Fetufaaiga* o Ianuari (i luga o le initonet i le lds.org/service/serving-in-the-church/primary/sharing-time-2012). ■

FAAMATALAGA

- Tagai i le *Mo Le Malosi o le Autalavou*, (tamaitusi, 2011), 3.
- Tagai ia Peresitene Thomas S. Monson, “Ia Lototele e Tu Na o Oe,” *Liahona*, Nov. 2011, 62.



MAU E FAATATAU I LE FAITALIA

- Teuteronomie 11:26–28;
30:15–20
Iosua 24:14–15
2 Nifae 2
Helamana 14:30–31
Moronae 7:15–19
Mataupu Faavae ma Fea-
gaiga 58:26–28; 101:78
Mose 4:3–4



O SE FAAMALOLOGA I TOTONU [O LE LOTO]

"O le toatele o i tatou e le'i ausia lena tulaga [faaKeriso] agalelei ma le alofa ma le faamagalo atu. E le faigofie. E manaomia ai le loto pulea e toetoe lava sili atu nai lo mea tatou te gafataulima-inia. A e a o tatou taumafai, tatou te iloa o loo i ai se punaoa o le malologa, ma o loo i ai se mana malosi o le faamalologa ia Keriso, ma afai e fia avea i tatou ma Ana auauna moni, e le gata ina tatau ona tatou faaaoga lena mana faamalolo mo isi, ae atonu, e sili atu ona taua pe a tatou faaaogaina ia i tatou lava."

Peresitene Gordon B. Hinckley (1910–2008), "O Le Mana Faamalolo o Keriso," Liahona, Ian. 1989, 62.

Alofa i O'u Fili

Taofia le igoa

Sa ou iloa le poloaiga a le Alii ina ia alofa atu i isi, e aofia ai o tatou fili, peitai a o vaai atu i le fitafita, ou te lei alofa ia te ia.

Sa ou ola ae i se atunuu e pulea e vaegaau a isi malo. E le'i lelei le tausiga o ou tagata e fitafita sa nofoia [lo matou atunuu]. O le toatele o tagata i lo matou taulaga sa ave faapagota, sauaina, tafanaina, po o le fasiotia foi e fitafita e aunoa ma se mafuaaga. I se tasi aso ina ua 16 ou tausaga, sa o mai ai fitafita i lo matou iunivesite ma fana le ulu o se tasi o tamaitiiti aoga. E lua itula e le'i faatagaina ai e nei fitafita e ave o ia i le falemai. Sa amatalia i lena aso se ita i lou loto mo na fitafita. Sa le mafai ona ou faamagaloina i latou mo le tiga sa latou faatupuina i ou tagata ma e le mafai ona ou faagaloina ia foliga o lena tamaitiiti aoga.

Ina ua ou auai i le Ekalesia i le 25 o ou tausaga, sa faigata ona ou alu i le lotu ona o nofoaga sa suesueina ai i matou, o tapu, ma isi mea sa faasa ai le feoai lea na tuuina mai ia i matou. Sa lamatia lou ola i lou solaese mai faanana ina ia mafai ona ou tagofia le faamanatuga ma matou faatasi ma le Au Paia o Aso e Gata Ai. Sa faigata le avea ai na o au o se tagata o le Ekalesia i lo'u aiga ma lo'u nuu. Sa ou fia faatasi ma tagata o le Ekalesia, ae peitai e toeitiiti lava o vaiaso uma e toe faafoi ai au e fitafita.

I se tasi Sapati a o ou taumafai e laasia le nofoaga e siaki ai i matou, sa fai mai ai se fitafita ia te au e le o faatagaina au e alu i fafo ma sa faatonuina au e alu i le fale. Sa ou tilotilo atu i le fitafita ma manatua le fetalaiga a le Faaola: "Alolofa atu i e ua ita mai ia te outou" (tagai i le Mataio 5:43–44).

Sa ou iloaina ai i lena taimi ou te le *alofa i* lena fitafita. O le inoino sa ou lagonaina a o ou talavou ua mouese atu ina ua ou auai i le Ekalesia, peitai ou te le alofa i e ita mai ia te au. Sa tuuina mai ia i tatou e le Faaola o Iesu Keriso lenei polo-aiga, ae sa le mafai e lou loto ona alofa atu i na fitafita sa pulea lo matou atunuu. Sa mamafa ia te au lenei mea mo le tele o aso, aemaise ona sa ou sauni e alu i le malumalu i lena vaitaimi.

I se tasi aso sa ou vaai ai i le mau lenei: "Ia outou tatalo atu i le Tama ma le malosi atoa o le loto, ina ia faatumulia outou i lenei alofa, lea ua ia faaee mai i luga o i latou uma o e o soo moni o lona Alo, o Iesu Keriso" (Moronae 7:48). Sa ou lagona le talanoa patino mai o Mamona ia te a'u ma faaali mai le auala ina ia alofa atu ai.

Sa ou filifili e ole atu i le Tama Faale-lagi mo se fesoasoani. Sa ou anapogi ma



tatalo atu mo se fesoasoani ina ia ou alofa atu ai i e ita mai. Ou te lei faalo-goina lava se suiga mo le tele o aso, peitai ou te le'i iloaina le suaia malie e le Tama Faalelagi o lo'u loto. Pe a ma se tausaga mulimuli ane, a o ou taumafai e pasia se tasi o nofoaga o suesuega, sa tau mai e le fitafita ia te au e le o faatagaina au i totonus. O le taimi la lea sa ese ou lagona. A o ou tilotilo atu i mata o lena fitafita, sa ou lagonaina le alofa ofoo fogia mo ia. Sa ou lagonaina le alofa tele o le Tama Faalelagi ia te ia, ma sa ou vaai atu ia te ia o se atalii o le Atua.

Ua ou iloaina nei, e pei o Nifae, e le aumaia e le Alii ia i tatou se polo-aiga sei vagana ua Ia saunia se ala mo i tatou e faataunu ai mea ua Ia poloainia ai i tatou (tagai i le 1 Nifae 3:7). Ina ua poloainia i tatou e Keriso tatou te alolofa atu i e ita mai ia i tatou, sa Ia silafia e mafai faatasi ai ma Lana fesoasoani. E mafai ona Ia aoaoina i tatou ina ia alolofa atu i isi pe afai tatou te faalagolago ia te Ia ma aoao mai i Ana faataitaiga maoae. ■

"E pei lava ona i ai i taimi uma, o Keriso lava o lo tatou faataitaiga. Sa Ia faaali mai le ala i Ana aoaoga faapea foi i Lona Olaga. Sa Ia faamagalo i e amioleaga, e le mafaufau, ma i latou o e sa saili e faatiga ma faamanua ia te Ia" (Dieter F. Uchtdorf, "O Le e Alofa Atu e Alofa-inia Mai," Liahona, Me 2012, 76).

E FAAPEFEA ONA TATOU AOAO IA FAAMAGALO ATU I ISI?

Na fesoasoani Peresitene Siaosi Alapati Samita (1870–1951) e tali lenei fesili i le mataupu 23 o Aoaoga a Peresitene o le Ekalesia: Siaosi Alapati Samita (2011):

- "Ae tatou te lei oo atu i le mamalu o lo tatou Tama ma olioli ai i faamanuiaga ua tatou faamoemoe e maua e ala i le faamaoni, e tatau ona tatou ola i tulafono o le onosai, ma faatin le faamagalo atu o i latou o e agaleaga mai ia i tatou, ma aveesea mai o tatou loto lagona uma o le inoino ia i latou."
- "A tatou aai la ma feinu i le faamanatuga o le Talisuaga a le Alii, . . . e ao ina tatou faamamaina mai o tatou loto ia lagona leaga uma o le tasi i le isi o o tatou uso ma tuafafine, e le auai i la tatou tapuaiga."
- "Talosia ia afio le Agaga o le Alii i o tatou loto, ma ia tatou faamagalo atu i tagata uma e pei ona la poloai mai, faamagalo, e le na o o tatou laugutu ae mai le ta'ele o o tatou loto, ia agaleaga uma atonu e faia mai ia i tatou."

O ai e manaomia ona outou faamagaloina? Mafaufau ma le agaga tatalo i se taimi ma se nofoaga talafeagai e talanoa atu ai i lenei tagata (po o tagata e toatele) ma faaali atu lo outou alolofa ma le faamagaloga.



**Saunia e Elder
D. Todd Christofferson**

O Le Korama a
Apostolo e Toasefululua



ATIINA AE O LE FAATUATUA IA Keriso

*E tele mea e mafai ona tatou faia e uunaia ai ma faalautele le
meaalofa o le faatuatua lea tatou te mauaina e ala mai i le Agaga Paia.*

Masalo o le faauigaga sili ona lauiloa o le faatuatua lea ua tuuina mai e le Apostolo o Paulo: “O le faatuatua o le faalagolago lea i mea ua faamoemoe i ai, o le mautinoa lea o mea e le o vaaia” (Eperu 11:1). Sa faaopoopo mai e Alema faapea o le faamoemoe mo mea e le o vaaia “a e moni” (Alema 32:21).

O le faatuatua ia Iesu Keriso o le talitonuga ma le faamautinoaga lea o (1) Lona tulaga i le avea ai ma Atalii e Toatasi na Fanaua e le Atua, (2) Lana Togiola le iu, ma (3) Lona Toetu moni—ma mea uma tatou te manaomia mai nei matapu taua moni uma.

Ua faaaofia e Paulo i lana lisi o meaalofa faaleagaga le faatuatua (tagai i le 1 Korinito 12:9). E moni lava o le faatuatua e sau mai le Agaga, ae peitai fai mai le Bible Dictionary, “E ui o le faatuatua o se meaalofa, ae e tatau ona tausia faapelepele ma saili i ai seia tuputupu ae mai se fatu laau laitiiti ma oo ai ina avea ma se laau tele.” E tele mea e mafai ona tatou faia e uunaia ai ma faalautele ai le meaalofa o le faatuatua lea ua tatou mauaina e ala mai i le Agaga Paia.

E Oo mai le Faatuatua e ala i le Faalogo i le Afioga a le Atua

O faailoga muamua e faatatau i le faatuatua ia Iesu Keriso e oo mai e ala i le faalogologo i le afioga a le Atua—the talalelei a Iesu Keriso. Pe a tuuina mai lena aoaoga ma talaina e ala i le Agaga Paia, “o le Agaga o le upumoni” (tagai i le MF&F 50:17–22), ua totolina le fatu o le faatuatua ia Keriso. Sa aoao atu e Paulo lenei mea i tagata Roma ina ua faamatala atu e mafai e tagata uma ona maua le meaalofa o le faatuatua: “E tupu le faatuatua i le taulogologo atu, o le taulogologo atu foi o i le afioga a le Atua lea” (Roma 10:17). I ni isi upu, e tupu le faatuatua e ala i le faalogo atu i le savali o lona uiga o le afioga, po o le talalelei, a Keriso.

A o ia faamataina le auaunaga a agelu, ua tau mai ai ia i tatou e Mamona o le mamanu lava lea sa i ai e tupu ai le faatuatua e ala i le faalogo i le talalelei:

“Ma o le tiute o la latou auaunaga [a agelu] o le valaau atu lea i tagata ia salamo, ma faataunu ma faia le galuega o feagaiga a le Tama, ia na ia faia i le fanauga a tagata, e saunia le ala i totonu o le fanauga a tagata, i le tautino atu o

E moni o le faatuatua e sau mai le Agaga, ae peitai fai mai le Bible Dictionary, “E ui o le faatuatua o se meaalofa, ae e tatau ona tausia faapele-pele ma saili i ai seia tuputupu ae mai se fatu laau laitiiti ma oo ai ina avea ma se laau tele.”



le afioga a Keriso i ipu filifilia a le Alii, ina ia latou molimau atu ia te ia.

“Ma o le faia o lea mea, ua saunia ai e le Alii le Atua le ala e mafai ai e le toe vaega o tagata ona latou maua o le faatuatua ia Keriso, ina ia maua e le Agaga Paia se nofoaga i o latou loto, e tusa ma lona mana; ma o le ala lenei o le a faataunu ai e le Tama, feagaiga na faia i le fanauga a tagata” (Moronae 7:31–32).

I le tofiaina ai e “molimau atu ia te ia,” ua valaauna ai faifeautalai, vaetofia, ma tuuina atu i ai le mana e ala mai i ki ma le pule faaapostolo. Ma o lea ua fataulia faatasi ai i latou “o ipu filifilia a le Alii.” I se isi faaupuga, i le avea ai ma avefeau faatagaina a le Alii, e auala atu i a latou aoaoga ma molimau e ala i le mana o le Agaga Paia, o le a faailoa atu ai le faatuatua ia Keriso i agaga o i latou o e faalogo ia i latou.

O le upu tatou te tautino atu, o le upu lea e fausia ai le faatuatua ia Keriso, o le talalelei lea, po o tala fiafia, ia Iesu Keriso. O le ta’u faigofie lava, o tala lelei e faapea o le oti e le o le iuga lea o le olaga ma o lo tatou o ese mai le Atua e le tumau. Ua i ai se tatou Faaola, o Iesu Keriso lea, le Alo paia o le Atua, o Lana Togiola na faatoilalo ai le oti ma seoli ina ia mafai ai e tagata uma ona toetutu ma o i latou uma o e o le a salamo ma papatiso i Lona suafa o le a mafai ona maua se nofoaga i le malo faalelagi o le Atua e faavavau.

E Tupu le Faatuatua e ala i le Salamo

E ttau le matafaioi o le salamo i le fausiaina o le faatuatua ia Keriso. O le mauaina o le afioga a Keriso o le a fausia ai le faatuatua e manaomia mo le salamo, ma o le

taui o le salamo, o le a fafagaina ai le faatuatua lea o le a tuputupu ae. Na tautino mai e Mamona, “Ma ua fetalai mai [Keriso]: Ia outou salamo outou tuluiga uma o le lalolagi, ma o mai ia te au, ma ia papatiso i lou igoa, ma faatuatua mai ia te au, ina ia faaolaina outou” (Moronae 7:34).

Mo se faataitaiga, o se faifeautalai atamai o le a fefau-tuaai ma tatalo faatasi ma lana soa, ma saili atu i se musumusuga e faatatau i le ala o le salamo e tatau ona mulimulitaia e tagata sailili taitasi. O le a fuafua ma le talafeagai e faifeautalai a laua aoaoga. O le a la fuafuaina ma le agaga tatalo po o le a se valaaulia po o ni valaaulia e tuuina atu i fesootaiga taitasi ma le tagata sailili. O le a la fausia a laua lesona e faatatau i le valaaulia, faailoaina o aoaoga faavae ia e manaomia ona malamalama i ai le tagata sailili ina ia mafai ai ona talia la la’ua valaaulia.

O le a fuafuaina e faifeautalai le auala e aoao atu ai na aoaoga faavae ina ia ausia le tulaga sili ona manino ma le talitonuga mo lena tagata patino. O le a la fuafuaina ni auala e faaaoga ai punaoa uma o loo maua, e aofia ai fesoasoaniga a tagata o le ekalesia, ina ia fesoasoani i tagata sailili e tausia lana tautinoga e galue e tusa ai ma mataupu faavae po o se poloaiga o loo fesiligia. O lenei ituaiga aoaoga ma molimau faafeautalai o le auala lea tatou te fesoasoani e taitai atu ai se tagata sailili e ala i le faagasologa o le salamo.

E Tupu le Faatuatua e ala i Feagaiga

O le isi elemene taua o le salamo o le papatiso lea e ala i le faatofuina, lea e amata ai ona tatou tauaveina i o tatou

luga le suafa o Keriso. E tele fuaiupu i totonu o tusitusiga paia e faatatau i le “papatisoga o le salamo” po o le “papatiso i le salamo” (tagai i le Galuega 19:4; Alema 5:62; 7:14; Moronae 8:11; MF&F 35:5–6). Ua faailoa mai i nei fasi fuai-tau le aoaoga faavae o le papatisoga i le vai o le laasaga mulimuli pe tupito lea i le faagasologa o le salamo. O le lafoaia o agasala, faatasi ai ma la tatou feagaiga o le usi-usitai, e faaatoatoa ai lo tatou salamo; o le mea moni, e le maea laasaga o le salamo pe a aunoa ma lena feagaiga. O lena mea ua tatou agavaa ai mo le faamagaloga o agasala e ala i le alofa tunoa o Iesu Keriso e ala i le papatisoga i le Agaga (tagai i le 2 Nifae 31:17). Ma le isi, o le feagaiga o le papatisoga e faatatau lea mo le lumanai faapea foi mo mea ua tuanai: o taimi uma lava tatou te salamo moni ai, ua toe faaaogaina lena feagaiga ma tatou toe agavaa ai foi mo se faamagaloga o agasala.

O le a le faiā o nei sauniga ma feagaiga e faatatau i ai i le fausiaina o le faatuatua? O le faatuatua ia Keriso o se mea taua lea e manaomia e ulu atu ai i feagaiga faalelagi, ae e faaopoopo atu foi ia feagaiga i le faatuatua o se tagata i se auala e le mafai ona ausia. E ala mai i feagaiga, o le a faatagaina ai e le Atua sili o le lagi o Ia lava ina ia noatia ia i tatou taitoatasi (tagai i le MF&F 82:10). Pau lava le mea o lo tatou usitaia o a tatou feagaiga ua osia ma Ia, ae ua noatia o Ia ina ia tuuina mai ia i tatou se nofoaga i Lona malo faatasi ai ma ni feagaiga maualuluga, ma le faaeaga i totonu o lena malo. O Ia o le Atua e i ai le mana uma ma e le mafai ona pepelo. O lea, e mafai ona tatou maua le faatuatua le faatuaioa o le a na Ia faataunuu Lana folafolaga ia i tatou. E ala i a tatou feagaiga ma le Atua, ua mafai ai ona tatou fiafia i se faatuatua ua lava lona malosi ia Keriso e fesoasoani ai ia i tatou i soo se luitau po o tofotofoga, ma le iloaina ua mautinoa lo tatou faaolataga i le faaiuga.

E Mafai ona Faateleina le Faatuatua

O mea ua ou tauina atu e uiga i le fausiaina o le faatuatua ia Keriso ia i latou o loo aoaoina e faifeatalai e faatatau foi lea ia i tatou uma. E fanau mai i le Agaga lo tatou faatuatua ia Keriso pe a tatou faalogologo i le afioga a le Atua o loo aoao mai e i latou ua tofia o ni Ana auauna, i e ola atoa ma e ua oti. Pe a tatou fausiaina i luga o lena faavae, o le a faamalolosia lo tatou faatuatua e ala i tatalo o le faatuatua lea ua avea ma se vaega o o tatou olaga o aso uma—ma o nisi taimi o se vaega o o tatou olaga faaleitula.

O le faaauau ai pea ona taumamafa fiafia i afioga a Keriso mai totonu o le Tusi a Mamona ma isi tusitusiga paia o le a faaopoopo atu ma faalolotoina ai le faatuatua lea na faavae mai i le upu. O le a fafagaina atili e le salamo ua

mauaa i le faatuatua lo tatou faatuatua a o faaatoatoaina le usiusitai. E faafouina e le salamo o tatou lava papatisoga i le vai ma le Agaga ina ia maua ai se faamagaloga o agasala ia na faia e le gata i le taimi a o lei papatiso ae faapea foi i le taimi ua uma ai ona papatiso. O auaunaga faaKeriso i o tatou tuaoi o se vaega taua tele lea o le tausiaina o feagaiga lea e faafaleleina ai le faatuatua ia Keriso. Tatou te iloaina i le aluga o taimi, o faamanuiaga folafolaina mo le usiusitai i le Atua o le mea moni ua iloa i o tatou olaga ma ua faamautuina ma faamalolosia ai lo tatou faatuatua.

O Le Faatuatua o Se Mataupu Faavae Foi o le Mana

O le mea o loo ou faamatalaina atu e oo mai i lenei tulaga o se maualuga o le faatuatua lea e aofia ai le faamautinoaga faaleagaga lea e maua ai ni galuega lelei, ae-maise lava o le usiusitai i mataupu faavae ma poloiga o le talalelei. O se faatuatua moni lea ia Keriso ma le maualuga lea e tatau ona taulai atu i ai a tatou aoaoga o tagata sailiili.

Ae peitai, e i ai se maualuga o le faatuatua e le gata o le a puleaina ai a tatou amioga ae e faamalolosia ai foi i tatou ina ia suia mea o loo i ai nei ma ia faatupuina nisi mea e le mafai ona tutupu. O loo ou talanoa atu e uiga i le faatuatua e le gata i le avea ai ma se mataupu faavae o faatinoga ae o se mataupu faavae foi o le mana. Sa taua e Paulo o le faatuatua lea “na faatoilaloia [ai e perofeta ia] malo, na fai ai amiontonu, na maua ai mea na folafolaina, na pupuni ai gutu o leona, na tineia ai le malosi o le afi, ma sao ai i le mata o le pelu, na faamalosia ai i latou sa vaivai, na avae ai ma fitafita i taua, na tutuli ai au a nuu ese, [ma] na maua mai e fafine o latou tagata oti ina ua toe tu mai” (Eperu 11:33–35). O ni mea ofooftogia ia—ae i se auala e le sili atu nai lo le faatoilaloia o se vaisu malosi tele po o nisi faafaitauli e le mafaatusalia i le liua ma le papatisoga.

O le ki i lo tatou mauaina o le mana e ala i le faatuatua o le aaooina, fesili atu, ma le faatinoina e tusa ai ma le finagalo o le Atua. “Sa fetalai mai Keriso: Afai tou te faatuatua mai ia te au o le a outou maua le mana e fai ai soo se mea e tatau ai ia te au” (Moronae 7:33).

Peitai, sa Ia lapatai mai, “Ma afai tou te ole atu mo se mea ua le tatau ai mo outou, o le a liua mo lo outou tausalaga” (MF&F 88:65).

O le a tuputupu ae ma le matagofie lou lava faatuatua ia Keriso pe a e saili i ai i aso taitasi ina ia iloa ma faia le finagalo o le Atua. O le faatuatua, ua uma ona avea ma se mataupu faavae o le faatinoga ia oe, o le a avea foi ma se mataupu faavae o le mana. ■

Mai se tautalaga na tuuina atu i se semina mo peresitene fou o misiona i Provo, Iuta, i le aso 23 o Junii, 2011.

Faasoaina atu o le Talalelei

E ALA I LE FAASOAINA ATU OOE LAVA

*O le auala sili lava e faasoa atu
ai le talalelei o le ola ai.*

Saunia e Stephanie J. Burns ma Darcie Jensen

Mo nisi o i tatou, o le faasoaina atu o le talalelei o se mea masani. Peitai mo le toatele o i tatou, e le faigofie. O le mea moni, atonu tatou te fefefe e faasoa atu ni mea patino i ni uo, aiga, po o ni tuaoi e talatalanoa ai e uiga i le talalelei, e tusa lava pe tatou te iloa le taua tele o le faia o lena mea.

Ma le isi, o nisi taimi pe a tatou mafaufau e uiga i le galuega faafaifeautalai, e matele la tatou taulai atu i metotia, gaoioiga, po o le taunuuga, nai lo le taulai atu i le auala e fesoasoani ai i le tagata. O le faafitauli, o soo se taumafaiga lava e le o taulai atu i le tagata o le a mafai ona lagonaina i na taumafaiga le fai faamalosi ma le le faamaoni.

Atonu e i ai se auala e sili atu.

O lena auala o le a atili liua mai ai i le talalelei—o ni tagata taitoatasi—ma ia avea faataitaiga o o tatou olaga ma a tatou talatalanoaga faaleuo e tatalaina ai le auala. O le faateleina lava o lo tatou liua, o le faateleina foi lena o lo tatou fiafia i la tatou tapuaiga, ma amata ai ona tatou lagonaina le faateleina o le naunau atu i isi ina ia fiafia i faamanuiaga o le talalelei. Afai ae tupu lena mea, o le a avea ma mea masani le faasoa atu.

O le mea moni, atonu tatou te le o iloa o loo tatou faasoaina atu le talalelei. A o tatou siitiaina le tulaga o le avea ai o i tatou ma soo faamaoni, o lona aafiaga i a tatou faatinoga, gagana, ma e oo foi lava i o tatou foliga o le a faigata ona le amanaaina. “O le a iloa lelei e isi tagata a outou galuega lelei,” sa faamatala ai e Elder Russell M. Nelson o le Korama a Apostolo e Toasefululua. “E mafai ona susulu mai le malamalama o le Alii



mai o outou mata. Faatasi ai ma lena susulu ua tatau ai ona e saunia e tali ni fesili.”¹

Molimau Ola

O loo faamatalaina i le *Tala'i La'u Talalelei*: *O Se Taiala mo le Galuega Faafaifeautalai*: “Ua uma ona faaali mai e le Faaola le ala. Ua la faatuina le faataitaiga atoatoa, ma ua la poloaiina i tatou ina ia avea e faapei o Ia (tagai i le 3 Nifae 27:27).”² A o aoao tagata o le ekalesia e uiga ia Keriso ma saili e tuu Ona uiga faaleatua i o latou olaga e ala i le mana o Lana Togiola, o le a avea atili i latou faapei o Keriso ma taitai atu ai foi isi ia te Ia.³

Sa tau mai e se tasi o tagata faatoa liliu mai mai Uosigitone, ISA, faapea o



le faaaluina o le taimi e faatasi ai ma tagata o le ekalesia sa na o le pau lena o le mea sa ia faia na amata ai ona fiafia i le talalelei. "O le fiafia sa latou aumaia ma ou faalogoga a o matou faatasi ai sa le mafai ona faafitia," sa ia faasoa mai ai. "Latou te lei talai mai ia te au e uiga i le Atua. Sa i ai lava i o latou ituaiga tagata: o latou ituaiga o olaga, a latou filifiliga, a latou faatinoga ma uiga faaalia. Pe a ou vaavaai atu ia i latou, ou te faapea ifo ia te au lava ia, 'O le auala lena ou te fia ola ai. O le tulaga lena ou te fia i ai i lenei olaga.'"

A o tatou maua atili le mafanafana o aafiaga o le talalelei i o tatou olaga, o le a faigofie ona talatalanoa i na aafiaga aua ua i ai mea tatou te talanoa ai ma ona ua mafai ona tatou faasoa atu mea sa faia e lena savali mo i tatou.

Sa iloaina e Miriam Criscuolo mai Italia lena mea, e ui lava ina ua uma ona la faavaeina se faigauo anoa ma se

tuaoi, ae na te le iloaina lava le auala e talanoa ai e uiga i le talalelei. "Sa ma faaaluina faatasi le tele o taimi, peitai ou te lei mauaina le lototoa e talanoa atu ai i la'u uo fou e uiga i le talalelei, e ui sa ou iloa o lo'u tiute lea ua le faia," sa ia faasoa mai ai.

Peitai ina ua avea ma masani le talanoa e uiga i le talalelei, na amata ona tutupu mai ni mea. Na manatua e Miriama, "O la'u tama teine lea sa ia faaali maia se galuega faatino a le Peraimeri sa faaosofia ai le fia iloa o la'u uo. 'O le a le Peraimeri?' o lana fesili mai lea. Mai lena fesili na fanau mai ai le fiaselau o isi fesili. Sa ou iloaina ua tele tausaga o saili la'u uo mo se mea faapenei. Sa ou tauina atu ia te ia o le filemu o le mafaufau sa ia sailia e maua i la tatou Ekalesia.

"Sa ia auai mulimuli ane i le Ekalesia. Sa avea o ia ma se tali i a'u talosaga e uiga i le sailia o se auala e faia ai le



TOE FAI ATU SINA UPU ITIITI

"O ni tausaga ua mavae, sa nonofo ai lo matou aiga ma galulue faatasi ai ma ni tagata o e, i le tele lava o tulaga, sa le auai i lo tatou faatuatuga. Pe a latou fesili mai pe na a mai le faaiuga o lo matou vайaso, sa matou taumafai . . . e faaso atu i ai ni aafiaga faalelotu a lo matou aiga i le faaiuga o le vайaso—mo se faataitaiga, o se lauga a se talavou e uiga i tulaga faatonuina mai le *Mo Le Malosi o le Autala-vou* po o le auala foi sa ootia ai i matou i ni upu a se alii talavou ua alu i se misiona."

Peresitene Dieter F. Uchtdorf, Fesoasoani Lua i le Au Peresitene Sili, "Faatalitali i le Auala i Tamaseko," *Liahona*, Me 2011, 76.

galuega faafaifeautalai ma faaali atu ai i la'u fanau le ala e faia ai."

la Avea ma Uo Muamua

E pei o Miriama, o nisi taimi tatou te lagona ai faapea o se tiute fai faamalosi le faasoat atu o le talalelei ma iloa ai o lenei lagona o le tiute e mafai ai ona tupu mai ni talanoaga fai faamalosi ma le le toafimalie. O le isi mea, e mafai ona lofituina i tatou e le lagona faapea o se tiutetau-ave, ma faaititia ai lo tatou gafatia e faamatala atu ma le lelei ia matapu faavae o le talalelei.

Atonu o le a maua ni avanoa faamanuiaina faafaifeautalai pe afai o le a avea tagata o le ekalesia ma uo lelei ma le faamaoni i isi. E pei ona ta'ua e Elder M. Russell Ballard o le Korama a Apostolo e Toasifululu, "Afai tatou te faailoa atu lo tatou auai i le Ekalesia mai lava i le amataga, . . . o le a taliaina e uo ma e masani o se vaega lena o o tatou olaga."⁴

O le faaaofia ai o le talalelei i faigauo o i ai nei nai lo le faavaeina o faigauo i le faasoaina atu o le talalelei e mafai ona faateleina ai le tulaga manuia faafaifeautalai. O Eliana Verges de Lerda, o se tagata o le Ekalesia i Atenitina, sa ia feiloai i lana uo o Anapela a o taufai ono uma o laua tausaga. Sa faatupulaia le la faigauo a o la aooga faatasi. I aluga o lena taimi, e le'i nanaina lava e Eliana le tulaga moni o le avea o ia ma se tagata o le Ekalesia.

"Sa ou lagona le toofilemu pe a ou talanoa atu ia Anapela e uiga i le talalelei, e ui e le tutusa o maua talitonuga," sa ia fai mai ai.

Ina ua ta'i 14 tausaga o teineiti, sa ioe Anapela e faalogo i faafeautalai, peitai na te lei filifi e papatiso.

Sa faanoaoa Eliana, peitai e lei taofia ai o ia mai le faaaauau pea o le la faigauo; e lei taofia ai foi ia talanoaga e uiga i le talalelei. O nai tausaga mulimuli ane, sa valaaulia ai e Eliana ia Anapela la te auai i le seminare. I le taimi o le lesona, sa matuai malosi lava le lagonaina e Anapela o le Agaga. A o sauni Eliana e alu i le malumalu i nai aso mulimuli ane, sa fai atu Anapela ia te ia, "ou te folafola atu ta te o faatasi i se isi taimi e sosoo ai." Sa papatiso Anapela i sina taimi puupuu mulimuli ane.



O le liua o Anapela e lei faia i ni aso; na tele tausaga na alu ai. Sa mafai lea faagasologa aua sa avea muamua Eliana ma ana uo—e tusa pe sa i ai pe lei i ai foi se naunau o Anapela e talia le talalelei.

Faalogo ma le Alofa

E tele lava ina amatalia ni faigauo e pei o Eliana ma Anapela pe a iloa e tagata e tutusa mea latou te fiafia i ai, tulaga faatonuina, po o nisi mea e masani ai. E faamalolosia nei faigauo pe a faasoat atu e tagata taitoatasi o latou aafiaga, lagona, ma le alofa. Ma e moni o le alofa, o se vaega tutotonu lea o le talalelei toefuataiina.

Tatou te mafai, i le avea ai ma ni tagata o le Ekalesia, ona faailoa atu le alofa faa-Keriso e ala i le faaaluina o le taimi tatou te mafuta ai ma a tatou uo—e ala i gaoioiga, auaunaga, ma talanoaga. O le mea moni, o le toatele o tagata e na o le pau lena o le ituaiga uo o loo sailia.

I le faamatalaina ai o a tatou fegalegaleaiga ma isi, ua fautua mai ai Elder Jeffrey R. Holland o le Korama a Apostolo e Toasifululu faapea: "E sili atu ona taua le faalogo nai lo le tautala. O nei tagata e le o ni mea faitino e lei ni ola ua natia i ni fuainumera o papatisoga. O i latou o fanau a le Atua, o o tatou uso ma tuafafine, ma o loo latou moomia le mea o loo ia i tatou. Ia e faamaoni. Ia aapa atu ma le faamaoni. Ia fesili i na uo po o le a le mea e sili ona taua ia te i *latou*. . . . Ona faalogo lea. . . .

Ou te folafola atu ia te outou e i ai lava *se mea* o le a latou ta'uina mai o le a faatumutumuina ai *pea* se upumoni o le talalelei e uiga i se mea e mafai ona e molimau atu ai ma se mea e mafai ona ofoina atili atu.⁵

E le manaomia lo tatou osofaia o a tatou uo i le talalelei. Pau lava le mea e manaomia o le avea ma ni uo lelei ma aua nei fefefe e faasoatua atu ia manatu faavae o le talalelei pe a tulai mai ni avanoa. E faaaoga e Satani le fefe e taumafai e taofia ai tagata o le ekalesia mai le faasoaina atu o se molimau. O lenei lagona malosi e mafai ona taofia ai le alualu i luma. Sa tau mai e Peresitene Uchtdorf: "O nisi e sili atu ia i latou le tosaina o se taavaletosolima e sopoia ai le laufanua, nai lo le ta'ua o le mataupu o le faatuatua ma tapuaiga i a latou uo. . . Latou te popole i manatu o tagata e uiga ia i latou pe ina nei faaleagaina ai foi a latou fegalegaleaiga." Sa ia faaauau, "E le tatau ona faapena, aua ua ia i tatou se savali fiafia e faasoatua atu, ma ua i ai foi sa tatou savali o le olioli."⁶

Sa aoao mai le perofeta o Mamona, "E lafo ese i fafo e le alofa ua atoatoa le fefe uma" (Moronae 8:16). A tatou ola atoatoa i le talalelei, o le a mafai ona tatou aveesea le fefe e ala i le suitulaga ai o le alofa mama—le alofa le pona o Keriso—e agai i a tatou uo, aiga, ma tuaoi. O lenei alofa o le a faateleina ai la tatou aga masani o le faasoatua o le talalelei.⁷



O LE MANA O LE "O A'U O SE MAMONA"

Ole faalauiloa o le "O A'u o se Mamona" lea na amatalia i le 2010 ua avea ma se auala faigofie ma aoga mo tagata o le Ekalesia e faasoatua ai o latou lagona e uiga i mea latou te talitonu ai. Ua faaaofia i lenei faalauiloa ni

pepa o faasalalauga mo TV ma laupapa tetele i le tele o aai o le IS faapea foi ma ni vaega i luga o le initonetia. I le Mormon.org, o loo faasoatua ai e tagata o le Au Paia o Aso e Gata Ai ni tala patino ma tali ai le anoano o fesili e pei o le "O Mamona ea o

ni Kerisiano?" ma le "O a ni mea e talitonu i ai Mamona e uiga i le Tusi Paia?"

Na faasoatua mai e Rochelle Tallmadge mai Texas, ISA: "Sa ou tatalo mo ni aafiaga faafaifeautalai ma sa maua se valaau mai se tasi o le sa fia iloa pe ou te fiafia i le polokalama fou lea o le Mormon.org.

Faasoaina Atu o le Talalelei i se tulaga Masani

E manaomia e le fanau a le Tama Faalelagi le vaaiga o loo ofoina atu e le talalelei. Mo tagata o le ekalesia o e o mulimuli i le mamanu o le talalelei, o loo avea o latou olaga ma se molimau o le alofa o Keriso. Pe a taulai atu ia tagata o le ekalesia i le avea ma le naunautai faapei o Iesu Keriso, fausiaina o faigaauanoa, ma le atiina ae o le alofa mama, o le a avea le faasoatua atu o le talalelei ma se taunuuga masani o tagata ua avea ai i latou. A o latou galulue e faasoatua atu pe o ai i latou, o le a maua e tagata o le ekalesia le mafanafana ma le taitaiga i le fetalaiga a le Faaola i Ona sooo: "Ua ou faatoga mo oe, ina nei mavae lou faatuatua: a o oe foi, pe a liua mai oe, ona e faamalosi ai lea i ou uso" (Luka 22:32). ■

FAAMATALAGA

- Russell M. Nelson, "Ia Fai Oe ma Faaaoao i e ua Faatuatua," *Liahona*, Nov. 2010, 48.
- Tala'i La'u Talalelei: O Se Taiala mo le Galuega Faafaifeautalai* (2004), 123.
- Tagai i le *Tala'i La'u Talalelei*, 123.
- M. Russell Ballard, "Atiina Ae o se Fale e Fefaaosai ai le Talalelei," *Liahona*, Me 2006, 86.
- Jeffrey R. Holland, "Molimau ia te A'u," *Liahona*, Iulai 2001, 16.
- Dieter F. Uchtdorf, "Faatalitali i le Auala i Tamaseko," *Liahona*, Me 2011, 76.
- Tagai ia Barbara Thompson, "Nofouta i le Āva," *Liahona*, Nov. 2009, 120.

"Ona o la'u fanau tama e le atoatoa le malosi, o le tele lava o a'u fesoottiga i luga o le saite e sau mai ia i latou a le o se tagata e le atoatoa le malosi pe e i ai foi i se aiga e i ai se tagata e le atoatoa le malosi. O lo'u aafiaga sili ona faagaeetia sa aofia ai Mia. E nofo o ia i Oslo, Nouei, ma e alu i se nofoa faataavalevale. Sa ia saili i le Mormon.org mo se mea e faatatau i tulaga o le le atoatoa ma na vaaai ai i la matou vitio. Sa matuai ootia ai o ia. Sa ia faafesooataia ia faafeautalai, sa matou fetusiai i le taimi atoa o le taumafanafana, ma sa papatisoina o ia i le ogatotonu o Aokuso. Sa matou iloaina uma lava o se vavega lea na mafai ai e le Alii ona faafesooataia i matou i le atu vasa laolao.

OLE TALI ATU

*O loo talanoa
mai faifeau faa-
misiona matu-
tua i le salafa o
le lalolagi e faa-
tatau i taui sili
o le faatoilalo-
ina o faafitauli
i le auauna atu
i ni misiona.*



Saunia e Kendra Crandall Williamson

Sa saofafai ia Chanta ma Sounthara Luangrath i lo la fale i Kalefonia, ISA, ma mafaufau po o le a se mea e tatau ona la faia. Sa la saunia le la fanau e toafa e auauna atu i ni misiona, ma ua la iloa nei ua oo i lo la taimi. Ua tele atu le la faaiuga nai lo le mea sa la mafaufauina: o le a la matuai misia lava ia fanau a le la fanau! Sa la popole foi e uiga i nai faafitauli tau le soifua

maloloina. Ma pe faapefea lo la fale ma mea-fale pe a la malaga ese?

O popolega a le au Luangraths e uiga i le auauna atu i se misiona e le o se mea fou ia i laua. O le mea moni, sa faailoa mai e Elder Robert D. Hales o le Korama a Aposetolo e Toasefululua ni vaega se fa o faafitauli i le galuega a le au faamisiona matutua; fefe, popolega faaleaiga, mauaina o le avanoa sa'o e faamisiona ai, ma mea tautupe.¹

I LE VALAAU A LE PEROFETA



"Matou te manaomia lava le anoanoai o ni ulugalii matutua. . . . la faavanoa outou lava e tuua le aiga ae o atu e auauna atu o ni faifeautalai faamisiona. E i ai ni nai taimi i o outou olaga, o le a outou olioli ai i le lagona matagofie ma le faamalieina e maua mai le auauna atu faatasi mo se taimi atoa, i le galuega a le Matai."

Peresitene Thomas S. Monson, "A o Tatou Toe Potopoto Faatasi Ai," *Liahona*, Nov. 2010, 6.

O Chanta ma Sounthara Luangrath, o e na siitia atu i Kaledonia, ISA, sa la vaoi atu ia Laos—o le lauelele sa la fananau ai ma ola ae ai ma o loo auauna atu ai nei o ni faifeau faamisiona.

O le faatoilaloina o nei faafitaui e manaomia ai le faatuatua tele, o se uiga ua faaalia e le au Luangraths ina ua la faalogo i le valaaau a Peresitene Thomas S. Monson mo nisi faifeautalai i le konafesi aoao ia Oketopa 2010. "Sa ma lagolina le malosi tele o le Agaga," sa la tomanatu ai. "Sa ma mananao e mulimuli i le perofeta, o lea sa ave ai i totonu o ma pepa mo le misiona."

Sa valaauina le au Luangraths e avea o ni faifeau faamisiona mo fesoasoaniga agaalofa i Lao, o le lauelele sa la fananau ai, ola ae ai,

Itu agarale i luga: O faifeau faamisiona matutua o loo auauna atu i le Afai o Sate Leki, Iuta, latou te fesoasoani i tagata sulufai mai atunuu eseese ina ia faamasani i o latou nofoaga fou, e aofia ai le aiga o Ntabwoba mai Rwanda, lea factoa faamau talu ai nei i le malumalu.




Sa auauna atu faatasi Sondra Jones ma tamaitai o le Atu Maresala (agavale, faatasi ma lona toalua o, Neldon).

ma faaipoipo ai. Sa mouese atu o laua popolega a o la sauni e auauna atu: sa lagolagoina i laua e o la aiga, sa la foaina o laua faafitauli tau le soifua maloloina, ma faavanoa lo la fale mo le lisiina atu. Sa laua lagona le mautinoa a o la faia le mea ua poloai mai ai le Faaola: "Ina alu ia, . . . ave le satauro, a e mulimuli mai ia te au" (Mareko 10:21).

O tagata matutua e mafai ona auauna atu i ni misiona i le tele o auala ma i le tele o

O Martha Marin (taumatau mamao) sa auauna atu faafeautalai faamisiona i le nofoaga autu o punaoa mo mea tau galuega i Puebla, Mekisiko.



nofoaga. E pei ona faailoa mai e tala nei, e tua lava pe o auauna atu atoa pe faavaitaimi, o se ulugalii pe nofoufa, i o latou lava atunu po o se atunuu ese, e mafai lava e tagata matutua ona faatoilaloina ma le faamaoni ia ni faafitauli o loo faalavelave i o latou ala.

Fetaiai ma le Fefe

*"O le fefe i mea e le iloaina po o le fefe faapea e leai so tatou tomai moomia o tusitusiga paia po o le gagana e mafai ona oo mai ai se lagona faaluafesasi mo le auauna atu. Ae peitai ua fetalai mai le Alii, 'Ae afai ua outou saunia o le a outou le matatau' (MF&F 38:30). O lou olaga o lau sauniuniga lea. . . . Tau lava o le o atu, o outou lava."*²

Elder Robert D. Hales o le Korama a Aposetolo e Toasefululu

O le fefe e mafai ona taofia ai le galuega faafeautalai. O nisi tagata e fefefe faapea e le lava ni o latou tomai ma le malamalamā e manaomia e auauna atu ai. O nisi e popole i le nonofo ai i se atunuu ese o le lalolagi po o le galulue faatasi ma ni tagata latou te le iloaina.

O Sister Martha Marin mai Veracruz, Mekisiko, sa fetaiai ma nisi o mea sa fefe ai a o ia auauna atu o se faifeautalai faamisiona i le nofoaga autu o punaoa mo mea tau galuega i Puebla, Mekisiko. Sa matamuli e faaaoga ia komepiuta, o se vaega taua o le nofoaga autu mo mea tau galuega. Ae peitai o le fesoasoani ma le lagolagosua a lana soa ma isi o loo latou galulue faatasi, sa ia aoao ai ni tomai sa manaomia. "Sa liua lenei faafitauli e avea ma se faamanuiaga," o lana tala lea. "Ou te iloa e le o tuuatoatasi au i lenei galuega."

O Sister Sondra Jones mai Iuta, ISA, sa valaauina faatasi ma lona toalua o, Neldon la te auauna atu i le Atu Maresala. "Sa ou matuai fefe lava po o le a se mea o le a ou oo i ai. Ou te lei lagonaina muamua lava se matamuli e taumafai e aoao atu le talalelei," o lana tala lea. Ina ua maea le lagonaina muamua o le leai o sona sao, sa ia filifili loa e taulai atu i ana taleni ma tomai. Sa amata ona ia aoao e alofa i tagata Maresala ma auauna atu ia i latou e ala i le otina o lauulu ma aoaoina i latou e suisui.

Ina ua mavae masina e 18 sa ia fuafuaina pe a ma le 700 le aofai o tagata na ia otina

lauulu. O lona naunau e faasoa atu ana taleni na faatagaina ai o ia e auauna atu ma fausia ni fegalegaleiga ma le fia selau o tagata, e aofia ai ma tagata o le Ekalesia, tagata sailiili, ma isi tagata o le nuu.

Foiaina o Popolega Faaleaiga

“O le a se faamanuiaaga sili atu e mafai ona tuu atu e matua matutua i a latou fanau nai lo le fai atu e ala i galuega ma upu, ‘I le aiga lenei, tatou te o e faamisiona!’”³

Elder Jeffrey R. Holland o le Korama a Aposetolo e Toasefululua

O le manatu e tuua fanau o loo tauivi po o fanau a fanau o loo tuputupu ae e foliga mai e faigata tele mo le toatele o tagata. Ae peitai, o le a iloa e faifeautalai o le a faamalosia o latou aiga i auala latou te lei faamoemoeina ona o a latou auaunaga.

O Raymond ma Gwen Petersen mai Wyoming, ISA, ua fa a laua misiona. O lo la malaga ese atu i le la misiona lona lua—i Samoa mo le taimi lona lua—sa avea lea ma se luitau i le amataga mo le la fanau, o e e lei malamalamā pe aisea e manaomia ai e o latou matua ona toe auauna atu i se *isi* misiona.

Sa vave ona iloa e le aiga le tele o faamanuiaiga na oo mai ona o le la auaunaga. “Sa faamanuiaina uma i latou!” o le tala lea a Sister Petersen. “O se tasi ulugalii sa lei maua lava se la fanau sa faamanuiaina i se pepe tama, o le *isi* sa faamaloloina faavavega mai le kanesa, o le *isi* sa vaiai le tele o le alualu i luma sa i ai i se tamaitiiti faalogogata, a o *isi* sa faamanuiaina a latou pisinisi.”

O a latou galuega faigata sa tuua ai se auala o le faatuatua tuufaasolo i o latou aiga. “E toafa fanau tama a a ma fanau o loo auauna atu faamisiona i le taimi nei ma sa latou tau maia ia i maua, sa avea i maua ma uunaiga mo i latou e o i ni misiona,” o le tala lea a Sister Petersen. “O le a se mea e sili atu le tauia nai lo lena mea?”

Mauaina o le Avanoa Sa’o e alu ai i se Misiona

“Ou te maofa pea i le fetaui lelei o le taitaiga a le Agaga Paia ma uiga ma manaoaga o faifeautalai ma ulugalii taitasi i le tele o



O Raymond ma Gwen Petersen na auauna atu i ni misiona se lua i tagata Samoa o le Au Paia o Aso e Gata Ali.

tulaga eseese o le galuega faafaifeatalai i le lalolagi atoa.”⁴

Elder Richard G. Scott o le Korama a Aposetolo e Toasefululua

E manaomia le auaunaga a faifeau faamisiona matutua i nofoaga autu mo mea tau galuega, ofisa o misiona, nofoaga autu mo talafaasolopito o aiga, malumalu, ma nofoaga autu mo tagata asiasi mai, faatasi ai ma isi nofoaga. E mafai ona talosaga tagata o loo

O George ma Hine Chase na auauna atu faamisiona o ni fationu o fesoasoaniga alofa i Papua Niu Kini.



SUIGA I AIAIGA FAAAVE A FAI- FEAU FAAMISIONA MATUTUA

- E mafai ona filifili ulugalii faamisiona e auauna atu mo le 6, 12, 18, po o le 23 masina.
- E faagata ia tau o fale mo ulugalii faamisiona i le US\$1,400 i le masina.
- E mafai ona toe foi ia faifeau faamisiona matutua i le fale mo ni faalave-lave tuga faaleaiga (ia le silia ma le 10 aso) e totogi lava e i latou.

Mo nisi faamata-laga auiliili, tagai i le <http://lds.org/church/news/changes-in-senior-missionary-rules>.

fia galulue po o fea latou te fia faamisiona ai, ae o le faaiuga lava o le valaauga e sau mai le Alii, e ala mai Lana perofeta. E silafia e le Alii le avanoa o le misiona sa'o mo tamaitai nofufua taitasi po o ulugalii ua saunia.

O George ma Hine Chase mai Niu Sila na la iloaina le talafeagai lelei o lo la valaauga o le misiona mo i laua; sa la tetei ma le fiafia ina ua mafai ona fesoasoani le tele o a laua matata ma taleni faaleaiga i le faataunuina o fesoasoaniga alofa i Papua Niu Kini.

O Elder Chase sa avea ma kamuta ma e mafai ona fesoasoani e fuafua ma faamaopo-o po ia galuega faatino e pei o le fausiaina o vaieli. O Sister Chase sa galue mo le 18 tausaga i le puleaina o galuega faafifa. "Sa matua aoga tele ou tomai faalepulega ma fakomepiuta," sa ia fai mai ai. Sa la faaaogaina ma Elder Chase te tuufatasiga o o laua tomai e fafoe ai se polokalama o aoaoga faalematata, e fesoasoani ai i tagata o le lotoifale ina ia aoao ni tomai e pei o le puleaina lelei o taimi, faatulagaina o mea, faaletaitai, tumama, ma fesootaiga.

Sa faaaogaina faatasi e le au Chase ia poto masani sa la maua mai o laua valaauga o le Ekalesia ma—o le mea sili o na mea uma—mai le avea ai o ni matua. A o galulue le au Chase e tufa atu ia sapalai o meaaoga

O Peter ma Kelly Sackley na auauna atu faamisiona i le ofisa o le Eria i Hong Kong.



ma faalelei ia tausiga o tamaiti pepe, sa fesoasoani lo laua poto masani faamatua late talisapaia ai ia faafitauli o loo feagai ma aiga ma aoga i le lotoifale.

Taulimaina o Mea Tautupe

*"Fefautuaai ma lou aiga lautele ma lou epikopo po o le peresitene o le paranesi. A malamalamia auauna a le Alii i ou manaoga faaletino, o le a mafai ona e maua faamanuiaga e faavavau o le galuega faafafeatalai."*⁵

Elder Robert D. Hales o le Korama a Apostolo e Toasefululua

O le toatele o ulugalii e popole e le o lava a latou tupe e auauna atu ai i se misiona. Latou te mafaufau i le totogiina o mea e nonofo ai, falemai, ma fale ma mafaufau pe faapefea ona faatupe nei mea uma. Ua silafia e taitai o le Ekalesia nei popolega moni ma ua faia ai ni suiga i aiaiga faavae ina ia fesoasoani e faamāmā ia avega (tagai i le laina i autafa i le itu agavale). Ae, o le taulimaina o popolega o mea tautupe e manaomia ai le faatuatua, fuafuaina ma le faaeteete, ma nisi osigataulaga.

O Leonard ma Vera Chisango mai Zimbabwe na oo i ni luitau e ui lava sa faia ni fuafuaga aoga. Sa la saunia i lo la olaga faaipoipo atoa e auauna atu i ni misiona, ma sa la iloa e mafai e a laua penistone ma tupe teu ona tausia i laua i le la misiona muamua i le Malumalu o Johannesburg Aferika i Saute. Peitai a o la auauna atu, sa faafuasei lava ona pau maulalo le tamaoaiga, ma sa matuai faaititia ai a laua tupe maua.

Faatasi ai ma le fesoasoani a o laua aiga, sa nonofo ai pea le au Chisangos i le la misiona. Sa matua faamalieloto ia faamanuiaga o lena ositaulaga: sa faamanuiaina le pisinisi a lo la atalii, sa siitia le tulaga a lo la afafine i le galuega, ma sa aoao le la fanau e galulue faatasi e lagolago o latou matua.

O le toatele o faifeau faamisiona matutua e molimau atu faapea o faamanuiaga o le auauna atu e sili atu nai lo le tau faaletino. O Elder Peter Sackley, o se faifeau faamisiona Kanata o loo auauna atu faatasi ma lona toalua o, Kelly, i totonus o le Ofisa o le Eria o

Hong Kong, sa ia aoteleina ia lagona o le toatele: "Ua ou aluese mai se galuega totogi i se galuega faamanuiaina."

Faatoilaloina o Faafitauli e ala i le Fausiaina o le Faatuatua

*"E toatele tagata lotomaualalo o le Au Paia o Aso e Gata Ai e popole e le o agavaa mo galuega faamisiona. Peitai, ua tuuina mai e le Alii i tagata ua faamoemoe e avea ma faifeautalai le faamautinoaga lenei: 'O le faatuatua, faamoemoe, alofa mama ma le alofa, ma le manatu tasi i le mamalu o le Atua e agavaa ai o ia mo le galuega.'*⁶

Elder Russell M. Nelson o le Korama a Aposetole Toasefululu

Ina ia tali atu i faafitauli e fa i le auaunaga a faifeau faamisiona matutua, ua fautua mai ai e Elder Hales se vaifofo faigofie: "Ia faatuatua; o loo silafia e le Alii le mea o loo manaomia ai oe."⁷ E faatoilalo e le faatuatua le fefe, faamalolosia ia aiga, fesoasoani i se faifeautalai matua ina ia maua le avanoa sa'o e auauna atu ai, ma fesoasoani e tuu atu se faamama avega i mea tautupe.

O le tele o tausaga ua mavae, sa tuputupu ae ai lea ituaiga faatuatua i totonu o se teineiti-iti Polani e igoa ia, Stanislawa Habel. I tausaga mulimuli ane, sa taitaiina o ia e lona faatuatua e taliaina le talalelei toefuataiina ma, ina ua tagata matua, sa galue ai o se faifeautalai mo talafaasolopito o aiga i Iuta.

O le auaunaga a Sister Habel sa aoaoina ai o ia i se tamai mea lilo e le o iloa tele: "O le misiona e faatalavou atili ai tagata." Sa ataata o ia ma fai mai, "Pe a e faagaloina ou faafitauli, ua e aoao ina ia maua le loto faafetai. Ua e aoao ina ia avea atili faapei o Keriso e ala atu i auaunaga i isi, ma o le sauniuniga lea e nonofo ai faatasi ma le Tama Faalelagi. E mafai e se misiona ona suia le olaga o se tagata matua."

Ioe, e mafai, faapea foi ma olaga o e latou te auauna i ai ma le lotomaualalo. ■

O loo auauna atu faifeau faamisiona matutua i auala eseese i le salafa o le lalolagi. Asiasi ane i le liahona.lds.org e faiatua ai i nisi o a latou tala.



O Leonard ma Vera Chisango na auauna atu faamisiona i le Malumulu o Johannesburg Aferika i Sautē (taumatau).



FAAMATALAGA

1. Tagai ia Robert D. Hales, "O Ulugalii Faamisiona: O Se Taimi e Auauna Atu Ai," *Liahona*, Iulai 2001, 28–31.
2. Robert D. Hales, *Liahona*, Iulai 2001, 29.
3. Jeffrey R. Holland, "Ua Tauto i Tatou Uma," *Liahona*, Nov. 2011, 45.
4. Richard G. Scott, "O Le Taimi Lenei e Auauna Atu Ai i se Misiona!" *Liahona*, Me 2006, 89.
5. Robert D. Hales, "Ulugalii Faamisiona: Faamanuiaiga mai le Ositaulaga ma le Auauna Atu," *Liahona*, Me 2005, 40.
6. Russell M. Nelson, "Faifeautalai Matutua ma le Talalelei," *Liahona*, Nov. 2004, 81.
7. Robert D. Hales, *Liahona*, Iulai 2001, 31.

"Atonu e leai se isi auala e sili ona lelei e faaalia ai le faafetai i le Silisiliese nai lo le auauna atu faafaifeautalai faamisiona."

Elder Leonard Chisango, Zimbabwe

O loo fesoasoani ia Stanislawa Habel i tagata o asiasi atu i le Faletusi mo Talafaasolopito o aiga i le Aai o Sate Leki, Iuta.



OFAAMANUIAGA
OLE TAULAI ATU I LE

MALUMALU



"O lenei, e faatatau i le tulaga o le agaga i le va o le otia ma le toetutu mai—Faauta, ua faailoa mai ia te au e se agelu, e faapea o agaga o tagata uma, o le taimi lava tatou te o ese atu ai mai lenei tino faaletino, ioe, agaga o tagata uma, pe sa latou lelei pe sa leaga, e ave atu i fanua i lena Atua o le na ia tuuina ia te i latou le ola."

Alema 40:11

E leai se isi galuega e sili atu nai lo le fausiaina o se aiga e faava-vau—ma e faataunuina lena galuega i le maota o le Alii.

Saunia e Joshua J. Perkey

Mekasini a le Ekalesia

Ei ai nai mea i le olaga e sili atu ona tatou faanoanoa ai nai lo le maliu o se tasi e pele. Sa lofituina olaga o Epikopo Richard Rodriguez ma lona faletua o, Ruta, e sea ituaiga o faanoanoaga. Ae peitai o le i ai o mata e vaai ai ma taliga e faalogo ai ma e ala atu i sauniga paia o le malumalu, na la faafe-taiaia lenei luitau i le faatuatua, lea na taitaia i laua e latalata atili atu i le Faaola, i le fiafia, ma le filemu.

Taulimaina o Faanoanoaga

Sa feiloai ia Richard ma Ruta a o faigaluega i se kamupani gaosi simā i Azogues, o se nuu laitiiti i le atu Mauga o Andes e le mamao mai Cuenca, Ecuador. O Richard o se tagata na liliu mai i le Ekalesia, sa latou liliu mai ma lona tina ma lona uso i nai tausaga na muamua atu. I lena taimi, e lei auai ia Ruta i le ekalesia.

"Ina ua ou feiloai ia Ruta, sa le mafai ona ou tuua o ia," sa ia fai mai ai a o ataata.

Sa faaipoipo i la'ua i le 1996. I nai masina mulimuli ane, na maliu ai le tama o Ruta.

"O lona maliu na mafua ai se faavauvau matautia i lou olaga," sa faamatala mai e Ruta. "E le mafai ona aveesea mai lou mafaufau le maliu o se tasi e pele ia te oe. E te lagonaina pea le faanoanoa."

I le 2001, sa maliu ai le tina o Richard. Sa toe aumaia foi e lenei mea le faanoanoa tele. Peitai i le aluga o tausaga, ua amata ona malosi le malamalamama ma le molimau a Richard i le talalelei, ma sa saunia e lena mea se vaaiga toafimalie.

"Ona o le talalelei," sa ia fai mai ai, "sa ou malamalamama teisi ai i le tulaga o lo'u tina. Sa ou faasoa atu ia Ruta le Alema 40:11 ma faamalamalamama atu i ai le mea e tupu i le agaga pe a tuua le tino. Sa avea lena mea ma se faamafanafanaga sili mo i maua uma."

Faatauaina o le Faitalia

Ae peitai, e lei i ai pe a se naunau o Ruta i le Ekalesia, e ui sa ia fiafia i tagata o le Ekalesia faapea ma faifeautalai. "Ou te lei maua se lagona e tatau ona sui la'u lotu," sa ia fai mai ai.

Na filifili Richard e na te le faamalosia lea tulaga.

"O taimi uma lava ma te talanoa ai i le Ekalesia, e faaiu leaga lava se talanoaga," sa ia fai mai. "Ma pe a ou faamalosia



o ia, e le lelei le taunuuga. Ma o lea sa tuu ai loa. Ou te lei fia manao e fai lena mea ia te ia.”

I le tautoulu o le 2001, sa valaaulia ai e fai-faualalai ia Ruta i se sauniga o le papatisoga. O lana filifiliga e talia le valaaulia na suia ai mea uma.

I le taimi o le sauniga sa faasoa atu ai e le tamaitai sa papatiso lana molimau. “Sa ia talanoa e uiga i vavega na tutupu i lona olaga talu ona ia iloaina le Ekalesia—vavega o le soifua maloloina, soifua manuia, ma le malosi,” sa toe manatua ai e Ruta. “Sa nofo lava lenei tamaitai na o ia ae sa i ai ia te ia lenei molimau.”

Sa mafaufau Ruta pe faapefea e se tamaitai o le sa feagai ma ia ituaiga tofotofoga faigata ona maua lea ituaiga faatuatua. O lena fesili ma le taliaina o le valaauga e auai i le sauniga o le papatisoga na ootia ai le loto o Ruta ma saunia ai o ia ina ia maua se molimau mai le Agaga.

“O le taimi lena sa ou faia ai loa le faaiguia ina ia papatiso. Mulimuli ane, ina ua na o i maua ma Richard, sa ou fai atu, ‘Richard, o le a sou manatu pe a ou papatiso ia Tesema?’ Ma o le mea lena. Ua leva ona ou masani i le Ekalesia ma le talalelei. Ae sa manaomia pea ona ou faalogo i lesona mai faifeatalai.”

“E saunia e le Atua ia loto o tagata,” o le faaopoopo mai lea a Richard. “E mafai e i tatou lava ona faia nisi mea. Sa ou faia ni mea se tele, peitai ana le saunia lava Ruta e le tupu lenei mea.”

Na ioe Ruta: “Sa tele ni o’u luitau e foia ina ua ma faaipoipo. Ina ua uma ona foia na lui-tau, sa ou iloaina ai i lena taimi e le manaomia ona ou toe faatali mo se isi vavega i lo’u olaga. O le taimi lena sa ou saunia ai e papatiso.”

Fetaiai ma Luitau i le Faatuatua

O le papatisoga o Ruta ia Tesema 2001 na faailogaina ai se suiga i le mea e taulai atu i ai lo latou aiga. Na oo mai faatasi ma lena suiga le malosi faaleagaga ma faamanuiaga lea na taialaina i latou e oo mai i lenei aso.



"E maua le fiafia i le olaga faaleaiga pe a faavae i aoaoga a le Alii o lesu Keriso."

"O Le Aiga: O Se Folafolaga i le Lalolagi," *Liahona*, Nov. 2010, 129.

Luga: Richard ma Ruth Rodriguez ma le la fanau (mai le agavale): Maria Judith, Jorge, Richard Jr., ma Freddy. Sa faamauina i latou i le Malumalu o Guayaquil Ecuador (taumatau).

"Sa ma faamau i le malumalu i le aso 28 o Iuni, 2003," o le tala lea a Richard. "Ona o lena mea, ua tele faamanuiaga ua oo mai i o matou olaga. Sa faamau le ma fanau matutua e toalua ia i maua, a o le ma fanau e toalua na sosoo ai na fananau mai i totonu o le feagaiga. O se faamanuiaga le ma fanau."

Sa faamatalaina e Richard faapea o le auauna atu ma le faamaoni i le Eklesia ua aumaia ai le lotogatasi i totonu o lo matou aiga: "O loo ma amo faatasi ma le lotogatasi ma lou toalua. Sa ma fetaiai ma luitau ma tofotofoga, ae ua mafai ona ma manumalo faatasi mai ai. E tutusa mea ma te talitonu ai. O le faamauina i le malumalu, ua ma iloa ai afai ma te tumau ma le faamaoni, o le a fesoasoani mai le Alii ia i maua."



"O le fuafuaga paia o le fiafia, ua mafai ai ona faaaaua fegalegaleaiga faaleaiga i tala atu o le tuugamau. Ua mafai i sauniga paia ma feagaiga ua maua i malumalu paia ona toe foi atu ai tagata taitoatas i le afioaga o le Atua ma toe faatasia ai aiga e faavavau."

"O Le Aiga: O Se Folafolaga i le Lalolagi," *Liahona*, Nov. 2010, 129.

O Le Taulai atu i le Malumalu e Suia ai le Uarota

Ina ua papatiso Ruta, sa na o le 25 tagata o le ekalesia sa nonofo ai i le taimi lena sa avea ma Paranesi o Azogues. Ua avea nei ma se uarota, e tele lava a le 75 pe sili atu foi tagata o le au paia e auai i le sauniga faamanatuga.

“Tou te faamalolosia tagata taitoatasi pe a outou faamalolosia ia aiga,” o le tala lea a Ruta. “A o tausia e tagata o le ekalesia ia poloaiga ma faalogo i mea uma o aoao mai ai i tatou e taitai, ua tatou faamalolosia o tatou aiga ma le uarota. O aiga taitasi e pei o se vaega o le sima lea e taofia faatasi le uarota ina ia mafai ona tuputupu ae.”

A o avea ma se epikopo, sa uunaia ai e Richard ia taumafaiga e faamalolosia ia aiga e ala i le osia ma le tausiaina o feagaiga o le malumalu ma le tapuai soo i le malumalu. O se tasi o faataitaiga lea na faaalia ai lenei faamamafa, o malaga ia faalemalumalu a le uarota i le Malumalu o Guayaquil Ecuador, pe a ma le lima itula le mamao.

“Sa matou auai o se uarota i le tele o taimi sa matou mafai aia,” o le tala lea a Ruta. “O la matou sini o le faamauina lea o aiga uma i totonu o le malumalu.”

“O le auai atu i le malumalu ina ia faamauina na fesoasoani lea i le tuputupu ae faaleagaga o aiga,” o le faaopoopo mai lea a Richard. “Ua uma ona faamauina i tausaga talu ai nei ni nai aiga. Ma ua latou saunia i le taimi nei igoa o o latou lava aiga ma faatino ia sauniga mo o latou tuaa. O i latou o e ua atiina ae se tautinoga sili o le talalelei a Iesu Keriso ma ua mauaina le fiafia sili. Ua suia e le malumalu le vaaiga mamao a tagata o le ekalesia.”

O Le Taulai Atu i le Malumalu ua Suia ai Tagata Taitoatas

E ala atu i aafiaga paia ma le patino, ua maua ai e le aiga o Rodriguez se molimau mamana ma le faapitoa e uiga i feagaiga o le

malumalu ma le faatinoina o galuega sui mo augatuaa.

“Ua uma ona matou faatinoina le galuega mo uso ma tuafafine o lo'u tama,” sa fai mai ai Ruta. “Sa matou lagonaina e tatau ona matou faia e i matou lava le galuega mo o matou aiga. Ou te iloa o le galuega e fai ma sui lea matou te faia e moni. Ou te lagonaina le filemu sili i le galuega o loo matou faia mo o matou tuaa. O loo avea lenei mea ma se galuega sili ona faapitoa.”

Sa molimau mai Richard, “Ou te fiafia e fai galuega o le malumalu mo i latou o loo faatalitali mai. O le galuega lenei mo lo tatou olaga atoa. O le mea lenei tatou te mananao e fai.”

O le auai atu i le malumalu ua suia ai lo latou aiga. “Ina ua faamauina i matou i totonu o le malumalu, na tele ni mea na matuai suia,” o le tala lea a Ruta. “Sa faatupulaia lo matou malosi faaleagaga.”

E ioeina e Richard: “Mo lo matou aiga, ua faateleina ai le lotogatasi faaleaiga, i le iloina o le sootaga faaleaiga, o le taunuuga lava lea o le amataga ma le gataaga o mea uma, ma ua aumaia ai ia i matou le malosi e agai ai i luma. E i ai lava pea ia luitau i le olaga. Ae faatasi ai ma le taulaiga lea e aumai e le malumalu ia i tatou, ua mafai ai ona tatou fetaiai ma le lumainai i se auala e ese ai. O le mafai ona faasoa atu o nei faamanuiaga—ma aemaise lava ina ia fesoasoani ai i isi aiga ina ia faia foi faapena—ua aumaia ai le olioli tele i o tatou olaga. Ua ou lagona ai se tuuto sili atu i lo matou aiga.”

Na lagona e Richard o le faaiuga a le aiga e saunia e o i le malumalu, maua sauniga, ia faamau, ona toe foi atu lea e faatino ia galuega sui mo o latou tuaa ua avea ma se tasi o o latou faamanuiaga sili. “Afai tatou te faaaogaina le faatuatua ma talia le talalelei toefuataiina a Iesu Keriso aemaise lava pe a tatou o i le malumalu ina ia maua sauniga faamau ma sauniga faaola e ala i le perisitua, o le a sua olaga,” sa ia fai mai ai. “Ua le toe tutusa lava le tagata lea na maua ia feagaiga o le malumalu.” ■



FAI MA SUI

“I le vaevaega ofo-ofogia o foafoaga uma a le Atua, e i ai ‘mea e gaioi ma mea e faagaioi’ (2 Nifae 2:14). Ona o i tatou o fanau a lo tatou Tama Faalelagi, ua faamanuiaina i tatou i le meaalofa o le faitalia e filifili ai le mea tonu, o le malosi ma le mana o le faatinoga tutoatasi. I le faamanuiaina ai o i tatou i le faitalia, ua avea ai i tatou ma sui, ma o le mea muamua lava e tatau ona tatou galulue ae le o le tau galueaiina—aemaise lava a'o tatou ‘saili i le aoaoina . . . e ala i le suesue ma le faatuatua foi’ (MF&F 88:118).”

Elder David A. Bednar o le Korama a Apostolo e Toasefuliu, “Ia Mataala Pea ma le Maelega Atoatoa,” Liahona, Me 2010, 42.

OLE AUALA e Ola ai Soo o Keriso I TAIMI O TAU ma Fetauaiga

*E fesoasoani
ia i tatou ia
mataupu faa-
vae mai le Tusi
a Mamona ina
ia tatou ola ai
ma le faatua-
tua ma le faa-
moemoe i taimi
faigata.*



Luga: Sa onosaia lava e Nifae le saisiina o ia mo aso e fa seia oo ina salamo Lamana ma Lemuelu ma tatalaina o ia (tagai i le 1 Nifae 18:9–21). Taumatau: E lei i ai ma se tasi o le autau o alii talavou e 2,000 a Helamana na fasiotia i le taua (tagai i le Alema 56:44–57).

Saunia e David Brent Marsh

Matagaluega a le Au Perisitua

Ua tatou ola i se vaitaimi o loo malosi ai taua ma fetauaiga. O loo lipotia mai e talafou le tutupu o nei mea mataga i aso uma. Sa saunoa mai le perofeta a le Alii o, Peresitene Thomas S. Monson, “Ua tatou o mai i le lalolagi i taimi faigata.”¹ Ua ia toe faamaonia le saunoaga a Peresitene Gordon B. Hinckley (1910–2008): “Ua tatou ola i se vaitau ua faia ai e ē faasaua mea matautia ma le mataga. Ua tatou ola i se vaitau o taua.”²

A o mafaufau loloto ai, e le o se mea e tatau ona faateia ai. Ua aoao mai e tusitusiga paia faapea i aso mulimuli o le a alu atu Satani e “tau le taua” (Faaaliga 12:17) ma ē faamaoni ma o le a “aveesea ai le filemu mai le lalolagi” (MF&F 1:35).

Na muai silafia e le Atua o tatou aso ma valaau atu ai i le Perofeta o Iosefa Samita ina ia aumai le Tusi a Mamona e fesoasoani ia i tatou (tagai i le MF&F 1:17, 29; 45:26). Mai le 239 mataupu o le Tusi a Mamona, e 174 (73 pasene) e faatatau lava i taua, sauaga, fasioti tagata, taupulepulega faapolokiki, faapotopotoga faalilolilo, taufaamatau, vaega faalilolilo faaleaiga, ma isi tulaga faatupu faalavelave.


Aisea na faamaumau ai e le au tusitala o le Tusi a Mamona le tele o taua na tutupu? O le

tali a Peresitene Ezra Taft Benson (1899–1994), “Tatou te iloa mai le Tusi a Mamona le auala e ola ai soo o Keriso i taimi o taua.”³ O nisi nei o tala e mafai ona avea ma taiala mo i tatou a o tatou ola ai i taimi faigata.

O Le Usiusitai e Valaaulia ai le Laveaiga

O le tele o taimi i le Tusi a Mamona, e laveai e le Alii Ona soo pe a latou usiusitai i Ana poloaiga.⁴ Sa aoao mai Nifae, “O le alofa mutimutivale agamalu o le Alii i luga o i latou uma o e ua ia filifilia, ona o lo latou faatuatua, e faamalolosi tele ai i latou e oo lava i le mana e laveaiina ai” (1 Nifae 1:20). Sa faamaumauna e Nifae le auala na laveai ai e le Alii lona tama mai tagata na taumafai e fasiotia o ia, laveaiina lona aiga mai le faafanoga o Ierusalema, laveaiina mai o ia mai taumafaiga a ona uso ma Lapana e fasioti o ia, ma le laveaiina mai o ia ina ua liliu atu Lamana ma Lemuelu i le faasaua (tagai i le 1 Nifae 2:1–3; 3:28–30; 4; 7:16–19; 18:9–23).

Sa tau atu e Alema i lona atalii o Sepulona, “Ou te manao ia e manatua, afai e te tuu atu lou faalagolago i le Atua seia faapea ona tele, o le a ia laveaiina oe i fafo mai ou tofotofoga, ma ou faalavelave, ma ou puapuaga” (Alema 38:5). Na matauina foi e Mamona faapea “o i latou o e sa faamaoni i le tausiga o poloaiga a le Alii sa laveaiina i taimi uma”



I le Tusi a Mamona e
tele taimi sa laveaiiina
ai e le Alii Ona soo pe
a latou usiusitai i Ana
poloaiga.



O LE A PUIPUIA I TATOU E LE ATUA

"O le a faatasi le Atua ma i tatou. O le a la tausia i tatou. O lea la puipuia i tatou . . . pe afai tatou te faamaoni ma faatuatua ma usiusitai ma faalogo i Lana afioga."

Peresitene Gordon B. Hinckley (1910–2008), "God Will Protect Us in These Perilous Times," *Church News*, 22 Feb., 2003, 3.

(Alema 50:22). Sa toe faamaonia mai e Elder Russell M. Nelson o le Korama a Apostolo e Toasefululua lenei mataupu faavae ina ua ia fai mai: "O le usiusitai e mafai ai ona tafe mai faamanuiaiga a le Atua e aunoa ma le tau taofiofia. O le a Ia faamanuiaina Ana fanau usiusitai i le saoloto mai le saisaitia ma le faanoanoa."⁵

O loo faailoa mai foi i le Tusi a Mamona e oo lava i nai tagata amiontu e mafai ona faamautinoa ai le filemu ma le saogalemu o se aai atoa (tagai i le Helamana 13:12–14).


E Mafai ona Avea le Taua ma se Valaau ina ia Salamo

Pe a tatou faagaloina le Atua, e Na te valaau mai ia i tatou. O le taimi muamua e Na te faaaoga ai ia auala alofa mutimutivale e pei o musumusuga patino ma perofeta. Peitai afai tatou te le tali atu, o le a Ia faateleina Ana taumafaiga. E i ai taimi, o le a Ia faatagaina ai taua ma fetauaiga e avea ma Ana taumafaiga mulimuli ina ia fesoasoani ai ia i tatou e toe foi atu ia te Ia.⁶


Na fai mai Mamona, "Ma ua faapea ona tatou vaai ai vagana ai ua aoaiina e le Alii ona tagata i puapuaga e tele, ioe, vagana ai ua asiasi mai o ia ia te i latou i le otu ma le faafefe, ma le oge ma faamai uiga eseese uma, latou te le manatua o ia" (Helamana 12:3). E mafai ona avea taua o se faamanatu mai ina ia salamo ma toe foi atu i le Atua.

E Saunia e le Atua ia Toomaga i taimi o Taua

Pe a manaomia ona mafatia ia soo o le Atua i aafia o taua, e saunia e le Atua toomaga mo i latou. Ina ua ave faatagataotaua ia Alema ma e na mulimuli ia te ia, sa vave ona latou liliu atu i le Alii (tagai i le Mosaea 23:27–28), ma sa vave ona Ia tali mai: "Ma o le a Ou faamainai afoi avega ua tuu i o outou tau'au, e oo ia te outou tou te le lagonaina i latou i luga o o outou tua, ao outou i ai lava i le pologa; . . . ina ia mafai ona outou iloa ma le mautinoa o A'u, o le Alii le Atua, e asiasi atu i o'u tagata



O nisi o soo, faapei o Apinati (o loo faaalia i luga faapea foi i lalo), sa tofia e puapuagatia pe otu ina ia tu o se molimau e faasaga i tagata amioleaga.



i o latou puapuaga” (Mosaea 24:13–14).

Sa faamatala e Iakopo ē e loto mama o ona aso, “Ia outou tepa taulai atu i le Atua ma le mausali o le mafaufau, ma tatalo atu ia te ia ma le faatuatua tele, ma o le a ia faamafanafanaina outou i o outou puapuaga, ma o le a ia aioia a outou tagi, ma auina ifo faasalaga i luga o i latou o e latou te saili lo outou faafanoga” (Iakopo 3:1).

Ua faamautinoa mai e perofeta o nei ona po lenei upumoni. Sa aoao mai Elder Joseph B. Wirthlin (1917–2008) o le Korama a Aposetolo e Toasefululua, “E ui atonu e le faalavelave mai pea le [Atua] i le aluga o mea e tutupu, ae ua Ia folafolaina mai le filemu moni e oo lava i taimi o tofotofoga ma faigata.”⁷

Sa saunoa mai Peresitene Benson, “E tusa lava pe oo mai taimi e le saogalemu ai, . . . afai tatou te faalagolago atu i le Atua ma tausi ana poloaiga e le tatau ona tatou matatau.”⁸

Ua Valaauna Nisi e Tutu o ni Molimau e tetee atu i le Amioleaga

E ui e mafai ona laveaiina mai soo o Keriso mai taua, ae e i ai nisi o soo ua valaauna ina ia puapuagatia pe feoti foi ina ia avea ma ni molimau e faasaga i le amioleaga. O se faiga faasaua moni lenei e faigata ona taliaina pe malamalama foi i ai. Ua toe faamanatu mai ia i tatou e Elder Neal A. Maxwell (1926–2004) o le Korama a Aposetolo e Toasefululua faapea “e le faapea o le a puipua atoatoa mai ē faamaoni mai mea e tutupu i lenei paneta.”⁹ Ua faailoa mai e Peresitene Hinckley faapea o nisi o i tatou “e mafai ona valaauna ina ia puapuagatia.”¹⁰

Na faasaoina i le Tusi a Mamona ni nai mea na tutupu o sauaga le alolofa ma mataga ina ia fesoasoani ia i tatou ia malamalama pe aisea e mafatia ai ma feoti i taua i nisi o taimi ia soo o le Alii, e aofia ai perofeta faapea foi ma fafine ma tamaiti ta’umamaina. Mo se faataitaiga, sa saisai e ositaulaga amioleaga a le Tupu o Noa le perofeta o Apinati “ma susunu lona tino i fusi laau, ioe, seja oti.” A o lei oti Apinati sa ia molimau atu, “Afaia tou te fasiotia a’u, o le a

outou faamasaina se toto lē sala, ma o le a tu foi lea o se molimau faasaga ia te outou i le aso gataaga” (Mosaea 17:10, 13).

O se isi faiga faasaua fasioti tagata lea na tupu i totonus o le Tusi a Mamona, o le taimi lea na susunuina ai e loia ma faamasino amioleaga o le nuu o Amonaea ia fafine ma tamaiti o e na liliu mai faalelotu. Sa ave Alema ma Amoleka i le mea sa faamaturo ai tagata, ina ia vaai i lenei faaumatiaga le alofa.

“Ma ina ua vaai atu Amoleka i tiga o fafine ma fanau o e na susunu i le afi, sa tiga foi o ia; ma sa ia fai atu ia Alema: E mafai faapefea ona ta vaai atu i lenei vaaiga leaga matautia? O lea, ia ta faaloaloa atu o ta lima, ma faaaoga le mana o le Atua lea ua ia te i taua, ma laveai i latou mai apeafi mumu.”

Sa tali atu Alema, “Ua taofia au e le Agaga ia aua nei ou faaloaloa atu lo’u lima; aua faautua ua aveina ae i latou e le Alii ia te ia lava, i le mamalu; ma ua ia tuuina ia mafai ona latou faia lenei mea, pe ia mafai e tagata ona faia lenei mea ia te i latou, e tusa ma le maaa o o latou loto, ina ia tonu faamasinoga o le a ia faia i luga o i latou i lona toasa; ma o le a tutu mai toto o e ua mama o se molimau e faasaga ia te i latou i le aso gataaga” (Alema 14:10–11).


O Tagata Amiontonu O E Maliliu i Taua e Ulu Atu i le Malologa o le Alii

A o tatou faavauvau i le maliu o se tagata faamaoni e pele ia i tatou, o loo faamautinoa mai e le Tusi a Mamona faapea ua latou ulu atu i le malologa o le Alii ma o loo fiafia. Na tuuina mai faapitoa lava manatu o Moronae e uiga i lenei autu, “Ona e tuu e le Alii e amiontonu ia fasiotia, ina ia mafai ona oo mai o lona faamasintonu ma lana faamasinoga i luga o e amioleaga; o lea e le tatau ai ona outou manatu faapea ua malaia e amiontonu ona ua fasiotia i latou; ae faauta, latou te ulu atu i le malologa o le Alii lo latou Atua” (Alema 60:13).

Ina ua mavae se taua lea na taatitia ai “tino o le tele o afe o tagata . . . ua palanai i faupuega i luga o le eleele,” e aofia ai nisi o le au soo faamaoni o Keriso, sa faamaumauina i le



*Sa vaai ia Eteru (luga)
ma Moronae (itulau e
34) i le faaumatiaga o
o laua nuu ona o le taua
(tagai i le Eteru 13:13–14;
Moronae 1:1–4).*



AISEA E TUTUPU AI TAU A MA FETAUAIAGA?

Tusi a Mamona faapea o tagata na sao mai “sa faanoanoa moni i le toesea o tagata o o latou aiga, peitai sa latou olioli ma fiafia i le faamoe-moe, ma e oo lava i lo latou mautinoa, e tusa ma folafolaga a le Alii, e faatutu mai i latou e mau i le itu taumatau o le Atua, i se tulaga o le fiafia e le gata” (Alema 28:11–12).

O Le Alii o le Filemu

Na aumai le Tusi a Mamona ina ia faamanuiaina ai i latou o e o ola i taimi o taua ma fetauaiga. O mea na tutupu ma aoaoga o loo faamaumauina i totonu o lenei tusi o loo laualuga ai le faamoemoe, tuuina atu o le faamafanafanaga, ma saunia ni vaaiga faalelagi. Ua tatou aoaoina o le usiusitai i le Atua e laveaiina mai ai le toatele, o taua e mafai ona avea ma se valaau e toe foi atu ai i le Atua, ma e saunia e le Atua ia toomaga mo Ona soo o e manaomia ona mafatia. Ua tatou aoaoina foi o e amiotonu ua valaauna e maliliu i taimi o taua po o fetauaiga o le a tutu o ni molimau e faasagatau i tagata amioleaga ma o le a ulu atu nei soo i le malologa o le Alii.

Ma le mea mulimuli, ua aoaoina i tatou e le Tusi a Mamona i le auala e mafai ai e soo o Keriso ona maua le filemu i o latou loto, aiga, faapea ma malo. O se meafaigaluega sili ona taua e aumai ai i tatou ia Iesu Keriso, le Alii o le Filemu. ■

FAAMATALAGA

1. Thomas S. Monson, “Mano o le Perisitua,” *Liahona*, Me 2011, 66.
2. Gordon B. Hinckley, “Ola i le Atoatoaga o Taimi,” *Liahona*, Ian. 2002, 6.
3. Ezra Taft Benson, “O Le Tusi a Mamona—o le Maa ‘Au’au o la Tatou Tapuaiga,” *Liahona*, Ian. 1987, 8.
4. E le ititi ifo ma le 56 o mau i le Tusi a Mamona o loo aoao mai ai le auala na laveaiina ai e le Alii ia tagata mai taua ma isi tulaga matautia.
5. Russell M. Nelson, “Faasaga Atu ma le Faatuatua i le Lumanai,” *Liahona*, Me 2011, 34–35.
6. E le ititi ifo ma le 35 mau, e aofia ai le 11 i totonu o le Tusi a Mamona, lea o loo aoao mai ai le faatagaina e le Alii o taua ma faalavelave faalenatura e fesoasoani ia i tatou ia manatua ai o Ia.
7. Joseph B. Wirthlin, “Sailiina o se Uafu Saogalemu,” *Liahona*, Julai 2000, 71.
8. Ezra Taft Benson, i le Conference Report, Oke. 1950, 146.
9. Neal A. Maxwell, “Ia Fusi I Aao o Lona Alofa,” *Liahona*, Nov. 2002, 17.
10. Gordon B. Hinckley, “O Taimi o Loo Tatou Ola Ai,” *Liahona*, Ian. 2002, 86.

O loo molimau faapitoa mai ma le manino le Tusi a Mamona faapea e oo mai taua ona o le amioleaga. Pe o le sailia e tagata amioletonu le malosi e pulea ai isi po o le faatagaina foi e tagatanuu le amioleaga e tuputupu ae ai ma le le taofiofia, o le taunuuga lava o taua, fefinuaiga, ma fetauaiga.

PE A SAILIA E TAGATA AMIOLETONU LE MALOSI PO O LE PULE

Sa faiaina Amalekia i se faiga palota sa tumu i fevesiaiga ae sa sao ona fai, peitai sa ia le fia toilalo i lona manao e avea ma tupu. Sa ia faatauanauina i latou sa lagolagoina o ia ina ia faapaiaina pea o ia e avea ma tupu. Ona ia poloaiina lea o tagata fou ua i lalo o lana puleaga e o atu e tau ma faaumatia le Eklesia a le Atua ma aumai ia tagata i lalo o lana puleaga. E afe ma afe i latou na mafatia i fetauaiga sa le tatau ona tupu ona o se tagata e toatasia sa manao e pulea isi. (Tagai i le Alema 2.)

Sa faaosoina e Sera’emina, o se taitaiau sa Lamana, loto o ona tagata ina ia faasagatau i tagata sa Nifae ma aumai i latou i le pologa. Sa tupu mai ai se taua, ma sa le mafai ona faitauina o latou tagata oti ona o le tele naua o le aofai o le numera. (Tagai i le Alema 43:6–8, 37; 44:21.)

Sa faaaogaina e Amalekia, o se tagata e tetee ia sa Nifae, le taufaasee, fetauaiga, faapea ma taua i lona sailiga o le pule mo ia lava. Sa ia aumaia tagata sa Nifae i le pologa, ma sa latou mafatia i taua ma fetauaiga mo le isi lima tausaga na sosoo ai. (Tagai i le Alema 46–48.)

PE A FAATAGAINA E TAGATANUU LE FAATUPULAIA O LE AMIOLEAGA

Sa aoao mai e Nifae faapea sa “faaumatia (se vaega o tagata eseese) mai lea tupulaga i lea tupulaga e tusa ma a latou amioletonu” (2 Nifae 25:9). Sa faamautinoa atu e le Taitaiau o Moronae i lona nuu o le a le faaumatiaina i latou vagana ai ua latou aumaia i o latou luga e ala ia latou lava solitulafono (tagai i le Alema 46:18). Sa tusia e Mamona faapea, “Ona o misa ma finauga a [tagata sa Nifae], ioe, a latou fasiotiga tagata, ma a latou vetega, lo latou ifo i tupua, a latou faiataaga, ma lo latou fai mea inosia, sa i ai i totonu o i latou lava, na aumai ai i luga o i latou a latou taua ma o latou faafanoga” (Alema 50:21).

OLE A OO MAI LE SELESELEGA

Saunia e Michael R. Morris

Mekasini a le Ekalesia

Mo Oscar Filippioni ma lona aiga, o le ola ai mai le laueelele e lei faigo-fie. O matagi, mūgālā, faaleagaina o masini, faaletonu o fefaatauaiga i maketi, ma isi luitau ia na foliga mai i nisi taimi sa taupulepule e faasagatau mai i taumafaiga sili a le aiga.

“O aso uma lava i le *chacra*—i lo matou fanua—e tatau ona matou saili i musumusuga ma faaliga ina ia mafai ai ona matou ola i mea ua maua mai i le laueelele,” o le tala lea a Oscar, o le e galueaiina se faatoaga e 100 eka (40 ha) i le vaega Maualalo o le Chubut River Valley, o loo i ai i le Itumalo i saute o Chubut Atenitina. “O aso uma lava e oo mai ai luitau.”

O se tasi o luitau sili o le aiga a Filippioni o le leiloa lea po o afea o le a fua mai ai a latou taumafaiga lē faavaivai. Peitai, ua latou iloa o le a faamanuaaina lava a latou galuega faigata ma le maelega i le iuga.

“O le galueaiina o le laueelele e le faapea o le a tauia ai au taumafaiga i se tulaga faaleaso pe faalevaiaso foi,” o le faamalamalama mai lea a Oscar. “Matou te galulue i aso uma vagana ai le Aso Sa—i vайасо uma, masina uma—e aunoa ma le vaai atu i se taui tautupe, ma o lea e tatau ai ona matou faatulagaina ni fuafuaga faaletamaoiga.

ATA O LE AIGA NA PUEINA E MICHAEL R. MORRIS

Sa iloa e le aiga o Filippioni o le tulafono o le seleselega—i le faaletino faapea ma le faale-agaga—e manaomia le maelega, onosai, faapea ma le tatalo.





E le iloa i taimi uma e Oscar Filippioni ma lona aiga po o afea o le a fua mai ai a latou taumafaiga lē faavai-vai. Peitai, ua latou iloa o le a faamanu-iaina lava a latou galuega faigata ma le maelega i le iuga.

O nisi taimi e faitau masina pe tausaga foi e faatalitali ai mo ni fua o a matou galuega. E tatau ona tatou manatuaina pea o le galuega o loo tatou faia i le taimi nei o le a seleselaina i se taimi mulimuli ane."

Faatasi ai ma lona toalua o, Liliana, ma le toalua o le la fanau o, Daniel ma María Céleste, o loo totoina e Oscar le vaofalī ma tausia ni lafumanu.

"O nisi taimi e i ai a matou tupe, ma o nisi foi taimi e leai ni tupe ona o loo faaaoga e faagaoioia ai le faatoaga," o lana tala mai lea. "O nisi taimi e leaga ai a matou masini. O nisi taimi e le taulia ai a matou manu pe a oo i le taimi ua tatau ai ona faatau atu. Ae a matou mafaufau loloto ma tatalo, tumau i le onosai, ma taofimau i le faamoemoe, i totonu o se aso pe lua foi o le a oo mai se vaifofo lava ia. O le a sau se tasi ma fai mai, 'Che,¹ e i ai ni au manu e fia faatau?' E lelei a mea uma, ma matou te agai pea i luma. E faigata le galueaiina o le laueelele, peitai o loo tausia pea i matou e ala i a matou taumafaiga i aso taitasi.

Nofoaga e avea ma Faasinoala

Fai mai Tanielu o le galueaiina o le laueelele ua ia maua ai ni avanoa i aso taitasi e toe manatunatu ai i faamanuiaga ma luitau mai se vaaiga faaletalalelei. "O se faamanuiaga le talanoa ma le Alii ma gauai atu i unaiga a le Agaga e aunoa ma ni mea faalavefau mai le pisapisao po o musika po o ni faasalalauga," sa ia fai mai ai e uiga i le galueaiina o le laueelele.

"E faigofie le avea ai ma se tagata o le Ekalesia i le nofo ai i se nofoaga faapenei ma siosiomia e e pele faatasai ai ma le siosiomaga faalenatura," o le faaopoopo mai lea a Liliana. "E fesoasoani lea ia te au ina ia ou manatua ai o loo tatou faalagolago atu i le Alii ma o mea uma ua tatou maua e mai ia te Ia. E toeitiiti lava o mea uma tatou te faia iinei e atagia mai ai nisi o mataupu faavae o le talalelei. E sau lava Oscar ia i le fale i taimi uma ma se manatu lelei mai le galue ai i le faatoaga po o le tausiga o manu."

Pe a suaina e Oscar le palapala, mo se faataitaiga, e na te filifilia se nofoaga e avea ma se faasinoala e pei o se laau po o se maa i se

mea mamao ina ia mafai ona fesoasoani ia te ia ina ia sa'o le laina o loo ia suaina. "E le afaina pe afai o loo i ai ni mea o loo faalavelave



PE A FAAPALENI E LE ALII ANA TUSI

"Sa i ai ni faifaatoaga sa sosoo a laua faatoaga. E le galue le isi i lona fanua i Aso Sa, ma sa masani ona faitio i ai lona tuaoi. Sa ia fai atu, 'E le o tutusa le lelei o fua o lau faatoaga ma a'u. Aisea e te le galue ai i Aso Sa?'

Sa fai atu le isi faifaatoaga, "la, ou te fia manao e fai le mea ua fetalai mai ai le Alii. Ou te fia manao e maua ia faamanuiaga a le Alii. '

"Ona oo lea i se tasi aso o Oketopa sa la tutu ai i le pa. Ona fai mai lea o le [tuaoi], 'Vaai la i ai. Vaai i la'u faatoaga. E matagofie, e uumi ia saga, e tele ulu saga i saito, ma e foliga mai lau faatoaga e le o lelei le vaaiga. E le o lelei le vaaiga o lau faatoaga e pei o le vaaiga o la'u faatoaga. Vaai i fua o la'u faatoaga e faatususa ia oe. O le a la se mea e te tau maia i le taimi nei e uiga i faamanuiaga lea na e manatu o loo e galue ai?'

"Sa mafaufau le faifaatoaga lea e [tausia le Sapati] mo ni nai minute ma faapea atu, 'E le faapaleniiina e le Alii ana tusi ia Oketopa' "

Peresitene Boyd K. Packer, Peresitene o le Korama a Apostolo e Toasefululu, Mine Errand from the Lord (2008), 193.

i le auala,” o le tala lea a Liliana. “E le mafai ona ia aluese mai lona ala aua e na te fia manao ina ia sasa’o ia laina.”

Sa faaopoopo mai Oscar, “Afai ou te tilotilo i tua i le laina sa ou sau ai, o le a ou aluese ai mai le ala. Ma o lea ou te taulai atu ai pea i le nofoaga o loo avea ma faasinoala ma agai ai pea i luma.”

E pei ona i ai i le *chacra*, o lana tala lea, e faapena foi i le Ekalesia. “Ina ia tumau ai pea i le ala i o tatou olaga, e tatau ona tatou vaai atu i le Alii, faitau ia tusitusiga paia, ma tausi ia poloaiga. Afai tatou te faatagaina ni mea e faalavelave ia i tatou lava, o le a le mafai ona tatou iloa atu ia nofoaga o loo avea ma faasinoala ma o le a piopio o tatou auala.”

O Se Seleselega Faaleagaga

E auai le au Filippioni i se paranesi o le Ekalesia e latalata i Gaiman. O lenei aai e toa 6,000 tagata, sa nofoia e tagata sa malaga mai i Uelese i le vaitau o le 1870, sa tele ni avanoa na maua e tagata o le paranesi e faasusulu atu ai lo latou malamalamama. “Sa ao ona avea lava i matou ma tagata sili atu ona o loo vaavaai mai pea tagata ia i matou,” o le tala lea a Liliana.

O le taumafai ina ia i ai se naunau o tagata i le talalelei e mafai ona avea ma se faagasologa alulu lemu. E pei foi o le tulafono faaletino o le seleselega, o le tulafono faaleagaga o le seleselega e manaomia ai foi le onosai. Ae ona o le ola ai pea e le aunoa o le aiga i mataupu faavae o le talalelei, ua mafai ai ona iloa ma faaaloalo ia tagata i o latou tulaga faatonuina o le Au Paia o Aso e Gata Ai.

O le taimi muamua, sa faigaluega ai ia Oscar i le malo, sa ia le talaina pea le kofe, lauti, ma le ava malosi. “Ina ua mavae ni nai tausaga,” sa ia fai mai ai, “sa amata ona malamalamama ma lagolagoina o ia e ana uo faigaluega ma latou faapea mai, ‘O le a se ituaiga vaiinu e te fia manao ai?’ O nisi taimi sa oo lava ina latou fia malamalamama i le Ekalesia. O le seleselega lena.”

O le nofoaga o loo matuai tele ai lava le seleselega faaleagaga o le aoaoina ma le ola ai i mataupu faavae o le talalelei, o totonus lea o le aiga lava ia.

Ua oo mai le seleselega e ala mai i faamanuiaga o le auaunaga a Oscar o se peteriaka i le Siteki a Trelew Atenitina i Matu, mai le auaunaga a Liliana o se peresitene o le Aualofa o le paranesi, ma mai isi auaunaga faaopoopo na tuuina atu i le anoanoai o isi valaauga o tagata o le aiga sa faataunuina i le aluga o tausaga.

Na oo mai le seleselega mai le tausiaina o le paia o le aso Sapati ma e ala i le tausia o le tulafono o le sefuluai. “E toina moni mai lava ia pupuni o le lagi—a le o le taimi nei lava, ia e auala mai i se faagasologa o le usiusitai faifapea,” o le tala lea a Oscar.



Ua oo mai le seleselega i le faauuga o le fanau uma a le au Filippioni mai le aoga maualuga faatasi ai ma atalii uma e toafa ua maea mai a latou misiona. O a latou aoga ma auaunaga faafaifeautalai ua latou maua ai ni avanoa faigaluega ma faaletaitai lea semanu latou te le mauaina mai se isi lava mea.

Ua oo mai le seleselega i fesili ia na maua e María Céleste mai ana uo o e na fia malamalamama i auaunaga faafaifeautalai faamisiona a ona tuagane, i ona talitonuga faalelotu, ma pe aisea e le fia alu ai o ia i pati lea e tuai ona amata i po o Aso Toonai.

Ma ua oo mai le seleselega mai musumusuga ma unaiga toafilemu a le Agaga Paia, lea na fesoasoani i le taofia ai o le aiga mai se faalavelave i le tuneva o se tasi po ina ua latou manatu ua talepe e tagata lo latou fale. Sa ala ae i luga ia Tanielu ina ua ia faalogoina se pa’o ma sa sauni e puipui le fale, ae peitai o le tagata lea na faapea o se gaoi o le tuaoi lea na sau e fia maua se fesoasoani ua leaga lana taavale.

“Sa ou iloa le faatoofilemuina o a’u e le Agaga ina ia mafai ona ou foiaina le faafitauli e ala i lou le soona vevesi vale,” o le tala lea a Tanielu. “Ina ua mavae lena mea sa matou tatalo ma faafetai atu i le Tama Faalelagi e le’i i ai se mea leaga na tupu.”

Afai tatou te tuuina atu ma le faamaoni i tatou lava i le Atua, sa fai mai ai tagata o le aiga o le au Filippioni, o le a Ia faamanuiaina i tatou i o tatou manaoga ma o le a avea i tatou ma meafaigaluega i Ona aao. O se faagasologa e manaomia ai le maelega, onosai, faapea ma le tatalo. E manaomia ai foi le tele o le faatuatua ma galuguega. Peitai o le a oo mai lava le seleselega, i le taimi a le Alii lava ia. ■

FAAMATALAGA

1. O se faaupuga e masani ona faaaogaina i Atenitina o lona uiga o le “uo,” “paaga,” po o le “soa.”



O le afiafi muamua na ou toe foi ai i le galuega, na ou tatalaina ai lau i-meli. Na i ai i le lisi o au i-meli se feau mai ia Brady. Na ia auina mai i le taeao o le Aso Lua, a o lei tupu le osofaiga.

NA IA AUMAIA IA TE AU LE FILEMU

Sa avea lou uso o Brady o se peresitene pule faataitai e galue i totonus o le neivi i le US Pentagon ina ua tulai mai osofaiga o le aso 11 o Setema, 2001. Sa ou galue i Idaho, ISA, i le taimi lea, ma ina ua ou vaai i tala fou i lena taeao e uiga i le mea ua tupu, na ou valaau i lou pule e faailoa atu ia te ia o le a ou le sau e faigaluga mo ni nai aso.

Sa potopoto nai tagata o lou aiga i Uosigitone, T.C., i se potu tele faafafia i se faletalimalo na saunia e taitai o le malo e avea o se potu fono, e mafai ai ona latou faaaauauna le tuuina mai o taumafaiga laveai. Sa matou faatalitali mai lea aso i lea aso i le fia iloa pe na i ai Brady i e na aafia sua. O le lagona na i ai i lena siosiomaga o se lagona o le faanoanoa le mafuatia ma le leai o se faamoemoe. Ae ui i lea na fusia faatasi lo matou aiga ma tatalopo o le a lava le mea e tupu, o le a le mavae lava lo matou faatuatua.

Toeitiiti lava atoa le vайaso talu ona mavae osofaiga, i le aso 17 o Setema,

ae matou maua loa le faamaoniga ua maliu Brady.

Ou te lei iloa lava pe na ou fesili faapea, "Aisea ua tupu ai ia te au?" Ae na mautinoa lava lou fesili, "Aisea [ua tupu ai ia te] *ia?*" Mai lava i lou laitiiti, na ou alofa, faamemelo, ma manao ia avea au faapei lava o Brady. Sa ou taumanatunatu foi, "Aisea ua tupu ai i le taimi *nei?*" Sa fuafua Brady mo ni nai vайaso, e malaga i Idaho e mafuta ma lona aiga. Na fuafua o ia e sau i le Aso Tof, aso 13 o Setema, e lua aso ae maliu.

O le afiafi muamua na ou toe foi ai i le galuega ina ua ou foi mai i Idaho, na ou tatalaina ai lau i-meli o le galuega, lea ou te le'i tatalaina lava talu mai le Aso 10 o Setema. Na i ai i lau lisi o meli se feau mai ia Brady. Na ia auina mai i le taeao o le Aso Lua, a o lei tupu le osofaiga. Na ia talanoa mai e uiga i la matou faatasiga ma mea malie uma na matou fuafuaina. Ina ua fauma lana i-meli, na ia tusia le upu, "Filemu."

E le masani ona fauma faapena ia

i-meli a Brady, ae ou te manatu i lena mea o le alofa mutimutivale o le Alii na ia tusia ai. Ou te le manatu na iloa e Brady le mea o le a tupu, ae ou te fiafia i ana upu mulimuli—o lana upu mulimuli—ia te au o le *filemu*.

E oo mai lava i le taimi nei, ua sili atu ma le sefulu tausaga talu ai, ou te toe faitauina ai lava mai lea taimi i lea taimi lena i-meli. O taimi uma lava ou te faitau ai, e faamanatu mai ai ia te au e ala mai i le talalelei e mafai ai ona tatou maua le filemu lea na folafola mai e le Faaola: "Ou te tuu atu ia te outou le [filemu], o lo'u [filemu] ou te avatu ai ia te outou: ou te le avatu ia te outou faapei ona avatu e le lalolagi. "Aua le atuatuvalo o outou loto, aua foi tou te matatau" (Ioane 14:27).

E moni lava o loo ou misia lava Brady, ae ona o le talalelei, e le mafai ona mavae lou faatuatua i lenei tofotofoga. E ala mai i le fesoasoani a le Faaola, ua mafai ai ona ou agai i lumma le faamoemoe ma le filemu. ■
Carson Howell, luta, ISA

FESILI I LE MAMONA

O alii talavou uma lava ua silia ma le 18 tausaga i Finelani e manao-mia le auauna atu i le militeli mo le 6 i le 12 masina. Ina ua amata la'u auau-naga moomia, na ou iloa ai o manatu ma uiga faaalia o le tele lava o au paaga fitafita e feteenai ma au mata-upu faavae. O le taunuuga, na ou faia ni laasaga ina ia tumau ai le latalata i le Agaga, tatalo e le itiiti ifo i le faalua i le aso ma le faitauina o tusitusiga paia.

Na ou lagona le fefe i le taimi mu-mua aua ou te le iloa po o a uiga o le a faaalia mai e au paaga, ae na foliga mai latou te lei popole, ma na ou mafanafana. Ina ua mavae sina taimi na fesili mai au uo i le potu po o le a le mea o loo ou faitauina. "O le Tusi a Mamona," na ou tau sao atu ia i latou. O le isi a latou fesili, ioe, pe o au o se Au Paia o Aso e Gata ai. Na ou tau atu ia te i latou o lea lava, ma na latou faagaloina le mataupu mo sina taimi.

Na oo mai le taimi na amata ona fesili mai nisi o au paaga fitafita e uiga i le Tusi a Mamona—pe mai fea, anotusi, ma faaaauai ai lava. Mulimuli ane ua faasolo mai a latou fesili mai le faamoemoega o le olaga agai i mataupu faavae o le Ekalesia. Na avea lau lotu ma vaega masani o a matou talanoaga, ma na oso mai toeitiiti lava i soo se tulaga.

O se tasi o alii i le moega tuaoi na fesili mai pe mafai ona ia faitau i lau Tusi a Mamona. Ioe, na ou fai atu ai. I se tasi taimi, ina ua foi mai se tasi ma te potu mai se falelauasiga o se uo, na fai mai ia te au na avea le falelauasiga ma mea na faaosofia ai le tele o fesili i lona mafaufau e uiga i le olaga ma lona faamoemoega. Na ia fesili mai ia te au po o le a le talitonuga o le Ekalesia e uiga i na mea. Na umi se ma talanoaga

e uiga i le faamoemoega o le olaga, le Togiola, le Foafoaga, ma isi mataupu o le talalelei. Mulimuli ane, na amata ona fiafia mai isi matou te potu i aoaoga ma tulaga faatonuina a le Ekalesia.

I taimi na totoe o le matou mafu-taga, na tele a matou talanoaga na foliga mai e liliu atu i aoaoga a le Ekalesia. Na faaigoa e le matou potu nei talanoaga o vasega o le "Fesili i le Mamona." Mulimuli ane, ina ua matou faauu mai la matou aoaoga, na tau mai e se tasi o le matou potu ua ia filifili e tuu le palauvale.

I lou taimi atoa i le militeli, na ou matauina ai o le tele lava o lo'u talanoa atu e uiga i lo'u avea ai ma tagata o le Ekalesia ma le tele o lo'u mulimuli ma


le faamaoni i aoaoga o le talalelei, o le tele foi lena o le tatala mai o lagona o isi ia te au ma tele ai avanoa ou te maua e faasoa atu ai le talalelei.

Ou te faafetai mo faamanuiaga ma avanoa na ou maua e talanoa ai e uiga i le talalelei i le taimi o lau auaunaga faafitafita. Ou te molimau atu afai tatou te lotototoa e tutu atu mo o tatou tulaga faatauaina, o le a faamanuiaina i tatou i avanoa e fai ai galuega faafai-featalai. Ma afai tatou te faasusulu atu ma le saoloto le malamalamo o le talalelei i o tatou olaga, o le a mafai ona tatou puipuia i tatou lava mai le pogisa ma maua se uunaiga lelei i le lalolagi o siomia ai i tatou. ■

Kari Koponen, Uusimaa, Finelani



O se tasi o alii i le moega tuaoi na fesili mai pe mafai ona ia faitau i lau Tusi a Mamona. Ioe, na ou fai atu ai.



Ao ou tautala atu, na ou lagona le faatumulia o au e le Agaga i le filemu ma le mana. Na ou molimau atu i le alofa sili o le Atua mo Ana fanau ma lo latou natura paia.

MATA NA TE FAAFILEMUINA A'U AFA?

Le avea ai ma se faiaoga i le vasega lima i se aoga tumaoti i Massachusetts, ISA, sa matou fono faatasi ai ma faatonu e talanoaina ia mataupu eseese o loo aoaoina i le aoga, ia na feteenai ma mataupu faavae i le "O Le Aiga: O se Folafolaga i le Lalolagi." O au taumafaiga e tu atu mo upumoni e uiga i le faaipoipoga ma le aiga ma faalauiloa le tutoatasi, faaaloalo, ma le femalamalamaai, peitai, na iu i se afa o le malamalama sese, ulagiaina, ma le sauaina.

O nisi taimi na ou lagona e pei o Aposetolo na sopoia le Sami fesouaina o Kalilaia a o tofa Iesu. Na ou lagonaina o lou faatuatua, e pei

foi o i latou, ua amata ona maluelue, ma na ou taumanatunatu foi, "E te le manatu mai ea ia te [au] a fano?" (Mareko 4:38). Ou te talitonu na vavao moni lava e Iesu le matagi ma galu matamataita i aso la ua leva, ae a o faateteleina ou puapuaga, na amata ona faigata mo au ona talitonu o le a Ia faafilemuina a'u afa.

O se tasi aso na fesili mai ai se faatonu ia te au e faamalamalama ou popolega i le au ofisa atoa ma le au-faigaluega i se fonotaga o aoaoga-esese. A o ou saunia mo lenei aoaoga, sa faasolo ina faateleina le faamaoni o au tatalo patino, suesueina o tusi-tusiga paia, ma le auai i le malumalu, ma na ou lagonaina le taiatalaina o au e le Agaga ia iloa le mea e ta'u atu.

Ina ua oo mai le taimi e tautala atu ai i au paaga, na ou maua le lototele

mai upu a le Perofeta o Iosefa Samita: "Ia tatou faia ai ma le fiafia mea uma ua i ai i lo tatou mana; ona mafai lea ona tatou tutu, ma le mautinoa atoatoa, e vaai i le faaolataga a le Atua, ma mo lona aao e faaali mai" (MF&F 123:17).

A o ou tautala atu, na ou lagona le faatumulia o au e le Agaga i le filemu ma le mana. Na ou molimau atu i le alofa sili o le Atua mo Ana fanau ma lo latou natura paia, gafatia ofoofogia, ma lo latou taua faavavau. Na ou aoao atu o poloaiga a le Atua e faaalia ai Lona alofa aua e maua ai le ala i le fiafia silisili. Ma na ou folafola atu e mafai e Iesu Keriso ona faamalolina manua uma lava faalenatura ma faafailaleina.

Na vave lava ona uma lo'u 30 minute o le taimi na tuuina mai, ae ou te lei iloaina. Na ou solomuli lemu ese mai le pulelaa, ao mai au pepa, ma vaai atu i luga. Sa faatumuina le potu i se filemu paia. O nisi tagata na ataata mai a o isi na fetagisi. Na faafetai mai ni faiaoga na i ai ni vaaiga feteenai ia te au mo lou lototoa ma le mautinoa. O se tasi paaga na tautino mai na pa'i atu ia te ia se "agaga faapitoa" a o ou tautala. Na tau mai e isi ia te au latou te le'i faalogo muamua lava i se aoaoga maaleale ma le faaaloalogia o ia talitonuga faapea ma o a'u upu na fesoasoani ia i latou e iloa ai ua manaomia ona suia ia mataupu aoaoina a le aoga.

O le Matai, na vavaoina le sami matamataita i le poloai atu, "Faalogo ia, ina malu ia" (Mareko 4:39) na toe faia foi lena lava mea—i le taimi lenei e mo au!

Na ala mai i lenei aafiaga, na ou aoao ai e le tuua toatasi i tatou pe afatou te tutu atu mo le upumoni. O loo latalata mai pea le fesoasoani a

le Alii. E pei ona Ia folafola mai, "O le a ou alu muamua atu i o outou luma. O le a ou i ai i lo outou lima taumatau ma lo outou agavale, ma o le a i ai lo'u Agaga i o outou loto, ma sio faataamilo outou e a'u agelu, e sapasapai outou i luga" (MF&F 84:88).

Faatasi ai ma lou agaga atoa, ou te molimau atu o Ia o se Atua o le Laveaiga. Ou te iloaina lenei upumoni aua na Ia laveaiina au. Na Ia faafilemuina a'u afa. ■

Nick Gentile, Iuta, ISA

NA OO MAI LAU TALI I LE KONAFESI

Ile 2006 na ou a'oga ai i se vasega o manatu faalelotu i le tupuaga o tagata i se kolisi Katoliko. Na tofi i matou e lo matou faiaoga e faatautaia se suesuega e uiga i se lotu patino ma aoao atu i isi tagata o le vasega. Na ou filifili e fai lau aoaoga i Le Ekalesia a Iesu Keriso o le Au Paia o Aso e Gata Ai—aua, ua 21 tausaga o avea au ma se tagata o le ekalesia. Na ou iloa o se avanoa e le au maua ma ofoofogia lenei e faasoia atu ai ou talitonuga i uo ma paaga e 40.

I le lua masina na ou saunia ai lau aoaoga, na ou tauivi e sue se auala faigofie e aoao ai aoaoga faavae e pele ia te au i se auala e malamalama ai lau vasega. Sa ou le mautinoa po o a vaega e tatau ona ou faia ma pe faapefetai ona ou faia. Ina ua tote tasi le vaiaso fai lau aoaoga, sa ou le iloa pea le mea e fai. I lou popole tele, na ou tatalo atu ai ma fesili mo feosoasoani a le Alii.

Na oo mai lau tali i le tulaga o le

konafesi aoao, lea na faia i le faaiuga o lena vaiaso. I le konafesi ia Aperila o le 2006, na tuuina mai ai e Peresitene James E. Faust (1920–2007), o le Fesoasoani Lua i le Au Peresitene Sili se lauga, e faaaatu "O Le Toefuataina o Mea Uma."¹ Na ou lagonaina le Agaga Paia ua faamautinoa mai ia upumoni na faasoia mai e Peresitene Faust—ma o le auala na ia faasoia mai ai—o se mamanu e mafai ona ou mulimultaia e tuuina atu ai lau aoaoga.

Na ou sii maia se kopi o le lauga mai le Initoneti ina ua maea le konafesi ma faaaogaina o se faavae mo le sauniaina o se ata faasolo e fai ai

Ona o fesili uma na tuuina mai e lou faiaoga ma tamaiti o le vasega, na oo ai i le 40 minute lau aoaoga.



le aoaoga, lea na ou tuuina atu i le vaiaso na sosoo ai. Na tuuina mai ia te au le 20 minute, ae ona o fesili uma na tuuina mai e lou faiaoga ma tamaiti o le vasega, na oo ai i le 40 minute le aoaoga—o le taimi atoa lava o le vasega.

Ina ua uma lau aoaoga, na tau mai e lo matou faiaoga e le'i faia muamua lava e sana tamaiti aoga se aoaoga lelei faapea. Na ia tuuina mai ia te au se togi maualuga ma tau mai pau lava le mafuaaga na ou le maua ai se togi atoatoa i lau aoaoga ona sa ou le faalia le tulaga laugatasia i le autu.

Na ou faasoia mulimuli ane i le faiaoga le itulau uepi o le *Liahona*, e mafai ona ia maua ai le lauga a Peresitene Faust ma isi atonu e mafai ona fesoasoani ia te ia. Na ou tuuina foi ia te ia se kopi o le Tusi a Mamona ma fai atu ia te ia e faitau ai, ma valaaulia o ia e talanoa mai ia te au pe a maea.

Na ou faafetai ua ou iloa na uunaia foi e le aoaoga nisi o tamaiti aoga. I le taimi atoa na totoe o le tausaga, sa ou vaaia le faamaoniga o le eseesege na faia e le aoaoga i o latou olaga. O se tasi o i latou na oo lava ina taliaina faifeautalai i lona aiga, lea na tuuina mai ai ia i maua le avanoa sili e faaaauai ai la ma talanoaga e uiga i le talalelei a Iesu Keriso.

Ou te faafetai mo le avanoa na ou maua e faasoia atu ai ou talitonuga i au paaga i le vasega. Ae sili atu le taua, ou te faafetai na oo ina ou iloa e tali e le Alii a tatou tatalo faamaoni e ala mai i upu a perofeta ma aposetolo o aso nei. ■

Sara Magnussen Fortes, São Paulo, Pasila

FAAMATALAGA

1. Tagai i le James E. Faust, "O Le Toefuataiga o Mea Uma," *Liahona*, Me 2006, 61–62, 67–68.



**Saunia e
Adrián Ochoa**

Fesoasoani Lua i le
Au Peresitene Aoao
o Alii Talavou

O OUTOU o le MALAMALAMA ole LALOLAGI

Etele lava ina faatatau ia faifeau-talai ua maea misiona i le latou auaunaga o ni tausaga aupito sili ia o o latou olaga. Aisea e faapea ai lea tulaga?

Atonu ona o le olioli o le vaaia o se isi agaga ua sau i le Faaola (tagai i le MF&F 18:15). Atonu o se mea e faatatau i sootaga latou te lagonaina ma tagata sailili, tagata liliu mai, tagata o le ekalesia, soa, ma peresitene o misiona. Ou te manatu o nei mea o ni vaega ia, ae ou te manatu foi o se mea e faatatau i le malamalama o le Faaola latou te lagonaina—ma le malamalama latou te faasoaa atu i le tulaga o le auaunaga ma le molimau.

Tatou te iloa na faailoa mai e le Faaola o Ia lava o le Malamalama o le Lalolagi (tagai i le Ioane 9:5; 12:46). Ae peitai i le Lauga i luga o le Mauga, na Ia folafola atu ai le mea lava lea e tasi i Ona soo:

“O outou o le malamalama o le lalolagi outou. E le mafai ona lilo le aai ua tu i luga o le mauga.

“Latou te le tutuina foi le lamepa i le tuu ai i lalo o le mea e fua a'i saito, a e tuu i luga lava o le tuugalamepa ia pupula atu ai i e o i le fale uma.

“Ia pupula atu lo outou malamalama i luma o tagata, ina ia latou

iloa la outou amio lelei, latou te vivii atu ai i lo outou Tama o i le lagi.” (Mataio 5:14–16).

O le faasoaina atu o lo tatou malamalama—o lona uiga, o le faasusulina atu o le malamalama o le Faaola (tagai i le 3 Nifae 18:24)—o se mea e mafai ona tatou faia uma lava i o tatou olaga, ma o se mea e tatau ona tatou amataina a o tatou talavou. A o tatou punouai i tofiga faafaifeautalai aloaia ma galuega faafaifeautalai i le olaga atoa, e mafai ona tatou vaai i tagata e toatolu o e, i lou manatu, o ni faataitaiga sili o lenei galuega: Alema, le Pero-feta o Iosefa Samita, ma le Faaola. O le toatolu uma lenei, na matuai aafia ai lava lou malamalama i le taua o le galuega faafaifeautalai—i le faaalia o le malamalama o le Faaola i le lalolagi.

Alema: E Lotomaualalo


O aoaoga a Alema na matua'i uunaia ai lo'u faamoemoega e au-auna atu i se misiona. E ui lava na faamautinoa mai e lo'u tina matua na papatiso au ina ua valu ou tausaga, ae sa seasea lava ou alu i le lotu i lou talavou. A matou fetau ma faifeautalai a o avea au ma se talavou matua ma na amata ona ou mafaufau e uiga i le Ekalesia, sa amata ona ou suesue

i tusitusiga paia. O le aoaoga a Alema e uiga i le faamalosia ia lotomaualalo e feteenai ma le filifili ia lotomaualalo na faateia ai au (tagai i le Alema 32:13–15). Na ou lagonaina lou le agavaa ona o au agasala, ae na ou manatu mamafa i ai—o le filifili e au-auna atu i se misiona o le a manaomia ai se suiga taua. Ua i ai sau galuega ma sau lava pisinisi, ma na ou manao e faaipoipo ma lau uo teine (lenei, ua avea nei, ma ou toalua). Pe mafai ea ona ou lafoai na mea uma ina ia auauna ai i le Alii?

Na ou alu i se nofoaga patino ma faaalu ai se taimi—se taimi moni lava—e tatalo ma talanoa ai ma lou Tama Faalelagi. I le faalotomaualaloina o au lava ia, na oo ina ou iloa sa finagalo le Tama Faalelagi ia te au e auauna atu. Na tonu ia te au e mulimuli i Lana fetalaiga, ma i le faia o lea mea, na ou iloaina ai le moni o le folafolaga a Alema: “O le ua ia faalotomaualaloina moni o ia lava, ma salamo i ana agasala, ma tumau e oo i le iuga, o ia lava lea o le a faamanu-iaina—ioe, e sili atu ona faamanu-iaina nai lo i latou o e ua faamalosia ia lotomaualalalo” (Alema 32:15).

E ui lava ua sili mamao i le 26 ou tausaga, na ou alu i lou epikopo,

*A o tatou
punouai ai
i le galuega
faafaifeatalai,
e mafai ona
tatou maua
musumusuga
mai faataita-
iga a le Faaola,
Alema, ma
Iosefa Samita.*



lea na fesoasoani e saunia au. Na ou lafoina au pepa o le misiona ma faatali mo ni masina. Mulimuli ane, na ou mauaina se valaauga e tau mai ai ia te au ou te le agavaa e auauna o se faifeatalai faamisiona ae mafai ona ou auauna i fesootaiga faalauaitele, le matata lea na ou galue ai. O se taimi fiafia tele. Na faia au aoaoga ma ou auai loa i talanoaga i faasalalauga i le taimi lava na faalauiloa aloaia ai le Ekalesia i Mekisiko e le malo o Mekisiko. Na ou fesoasoani e aoao tagata tomai faapitoa o siteki o le va i fafo ma faamautu sootaga ma taitai o le malo. O lenei avanoa e auauna atu ai na faamanuiaina ai au i auala e sili atu nai lo le mea e mafai ona ou faamata-laina ma auala semanu e le mafai ona ou mafaufauina. Na aafia ai le tele o vaega o lo'u olaga mo le lelei.

O lau auaunaga faafaifeatalai o le a avea ma le mea e tasi e sili ona taua e saunia ai oe mo lou olaga atoa. Na folafola mai e Peresitene Gordon B. Hinckley (1910–2008) i faifeatalai faaoolioli: “O le taimi tou te faaluina i le galuega faamisiona, afai o le a outou faaluina na tausaga i auaunaga tuuto, o le a aumaia ai faamanuiaga sili atu ia te outou nai lo se isi lava lua tausaga o o outou olaga. . . . Afai e te auauna

TELE AVANOA E AUAUNA AI

Ole auaunaga faafaifeatalai aloaia e le faatapulaaina ia i latou e mafai ona auauna atu i misiona talai. E toatele talavou matutua e le mafai ona faia se misiona talai ona o luitau faaletino, faalemafaufau, pe faalelagona. O nei alii ma tamaitai talavou o loo faia se galuega lelei maoae i faalapotopotoga a le Ekalesia i le lalolagi atoa o ni faifeatalai mo auaunaga faale-Ekalesia.

O faifeatalai mo auaunaga faale-Ekalesia o loo manaomia i le lalolagi atoa e auauna atu i nofoaga autu o talafaa solo-pito o aiga, faleoloa o epikopo, fale e tuuapa ai meaai, nofoaga autu mo galuega, faalapotopotoga mo auau-naga i alalafaga, tofiga faasalalau, ma le tele o isi galuega fai a le Ekalesia. O alii ma tamaitai o vaitausaga o le misiona e le mafai ona auauna atu i se misiona talai, e mafai ona talanoa ma matua ma taitai e fuafua avanoa mo se misiona o auaunaga. E ui e eseese tuutuuga o tofiga ma le umi mo misiona o auaunaga e faalagolago i le malosi o le faifeatalai, ae aafia ai i latou i galuega moni lava, auaunaga moni, ma le osigataulaga moni lea e faia se eseeseaga i le fausiaina o le malo o le Atua i le lalolagi.

Mo nisi faamatalaga i misiona o auaunaga faale-Ekalesia, faamole-mole asiisi i le www.lds.org/service/missionary-service.



atu ma le faamaoni ma le lelei i se misiona, o le a avea oe ma se tane sili atu, o le a avea oe ma se tamā sili atu, o le a avea oe ma se tama aoga sili atu, ma se tagata faigaluega sili atu.”¹ Afai o e i ai i le vaitausaga e auauna atu ai i se misiona faama-maluina, ia saunia nei e auauna atu. O faamanuiaga o le a outou maua o le a sili mamao atu i se isi lava osigataulaga atonu tou te faia.

Ou te iloa atonu e oo mai ia luitau a o outou mafaufau e auauna atu i se misiona. E faia e le fili mea



uma na te mafai e faavaivai ai le galuega a le Alii mai le agai i luma. Afai o e le mautinoa pe tatau ona e auauna atu i se misiona, ou te vala-aulia oe ia e faalotomaualaloina oe lava ona e tootuli lea ma fesili atu i le Tama Faalelagi. Na Ia faaali mai Lona finagalo mo au, ma ou te iloa o le a Ia faia foi mo oe.

Iosefa Samita: Mauaina o se Vaaiga Faavavau

Na ou aoao mai ia Iosefa Samita o le taulai atu i le vaaiga faavavau e mafai ona faateleina ai lou tomai o se auauna a le Alii. E masani ona ou mafaufau pe na faapefea ona ia onosa—o tofotofoga ae maise lava sauaga. Ae na oo ina ou malamalamana ona sa vaai Iosefa i talaatu o le veli, na ia

iloa ai o lenei olaga faaletino ua na o se vaega o la tatou malaga faavavau. Na ou mafaufau po o le a le mea o le a tupu ia te au pe ana ou malamalamana le mea na ia faia, ma a o mafaufau loloto i lenei mea, na oo ina ou iloa afai tatou te taulai atu iinei ma le taimi nei, ua faatapulaaina la tatou vaai. Pe a tatou faatumauina se vaaiga faavavau, tatou te malamalamana i le taua tele o lo tatou tuuto atu i le fesoasoani atu i isi, laveaiina o isi, ma le tuuina atu o le molimau o upumoni ua tatou iloa.

Pe afai tatou te taulai atu, e pei ona faia e Iosefa, i mea mai se vaaiga faavavau, o le a se tele o lo tatou naunau ma le manao e faasoa atu le talalelei i o tatou olaga i aso taitasi? O le faasoa atu o lo tatou malamalamana—e faasusulu atu ai le malamalamana o le Faaola—e le tatau ona faatapulaaina i tofiga aloaia faafaifeatalai. Afai e tatala atu ou lagona ma faalogo lelei, e mafai ona e faasoa atu le Malamalamana o Keriso ia i latou o siomia ai oe, i le faasoa atu lea po o ai oe i le avea ai ma se tagata o le Ekalesia ma mea e te talitonu i ai. A o e fesiitai mai lea nofoaga i lea nofoaga i lou olaga atoa ma fesootai ma le tele o tagata eseese, ou te faamalosiauina oe e faamasani i ou tuaoi, au paaga i le vasega, ma e tou te galulue faatasi o isi faatuataga. Mulimuli i le faatonuga a Elder M. Russell Ballard e faasoa atu ai le talalelei i le initonet, e aofia ai uepi saite o agafesootai ma faasalalauga, poloka, ma saite e fefaaasoaa'i ai vitio.²

E ui e mafai ona tatou aoao isi e uiga i le talalelei e ala i se talanoaga aloaia, ae o nisi taimi e na o le pau lava le mea e manaomia e liliu ai se tasi i le talalelei o se faataitaiga amiontonu ma se naunautaiga e faasoa atu lau molimau e ala i le auala o loo e

ola ai i lou olaga. A e ola agavaa mo le Agaga ma faasusulu atu lou malamalama, ona iloa lea e tagata “la outou amio lelei, latou te vivii atu ai i lo outou Tama o i le lagi” (Mataio 5:16).

O Le Faaola: Taulai Atu i Isi

Ma le mea mulimuli, o le Faaola, o lo tatou faataitaiga i mea uma, na aoaoina au e aua le popole tele ia te au lava ia ae taulai atu i le faaolataga o isi. O Lona olaga atoa lava sa faaaoga mo isi. O nisi taimi a mafaufau i le faasoa atu o le talalelei ia i latou o isi faatatuaga, tatou te fefefe pe o le a lo latou manatu ia i tatou ae pe o le a faapefea foi ona latou tali mai. I le mafaufau atu i le auaunaga a faifeatalai faamisiona, e tele lava ina tatou popole tele e uiga i tupe maua po o aoga po o mafutaga—o mea lelei ma taua nei ae o mea ia e mafai lava ona faatali. O le Faaola lava Ia na “leai se mea e moe ai” (Mataio 8:20). Na Ia aoao Ona sooo e “saili . . . muamua le malo o le Atua,” ma “o na mea uma” o le a faoopooina ia i latou (Mataio 6:33).

E moni foi lena mea mo i tatou. A o tatou saili e mulimuli ma faasusulu atu le Malamalama o le Lalolagi, o le a oo mai faamanuiaga i le lalolagi ma iu mai ia i tatou o tagata taitoatasi. Talosia ia tatou saili e aua le nanaina lena malamalama ae faasusulu atu i luma i o tatou olaga atoa. ■

FAAMATALAGA

1. Gordon B. Hinckley, “O Misiona, Malumalu, ma le Taitaiga,” *Liahona*, Jan. 1996, 62.
2. Tagai M. Russell Ballard, “Sharing the Gospel Using the Internet,” *Liahona*, June 2008, N2.



TALI ATU I SE VALAAUGA MAI LE PEROFETA

Afai o sauniga amata o le konafesi aoao o ni faailoaga o le mea o loo i le mafaufau o le perofeta, o se faamaoniga lena o loo mafaufau ia Peresitene Thomas S. Monson i le galuega faafaifeatalai.

La Aperila i le 2011 na ia lipoti mai ai le numera o faifeatalai ma misiona i le salafa o le lalolagi ma saunoa mai: “O le galuega faafaifeatalai o le toto ola lea o le malo. Sei ou fautua atu lava afai e te mafaia, ona e fuafua lea e fai se saofaga i le Tupe Lautele mo Faifeatalai a le Eklesia.”¹

Ia Oketopa o le 2010 na ia saunoa mai ai:

“Ou te toe fai atu i mea ua loa ona aoao mai e perofeta—o alii talavou agavaa uma lava, ma malolosi e tatau ona saunia e auauna atu i se misiona. O le galuega faafaifeatalai o se tiute faaleperisitua—o se matafaioi ua faamoemoeina e le Alii mai ia i tatou ua tele naua mea ua tuuina mai i ai. “Alii talavou, ou te apoapoi atu ia te outou ia saunia mo le galuega faafaifeatalai. la tausisia lo outou mama ma le atoatoa ma le agavaa e avea ma sui o le Alii. Tausisia le ola maloloina ma le malosi. Suesue i tusitusiga paia. Afai o i ai, ia auai i le seminare po o le inisitituti. Faamasani i le tusitalima a faifeatalai o le *Talai La’u Talalelei*.”

“O se upu ia te outou tuafafine talavou: e ui e le tutusa a outou tiutetauave faaleperisitua ma alii talavou e auauna atu faafaifeatalai faamisiona, ae i ai foi lo outou sao taua o ni faifeatalai, ma e matou te taliaina la outou auaunaga.”²

Ma ia Oketopa o le 2009 na ia saunoa mai ai: “Ou te talosaga atu ina ia faaauau pea lo outou faatuatua ma tatalo moreia e utiuti so tatou aafiaga o i ai, ma nofoaga e le o faata-gaina ona tatou faasoa saoloto atu ai le talalelei i le taimi nei. E mafai ona tutupu wavega pe a tatou faia lena mea.”³

FAAMATALAGA

1. Thomas S. Monson, “Ua Toe oo Mai le Konafesi,” *Liahona*, Me 2011, 4.
2. Peresitene Thomas S. Monson, “A o Tatou Toe Potopoto Faatasi Ai,” *Liahona*, Nov. 2010, 5–6.
3. Peresitene Thomas S. Monson, “Susu Maia ma Talaaao Mai i le Konafesi,” *Liahona*, Nov. 2009, 6.

Tuusao i le Mataupu

Afai e fesili tagata pe
aisea tatou te auina atu ai
**faifeautalai
i atunuu
Kerisiano,**
o le a lau tala e fai
atu ia i latou?



Mo le tele o tagata e le o
ni tagata o la tatou Ekalesia,
o le “galuega faafaifeau-
talai” o lona uiga o le malaga i
se atunu laitiit mamao, mo se
faataitaiga, e mafai ona aoao-
ina tagata e le o ni Kerisiano
i le faa-Kerisiano ma o nuu e
mafai ai ona faatino ia galuega
fesoasoani alofa. Afai la latou te
iloa o loo fai e la tatou Ekalesia
“galuega faafaifeautalai” i totolu
lava o o latou tuaoi, atonu

latou te tomanatu pe aisea.

O le savali o loo faasoa atu e
a tatou faifeautalai e mo le lalo-
lagi atoa, o le mea lea tatou te
auina atu ai i latou i le lalolagi
atoa. Tatou te talitonu ua toefua-
taiina le talalelei a Iesu Keriso, e
aofia ai le Ekalesia a Keriso ma
le pule o le perisitua e manao-
mia e faatino ai sauniga, e pei
o papatisoga. Ua na o le pau
lava lenei o le Ekalesia ua toe-
fuatai i ai le atoaga o le talalelei.

Ona e manaomia e tagata
uma ona faalogo i lenei
savali, e aofia ai i latou
o i nofoaga ua leva
ona i ai se tu masani
o le faa-Kerisiano, o
lea ua tatou auina atu
ai faifeautalai i tagata
uma lava. ■

O le a le taimi e le talafeagai ai ona **faasoa** **atu ni aafiaga** **faaleagaga?**

O le faasoaina atu o o tatou aafiaga faaleagaga ia i latou ua saunia e faalogo i ai o se auala matagofie lea e atiina ae ai le faatuatua ma molimau a isi. Afai ua e lagona le uunaia o oe e faamatala se tali o se tatalo, mo se faataitaiga, o le a faate-leina le faatuatua o isi e mafai ona taliina a latou tatalo. Ae afai na i ai sou aafiaga faaleagaga e le masani ai po o se aafiaga faaleagaga e matuai patino lava, e sili le aua nei faasoaina atu sei

vagana ua uunaia oe e le Agaga Paia e fai.

Na saunoa mai Peresitene Boyd K. Packer, le Peresitene o le Korama a Aposetolo e Toasefululua:

“Na ou aoaoina e faapea, o lena uunaiga malosi faaleagaga e le oo mai sooo ia i tatou. Ma afai e oo mai, e masani lava e mo lo tatou lava faagaeetiaina, aoaoga, po o se aoaiga. . . .

“Ua oo foi ina ou talitonu e le o se mea atamai le faaaauau pea

ona talatalanoa e uiga i aafiaga faaleagaga e le masani ai. E tatau ona puipua ma le faaete-te ma e na o le pau le taimi e faasoa atu ai, pe a uunaia oe e le Agaga lava ia e faaaoga mo le manuia o isi. . . .

“E tatau lava ia i tatou, i lou lava talitonuga, ona tatou tausia nei mea ma mafaufau loloto i ai i o tatou loto.”¹ ■

FAAMATALAGA

1. Boyd K. Packer, “O Le Lamepa a le Alii,” *Liahona*, Tes. 1988, 32.

E fesili mai tagata ia te au i nisi taimi e uiga i **ofusa o le malumalu,** e masani lava i faaupuga le faaaloalo. O le a le mea e tatau ona ou tau atu ia i latou?

O le mea muamua lava, afai e faaaoga e tagata faaupuga le faaaloalo i ofusa o le malumalu, e matuai talafeagai lava mo oe le talosaga atu ma le alofa ia i latou e faaali se faaaloalo sili atu, ona o ofusa e paia ia i tatou.

Ma le isi foi, atonu e te manao e tau atu o tagata ma faifeau i le tele o isi lotu e fai teuga faapitoa o lavalava e sui mo a latou faatuatua ga patino po o latou tiute aloaia, ma o le mea moni e faapea o la tatou

faiga masani faalelotu e aofia ai lavalava faapitoa, o se mea moni lava e masani ai.

Ina ia faamalamalamaina le taua o ofusa o le malumalu, e mafai ona e fai atu ua na o ni ofu faigofie lava, ma tauagafau e ofu i lalo ifo o lavalava e tuuina atu i tagata matutua o le Ekalesia o se vaega o ni sauniga faapitoa i o tatou malumalu. I nei sauniga, tatou te tautino atu i tatou lava ia ola i le ala e finagalo Iesu Keriso tatou te ola ai, ma o ofusa o se faamanatu

faaletino i taimi uma o lenei tau-tinoga patino faaleagaga. I lenei auala, e mafai ona fesoasoani ofusa e puipua i tatou mai faaosoosoga ma mea leaga. ■

Saunia e Elder
M. Russell Ballard

O Le Korama a
Apostolo e Toasefululuā



Tausia O LOU OLAGA IA PALENI

O nei fautuaga e valu e mafai ona fesoasoani ia te oe e feagai ai ma luitau e tele o le olaga e aunoa ma le lagonaina o le lofituina.

Ole onosaia o luitau faigata ma eseese o aso uma o le olaga, lea e le o se galuega faigofie, e mafai ona faaleagaina le paleni ma le filemu o loo tatou sailia. E tele tagata lelei o loo matua taumafai e faatumau le paleni, ae peitai latou te lagonaina i nisi taimi le lofituina ma le faatoilaloia.

E i ai ni nai au fautuaga ou te faamoemoe o le a aoga ia te outou o loo popole i le tau faapalenii na manaoga o le olaga. O nei fautuaga e faigofie lava; o o latou manatu faavae e faigofie lava ona le iloaina pe afai e te le faaeteete. O le a e manaomiaina se tautinoga malosi ma se loto pulea patino ina ia faaofi ai nei fautuaga i lou olaga.

1. Faamautuina o Mea e Faamuamua

Mafaufau i lou olaga ma faatulaga au mea e faamuamua. Saili soo sina taimi filemu e mafaufau loloto ai e

uiga i le mea o loo e alu i ai ma le mea e te manaomia e fai e oo ai iina. O Iesu, lo tatou faataitaiga, sa masani ona “maliu o ia i le mea tuufua, [ma] tatalo ai” (Luka 5:16). Tatou te manaomia le faia pea o lea lava mea e tasi e faafouina ai i tatou faaleagaga e pei ona faia e le Faaola.

Tusi i lalo galuega e te manao e faataunu i aso taitasi. Ia faamuamua i lou mafaufau feagaiga paia na e osia ma le Alii a o e tusia i lalo au fuafuaga mo aso taitasi.

2. Faatu ni Sini e Te Mafaia

Ia faatu ni sini pupuu e mafai ona e ausia. Faatu ni sini e paleni lelei—e le tele naua e le itiiti foi ma e le maualuluga tele pe maualalo tele foi. Tusi i lalo au sini e te mafaia ma galue i ai e tusa ai ma lo latou taua. Tatalo mo le taitaiga faalelagi i le faatuina o au sini.

3. Paketi ma le Atamai

E feagai tagata uma ma luitau tau-tupe i le olaga. E ala atu i le paketiina ma le atamai, puleaina o mea moni e te manaomiaina ma fuaina ma le faaeteete i mea e tele e te manao ai i le olaga. Na fai atu le perofeta o Iakopo i lona nuu: “O le mea lea, aua le faaaluina tupe mo mea ua leai se

aoga, po o a outou galuega mo mea e le ma’ona ai” (2 Nifae 9:51).

Manatua ia totogi i taimi uma se sefuluai atoa.

4. Fausia ni Sootaga

Ia vavalalata ma ou matua, aiga, ma uo. O le a latou fesoasoani ia te oe ia paleni lou olaga. Fausia ni sootaga ma lou aiga ma uo e ala i fesootaiga saoloto ma faamaoni.

O sootaga lelei faaleaiga e mafai ona faatumauina e ala atu i le fesootaiga malu, alofa, ma manatu alofa. Ia manatua o se tepa atu, faaivi o le mata, lue o le ulu, po o se pai atu o le a sili atu nai lo upu. O se agamalie ma le faalogo lelei o ni vaega taua foi o le fesootaiga lelei.

Suesue i Tusitusiga Paia

Sailiili i Tusitusiga Paia latou te ofoina mai se tasi o punaoa aupito sili o loo ia i tatou e fesootai ai pea ma le Agaga o le Alii. O se tasi o ala na ou maua ai lou iloa mautinoa o Iesu o le Keriso na auala mai lea i lou duesue i tusitusiga paia. Na valaauna e Peresitene Ezra Taft Benson (1899–1994) ma Gordon B. Hinckley (1910–2008) i tagata o le Ekalesia ia avea le duesue i le Tusia a Mamona o se mausa i aso taitasi ma o se sailiga i le olaga atoa.



O le fautuaga a le Aposetolo o Paulo ia Timoteo o se fautuaga lelei mo i tatou taitoatasi. Na ia tusia, "O tusi paia uma lava e mai le Agaga o le Atua ia, e aoga foi ia e aoao ai, e aoai ai, e faatonu ai, e faapoto ai foi i le amiotonu" (2 Timoteo 3:16).

6. Ia Tausia Lelei Oe Lava ia

E toatele tagata, e aofia ai ma au, e faigata ona maua se taimi e lava ai se malolo, faamalositino, ma toafimale. E tatau ona tatou faatulagaina le taimi ia tatou kalena o aso taitasi mo nei gaoioiga pe afai e ao ona tatou fiafia i se olaga maloloina ma paleni. O foliga vaiaia lelei faaletino e faalelei ai lo tatou malualii ma le faaaloalo o le tagata mo ia lava.

Ola i le Talalelei

Ua aoao soo mai perofeta e tatau i aiga ona aoao e le tasi le isi i le talalelei, afai e mafai, i se afiafi faaleaiga i vaiaso taitasi. O lenei faiga masani faaleaiga, afai tatou te le matua faaeteete, e mafai ona see malie ese atu mai ia i tatou. E le tatau ona tatou maumaua lenei avanoa faapitoa e "aoao i le tasi mataupu faavae o le malo" (MF&F 88:77), lena o le a taiatai aiga i le ola faavavau.

O loo galue pea Satani e faaumatia a tatou molimau, ae o le a leai sona mana e faaososo pe faalavelave ia i tatou e sili atu i lo tatou malosi e tetee atu pe afai o loo tatou suesue i le talalelei ma ola i ona poloaiga.

8. Tatalo Soo

O lau fautuaga mulimuli ia tatalo soo o ni tagata taitoatasi ma o ni aiga.

E mafai ona e iloa faaiuga sao e fai i aso taitasi e ala atu i le tatalo e le aunoa, ma le faamaoni.

Na aotele e le perofeta o Alema le taua o le tatalo i upu nei: "Ia outou faamaualalalo outou lava i luma o le Alii, ma valaa atu i lona suafa paia, ma mataala ma tatalo e le aunoa, ina ia le faaosooosoina outou i luga atu o le mea e mafai ona outou lavatia, ma faapea ona taitaina ai outou e le Agaga Paia, ma lotomaualalalo ai, agamalu, agamalolo, onosai, tumu i le alofa ma le tali-tiga atoa" (Alema 13:28). Pe afai o loo ou maua le agaga, ou te iloaina o le a sili atu ona faigofie ona ou faapalenina mea uma i lou olaga.

La Taulai Atu Pea ma Fai Le Mea Sili e Te Mafaia

O nisi fautuaga e mafai ona faaopoopo i nei fautuaga. Ae peitai, ou te talitonu afai tatou te taulai atu i ni nai faamoemoega autu, o le a mautinoa lo tatou mafaia ona pulea le tele o manaoga e aumaia e le olaga ia i tatou. Manatua, o le tele naua o se mea e tasi i le olaga e mafai ona le paleni ai lo tatou olaga. A o le taimi lava lea e tasi, o le laitiiti tele o mea taula e mafai ai foi ona tupu ai le mea lava lea e tasi. Na fautua mai le Tupu o Peniamina "[ia] faia nei mea uma i le poto ma le faatulagaga lelei" (Mosaea 4:27).

E masani lava o le leai o se faasino-maga manino ma ni sini e mafai ona maimau ai lo tatou taimi ma le malosi ma saofaga ai i le le paleni i o tatou olaga. O se olaga ua le paleni e pei lava o le pa'u o le taavale ua le paleni. O le a avea ma mea e alu salutululu ai le taavale ma le le saogalemu. O pa'u taavale e paleni atoatoa e mafai

ona maua ai se malaga soloolei ma le toafimalie. Ua faapena foi le olaga. O le malaga i le olaga faaletino e mafai ona sili atu le soloolei mo i tatou pe a tatou taumafai e tumau i le paleni. O la tatou sini autu lava o le tatau lea ona saili atu i le "tino ola pea ma le ola faavavau" (Mose 1:39). I le avea ai o lenei mau ma a tatou sini, aisea la tatou te le aveesea ai mai o tatou olaga mea na e malomaloā ma faumatia ai o tatou mafaufauga, lagona, ma malosiaga ia e le o saofaga i lo tatou ausiaina o lena sini?

E lei leva talu ai nei, na fai mai ai se tasi o lau fanau, "Tama, o nisi taimi ou te mafaufau ai pe mafai ea ona

ou faia." O le tali na ou tuuina atu ia te ia e tutusa ma lea o le a ou tuuina atu ia te outou. Tau lava o le faia o le mea sili e te mafaia i aso taitasi. Fai mea autu ma, ae e te lei iloaina, o le a faatumuina lou olaga i le malamalam faaleagaga lea o le a faamautuina atu ia te oe e alofa lou Tama Faalelagi ia te oe. Afai e iloa e se tagata lenei mea, o le a tumu le olaga i faamoe-moega ma [ona] uiga, ma faigofie ai ona faatumauina le paleni. ■

Mai se saunoaga i le konafesi aoao ia Aperila 1987.



***Pe a tatou taulai atu i
ni nai faamoemoega
autu, o le a mautinoa
lo tatou mafaia
ona pulea le tele o
manaoga e aumaia
e le olaga ia i tatou.***

FAAAOGA MA LE ATAMAI LE TAIMI

*"FILIFILI E FAI NI MEA LELEI
SE TELE I LOU LAVA LOTO MALIE"*

Mo Le Malosi o le Autalavou [2011], 3).



Faitalia ma le Tali Atu mo Oe Lava la



**Saunia e Elder
Shayne M. Bowen**
O Le Fitugafulu

Ei ai se tala faapea o se Initia Amerika matua lava na aoaoina le atalii o lona atalii e uiga i le olaga. “O loo tupu se taua i totonu ia te au,” na ia fai atu ai i le tamaititi.

“O se taua matautia, i le va o ni luko se lua. O le tasi e leaga: O ia o ita, lotoleaga, faanoanoa, le faamalieina, faaloloto, faasau-sili, manatu maualalo ia te ia lava, tausalaina, inoino, vaivaiga, pepelo, faamaualuga valea, fia sili, ma le manatu faapito.”

Na ia faaaauau, “O le isi e lelei: o ia o olioli, filemu, alofa, faamoemoe, toofilemu, loto-maualalo, agaalofa, agalelei, tiga alofa, loto alofa, upumoni, galuega alofa, ma faatuatua. O le taua foi lena e tasi o loo tupu i totonu ia te oe—ma totonu foi o isi tagata uma.”

Na mafaufau le atalii laitiiti mo sina taimi ona fesili lea i lona tama matua, “O lē fea luko o le a manumalo?”

Na tali vave atu le Initia Amerika matua, “O le luko e te fafagaina.”

Faitalia ma le Muai Olaga

I aso a la ua leva, a o tatou i ai i le afioaga o lo tatou Tama i le Lagi, na faia ai se Fono Tele. I lena fonotaga na tuuina mai ai e lo tatou Tama, ma finagalo ina ia tatou maua le fiafia ma le olioli lava lea e tasi o loo Ia olioli ai, Lana fuafuaga e mafai ai ona tatou o mai i lenei lalolagi, maua se tino faaletino, ma



tofo i le oona ma le suamalie o lenei olaga. E mafai ona tatou filifili e tausi Ana poloaiga ma avea faapei o Ia pe filifili e le tausia Ana poloaiga ma tatou le maua ai e i tatou lava le olioli ma faamanuiaga ua Ia folafola mai.

O se vaega totonugalemu o le fuafuaga a lo tatou Tama o le mafai lea ona tatou saoloto e filifili. O lenei meaalofa e taua o le faitalia, o le mana e filifili ai. O le soa a le faitalia i taimi uma lava o le tali atu o le tagata mo ia lava. E tali atu i tatou taitoatasi e tusa ai ma filifiliga tatou te faia.

Ina ua fesili le Tama Faalelagi po o ai o le a faataunuina le fuafuaga, na ofo atu Lusifelo e faolaina tagata uma lava i lalo o ana tuutuuga, lea o le a le taliaina ai le faitalia ma o le a ia maua uma ai le mamalu. O lenei mea o le a faaleaogaina ai le fuafuaga faavavau a le Atua mo le fiafia.

Na ofo atu e Iesu Keriso o Ia lava e avea ma Faaola i le fuafuaga a le Tama. Na filifili



o Ia e usitai i le fuafuaga a le Tama. Tatou te tuu atu lo tatou faatuatua i lo tatou uso matua o Iesu Keriso, i le iloaina o Lana misiona e taua e mafai ai ona tatou toe foi atu i le malo o lo tatou Tama.

O le a le mea na tupu ia Lusifelo? Na fetai atu le Tama:

“O le mea lea, ona sa fouvale Satani ia te au, ma saili e faaumati le fitalia a le tagata, lea na tuu atu e Au, o le Alii le Atua ia te ia, ma le tasi foi, ia Ou avatu ia te ia lou lava mana; i le mana o lau Toatasina Fanaua, na Ou faia ai ia lafona o ia i lalo;

“Ma sa avea o ia ma Satani, ioe, o le tiapolo lava lea, o le tamā o pepelo uma lava, e faasese ma faatauaso tagata, ma ta’ita’i faatagata-otaua i lona loto, le toatele lava lea o i latou o e e le faalogo i lo’u leo” (Mose 4:3–4).

Ona o le fitalia o se mataupu faavae e faavavau ma o le a le solia ai e le Tama Faalelagi, ua leiloloa mai ia te Ia le tasi-vae tolu o Ana fanau, o e na filifili e mulimuli ia Satani.

Fitalia ma le Olaga Faaletino

O le a la le faamoemoega o le olaga i lenei lalolagi? O se tasi o faamoemoega autu o le faaalia lea o lo tatou faatuatua (tagai i le Aperaamo 3:24–25). O loo ia i tatou le tomai e iloa ai le sao mai le sese. O loo ia i tatou le mana na tuuina mai ia i tatou e le Atua “e fai . . . ae le faamalosia” (2 Nifae 2:26). Mulimuli ane, o le a tatou mauaina le malo o loo tatou manaomia e tusa ai ma poloaiga tatou te usitaia, o sauniga tatou te mauaina, ma feagaiga tatou te tausia.


E pei lava ona faamalamalamaina e le Initia Amerika matua ma atamai, e pau lava ia te ia po o le fea o luko e na te fafagaina. O loo ia te ia le fitalia, ma e tali atu lava o ia mo ana lava filifiliga. E ao lava ona ia ola faatasi ma taunuuga o ana filifiliga.

O outou o le autalavou o le tupuaga tau-tupu. Ua auina mai outou i le lalolagi ina ua i ai le atoaga o le talalelei iinei. Ua papatisoina outou ma faamauina ina ia mafai ona outou maua, pe a outou mananao i ai, le Agaga Paia e avea ma a outou soa turau. Ua outou osia feagaiga o le papatisoga. Ma alii talavou, ua outou osia ni feagaiga faaopoopo o le perisitua.

Ua ia te outou le fitalia e filifili ai le ola faavavau e ala i le tausia o outou lava ia mama ma agavaa e ulu atu i le malumalu paia o le Atua ma maua sauniga ia o le a mafai ai ona outou toe foi atu i le afioaga o le Tama. E mafai ona outou filifilia le faamanuiga o le ola faavavau, ia ola i le olaga o loo soifua ai le Atua mo le faavavau atoa faatasi ma lou aiga. O loo ia te outou le gafatia e maua ai mea uma o loo i le Tama. O le filifiliga e a oe lea.

Faaaoga ma le atamai lou fitalia ua tuuina mai e le Atua. ■

O lomiga i le lumanai o le a maua ai le tele o tusiga e uiga i tulaga faatonuina i le tusi fou o le Mo Le Malosi o le Autalavou.



O MANATU AUTU E UIGA I LE FAITALIA

“O le aia tatau e taitaia ai lou olaga o se tasi lea o meaalofa silisili a le Atua ia te oe. . . .

“E te tali atu oe lava ia mo filifiliga e te faia. . . .

“E ui ina e saoloto e filifili lau lava ala o faatinoga, ae e te le saoloto e filifili ia taunuuga”

Mo Le Malosi o le Autalavou (2011), 2.



FAAMANUIAINA E ALA I **FAATAITAIGA**

E pei lava ona uunaia e au uo lo'u olaga, e mafai ona outou faasusulu atu le malamalama o le talalelei i olaga o a outou uo e ala i le auala tou te ola ai.



**Saunia e Elder
O. Vincent Haleck**
O Le Fitugafulu

Talu ai nei na ma faatasi ai ma se uo na ou iloa i le aoga maualuga. Na ma talanoa i le taimi muamua na ma feiloi ai, e uiga i le olioli e oo mai ona o le ola i le talalelei, ma le uunaiga a uo i o ma olaga. O le mea moni lava, o faataitaiga a au uo na ala ai ona ou auai i le Eklesia.

Na faatoa ou sau i le Iunaite Setete mai Amerika Samoa ina ua 10 ou tausaga aua sa manao lo'u tama ia maua e lana fanau ni avanoa faaleaoaoga ia sili atu nai lo ia. Na ou nofo i Seattle, Uosigitone, faatasi ma se tina ma se tama o le aiga. I le 14 o ou tausaga, na ou masii atu ai i Kalefonia. O lou tina matua, na ma nonofo, sa avea ma se tagata faigaluga i le Malumalu o Los Angeles Kalefonia, ae sa lei avea au ma se tagata o le Eklesia.

I lou tausaga muamua i le aoga maualuga, na ou aofia ai i le au taitai o le aoga ma na ou matauina ai nai tamaiti i le au taitai sa tulaga ese mai isi tamaiti. Na faaaloalo i latou i isi, mama i le gagana ma ofu, ma na i ai se malualii ma le malamalamana ia i latou na ou gauai atu i ai. Na oo ina matou faaauo, ma na latou valaaulia au matou te o i le Mutuale. Na ou fafia i gaoioiga malie ma faafiafialoto, ma le Agaga na ou lagonaina iina, ma na amata ona ou auai soo. I ni nai vaiaso mulimuli ane na faailoa atu ai au e au uo i faifeautalai ma le Tusi a Mamona. Na vave ona ou papatiso mulimuli ane ma amata se suesuega i le olaga atoa o le Tusi a Mamona.


Na mulimuli au uo i le faatuaga i le 1 Timoteo 4:12: "Ia fai oe ma faaaoao i e ua faatuatua, i le upu, ma le amio, ma le alofa, ma le loto, ma le faatuatua, ma le le gaoia." E pei o au uo, e mafai foi ona avea i tatou ma faatosinaga mo le lelei ia tatou taga i lea aso ma lea aso i le ola ai i le talalelei. A tatou ola i o tatou olaga e faasusulu atu o tatou tulaga faatonuina ma talitonuga, o i latou ua saunia e talia le talalelei o le a matauina ma o le a fia iloa atili.

Mo se faataitaiga, manatua le tala ia Alema

o loo maua i le Tusi a Mamona. Sa ola Alema i se olaga toafimalie i le avea ai ma se faitau-laga i le maota o le Tupu o Noa. Ina ua tuu-inu atu e Apinati lana molimau, na talitonu Alema ia te ia ma, faatasi ai ma le lamatia tele o ia lava, na ia tusia i lalo upu a Apinati ma aoao atu isi e uiga i le Faaola (tagai i le Mosaea 17:2–4).

"Ma sa oo ina ua mavae ni aso e tele sa toatele se vaega o tagata sa faapotopoto atu i le nofoaga lea o Mamona, e faalogologo i upu a Alema. Ioe, sa faapotopoto faatasi i latou uma o e na talitonu i ana upu e faalogologo ia te ia. Ma sa aoaoina i latou, ma talai atu ia te i latou le salamo, ma le togiola, ma le faatuatua i le Alii" (Mosaea 18:7; tagai foi i fuaiupu 1–6).

Mulimuli ane, ina ua avea Alema le Ititi ma faafitauli i le Eklesia, na tali mai se agelu i tatalo a Alema: "Ua faafogaina e le Alii talosaga a lona nuu, ma talosaga foi a lana auauna, o Alema, o le o lou tama; ona sa tatalo atu o ia ma le faatuatua tele e uiga ia te oe, ina ia mafai ona aumai o oe





**Na avea Alema le
Itiiti ma ana uo ma
faifeautalai maoae
ma na pai atu i
olaga o le fia afe e
ala ia latou faatai-
taiga lelei.**

i le malamalama o le upumoni" (Mosaea 27:14). Na salamo Alema le Itiiti ma ana uo, na avea ma faifeautalai maoae, ma na pai atu i olaga o le fia afe o tagata i a latou faataitaiga lelei.

"Ma sa faapea ona avea o i latou ma mea faigaluega i aao o le Atua i le aumaio o le toatele i le malamalama o le upumoni, ioe, i le malamalama o lo tatou Togiola.

"Ma amuia lava i latou! Ona sa latou tala atu le filemu; sa latou tala atu tala e lelei o mea lelei; ma sa latou tautino atu i tagata o loo nofotupu le Alii" (Mosaea 27:36–37).

Na faia foi e au uo se faataitaiga lelei mo au ina ua latou filifili e auauna atu i ni misiona. E ui lava na ou feagai ma ni mea faatautee, ae na ou filifili ou te manao foi e auauna atu i se misiona. O lena faaiuga na faatulaga ai le vaega o totoe o lou olaga. A o ou auauna atu i le Misiona a Apia Samoa, na faatino e faifeautalai le tele o tiutetauave o le taitaiga faaleperisitua, ma na mafai ona ou vaaia le manaomia ona faamalosia o le Ekalesia i atumotu. Na ou faia lau faaiuga e fai lau vaega—o le a ou toe foi i Samoa pe a maea lau misiona ma lau aoga.

Ina ua maea le faauuga mai le iunivesite, na ma masii atu ma lou toalua i Samoa,

lea na ma tausia ai le ma fanau ma galulue ai e faamalosia le Ekalesia ma le nuu. O lou tama, e le o se tagata o le Ekalesia, sa aofia malosi o ia i pisinisi i le lotoifale ma mataupu faalenuu. O lana mautauave o le "Afai e taua le faia, e taua le fai ia sao." A o matou mauaina ma ou uso ma tuafafine le talalelei ma ola ai i le mea sili matou te mafaia, na ia matauina ni suiga mo le lelei i o matou olaga. I le 2000, na nofo ai Peresitene Gordon B. Hinckley (1910–2008) i le fale o lo'u tama ina ua foi mai o ia mai le faapaiaga o le malumalu o Suva i Fiti. I le taimi o lena asiasiga, na pai atu ai le Agaga i le loto o lo'u tama, ma na faamanuiaina au e papatiso o ia ina ua 82 ona tausaga. Na ia maua se olioli sili i le talalelei ma na le maasiasi o ia ae na lototoa i le faasoaina atu o le talalelei i isi i toe aso o lona olaga.

Ou te iloa le taua o le avea ma se faataitaiga o e talitonu ma le fiafia na te aumai i o tatou olaga ma olaga o isi. Ona o faataitaiga lelei a au uo ma le alofa o se perofeta, ua faamanuiaina ai lo'u aiga ma au i le olioli e aumai e le talalelei.

Tatou te uunaia i aso uma isi e ala ia tatou taga. Ia tatou mautinoa e aapa atu i isi ma faasoa atu le upumoni o lenei mau ina ia mafai ona ia aumaia le fiafia i o latou foi olaga. "Ia manatua, ia manatua o luga lava o le papa o lo tatou Togiola, o Keriso lea, le Alo o le Atua, e ao ina oulua atinae ai lo oulua faavae; ina ia pe a auina mai e le tiapolo ana matagi malolosi, ioe, ana ufanafana i le asiosio, ioe, pe a pesi mai ia te oulua ana uatoa uma ma lana afa malosi, o le a leai sona mana i luga o oulua e toso ifo ai oulua i lalo i le to o le pagatia ma le malaia e le gata, ona o le papa lea ua oulua atinae ai i luga, o le faavae mautinoa lea, o se faavae lea afai e atiae ai tagata e le mafai lava ona pauu i latou" (Helamana 5:12). ■

O Le Vaegaau e Sili ona Malosi.


Na ou fuafua ia avea ma se fitafita i le vaegaau. Ae ina ua ou mafaufau i lou lumana, na ou manatua le fesili a lou tina, "O afea ua e fuafua ai e te auauna atu faamisiona?"

Saunia e H. Daniel Wolke Canales

Talu mai lava lou laitiiti, na ou fiafia lava i tala a taitai o le Eklesia o e na auauna atu i vaegaau faaauppegaina. O le toatele o i latou na avea ma ni toa o le taua ma ni faataitaiga maoe o le lototoa ma le lotomualalo i o latou atunu. O o latou aafiaga na musuia ai au e auai i le militeli a lou atunu.

Ina ua 13 ou tausaga, na ou ulufale atu i se aoga na laulioa i le matua faatauaina o le puleaina faamiliteli ma aoaoga faafitafita. Sa faigata lava le faasologa o au mea e fai. Sa matuai ou lelava lava i le faaiuga o le aso lea sa foliga mai ai ua le mafai ona fai au suesuega o tusitusiga paia ma auai i le seminare.

E oo atu i lou tausaga lona lua i le aoga, ua ou faia ni fuafuaga mo lou olaga: pe a maea le aoga i le 18 tausaga, o le a ou alu sao loa i le aoga fitafita ma faauu ai i le fa tausaga mulimuli ane o se fitafita i le Vaegaau a Kuatemala. Ua foliga mai o ou moomooga ma miti uma lava ua amata ona taunu.



Na ou tau atu au fuafuaga i lou tina i se tasi aso, ma na fesili mai o ia, "O afea ua e fuafua ai e auauna atu faamisiona?" Na amata mai lena aso ona pipii pea lana fesili i lou mafaufau i taimi uma lava ou te mafaufau ai i lou lumana.

Sa i ai pea lana faasologa maiioio o mea e fai, ae na amata ona ou faaalia le fiafia atili i au aoaoga faaleagaga. Na amata ona ou auai i le seminare, galulue faatasi ma faifeatalai faamisiona, ma auai i gaoioiga a le Eklesia. I le mulimuli ai i le fautuaga a lou uso matua sa auauna atu faamisiona, na amata foi ona ou faitauina le Tusi a Mamona.

A o aoaoina au ia avea ma se tagata e oso i le faamalulele, sa matuai faigata lava a matou aoaoga i aso uma. Matou te foi atu i o matou


faleie toetoe lava a fetolofi, ae na ou mauaina pea le malosi e faitau ai le Tusi a Mamona. O le faitauina i aso uma o tusitusiga paia na faamalosia ai lou agaga ma fesoasoani ai ia te au e faaaauau a'u aoaoga faamasani.

Na potopoto faataaliolio i lou moega au uo i se tasi afiafi ma fesili mai nai fesili e uiga i le Tusi a Mamona ma le Upu o le Poto. O lou avanoa lea ia avea ai ma se fitafita sili—o se tasi e puipuia le upumoni ma aumaia le saolotoga e ala atu i se molimau mausali ma le talitonuina o le Tusi a Mamona.

Ina ua 19 ou tausaga, sa ou toelesitala i le vaegaau—o le vaegaau a le Atua, o le vaegaau sili ona malosi i vaegaau uma. Na ou maua le avanoa o le tutu soosoo tauau ma alii ma tamaitai faifeatalai totoa o Siona i le autau o le Misiona a Mekisiko Puebla. I le faaofuina i le ofutau a le Atua, na matou folafola atu le talalelei ma tau mo le saolotoga i le lototele ma le malosi.

O loo tatou tau ma le autau o le pogisa, ae o le manumalo e a le Atua ia. Ou te manao e faaaauau pea ona avea ma fitafita toa, e tau mo lo tatou Tupu. O loo ia i tatou ni mea tau malolosi: o le Tusi a Mamona, le Agaga Paia, ma le atoaga o le talalelei. Ua taitaiina i tatou i le manumalo e ni perofeta soifua. Afai tatou te aoaoina ma saunia i tatou lava mo le afio mai o lo tatou Faaola, o Iesu Keriso, o le a Ia tuuina mai ia i tatou ni palealii o le manumalo i le mamalu selesitila. ■

O La Tatou Avanoa



TATALO O LE ALUALU I LUMA O LE TAGATA LAVA IA

Saunia e Amalia Camila Wilte

Na aoaoina au e ou matua i lo'u olaga atoa e tatalo, ae a o ou tuputupu ae, na o le po lava e fai ai au tatalo patino. Na ou manatu ua lava lena—seia oo ina ua ou ulufale i Tamaita Talavou.

Ina ua tuuina mai ia te au le tamaitusi o le Alualu i Luma o le Tagata Lava ia, na ou faiatuna sini uma lava. Sa i ai se sini se tasi na ou gauai moni atu i ai: o se galuega faatino o le tulaga faatauaina o le faatuaua na fai mai e ao ona faia au tatalo i le taeao e faapena foi ma le po. "Aisea e fai ai i le taeao?" Sa ou fesili ai ia te au lava ia. "O le a le faigofie lena mea mo au."

Sa faagasolo le taimi, ma na ou le faataunuina lena sini. Ae na ou naunau e fai, ma e ui lava sa faigata, ae na ou faalagolago i le Alii.

Na foliga mai na tutusa lava mea uma i le taimi muamua. Ae na i ai se mea i totonu ia te au na amata ona sui. Na foliga mai na sili atu ona ou lagonaina le mautinoa i mea uma na ou faia. O a matou misa laiti ma lou aiga na le toe tupu. Pe a ou ala po mo le lotu, na ou le lagonaina le vaivai. Nai lo lena, sa i ai ia te au le manao tele e alu.

Sa i ai se aso faapitoa na ou mafaufau ai ua le lava se taimi e fai ai mea uma na tatau ona ou faia. Ina ua ou ala ae i lena aso, na ou tatalo—e ui lava sa leai se talitonuga tele—o le a i ai se mea e sui. Sa ou ofo i le mea na tupu: Na mafai ona ou faataunuina mea uma na tatau ona ou faia! Na ou lagonaina le maasiasi i le le faatuauaina atoa o le Alii ae na matua fiafia lava na Ia tali mai i lau tatalo.

O lenei la ua fai au tatalo i taeao ma afiafi uma, ma ua suia moni ai lava lou olaga.

Ou te iloa e faafogaga mai le Tama Faalelagi ia i tatou ma tali mai i a tatou tatalo. Pau lava le mea tatou te manaomia o le faatuaua ia te Ia. O le a Ia le tuulafoiina lava i tatou. O loo i ai o Ia iina. Pau lava le mea o lo tatou o atu ia te Ia. Ou te iloa o le folafolaga "tuitui atu, ona toina ai lea ia te outou" e moni (Mataio 7:7). Pau lava le mea o lo tatou tootutuli i lalo, tatalo, ma faatuauaina Lana taimi, ae le o lo tatou taimi. Ou te faafetai ia te Ia

mo le polokalama o le Alualu i Luma o le Tagata Lava ia ma le meaalofa ofoofogia o le tatalo.



O LE MAU E SILI ONA OU FIAFIA I AI

MF&F 64:10

O lau mau sili lea ona ou fiafia i ai ona tatou te faia uma ni mea sese. E leai se tasi e atoatoa sei vagana ai lesu Keriso, o lea e tatau ai ona tatou aoao e faamagalo e le tasi le isi pe a tatou faia ni mea sese.

Cedric G., 16 tausaga,
Luzon, Filipaina

AUINA MAI IA I MATOU LAU TALA

Pe i ai se mea na tupu ia te oe i le faaaogaina o fautuaga mai nei taiala o i le *Mo Le Malosi o le Autalavou?*

- Musika ma siva
- Soifua maloloina faaletino ma faalelagona
- Salamo
- Tausia o le aso sapati

Faamolemole auina mai lou aafiaga i le initoneti i le liahona.lds.org po o le i-meli i le liahona@ldschurch.org faatasi ai ma le "For the Strength of Youth" i le laina o le autu. I lau i-meli, ia aofia ai lou igoa atoa, aso fanau, uarota ma le siteki (po o le paranesi ma le itu), ma le faatagaga mai matua (i le i-meli) ina ia lolomi lau tali mai.



**Saunia e Elder
Larry R. Lawrence**
O Le Fitugafulu

"Na fanaua e matua lelei, o lea na aoaoina ai au teisi i le poto uma o lou tama" (1 Nifae 1:1).



AOAO E FAITAUTUSI

Tna ua ono ou tausaga, na ou tauivi e aoao le faitautusi. Na fai mai lou faiaoga e manaomia lou toe nofo i le vasega muamua. Na popole lou tama ina ua faalogo i lenei mea. Ma o po uma lava pe a maea le 'aiga o le afiafi, ma te faataitai ai le faitautusi ma ia. Na faia e Tama se taaloga faitautusi ina ia faatu-mau ai lou fiafia. Na vave ona ou iloaina upu pe a ou vaai i ai, ma na tauia a'u e Tama i le faaviiivii ma le faamalosiau. Na ma faaaluina le tele o itula e faitau faatasi ai, ma na faaleleia lo'u tomai.

Na filifili lou faiaoga e sii au i le vasega lua. Na mitamita lou Tama ia te au. Na fiafia pea o ia i lou alualu i luma i le aoga. Na ia faatauina mo au ni tusi na ia iloa o le a ou fiafia i ai mo le Kerisimasi.

Na maliu lou Tama i le kanesa, i ni nai masina talu ona maea lau aoga maualuga. E lei ola o ia e vaai ia te au o faau mai le kolisi po o le aoga faafomai, ae na lava le umi o lona ola e

iloa ai na ou aoao e fiafia e faitautusi. Na ia maua ai le faamalieina sili.

E lei avea matou ma lou aiga ma ni tagata o le Ekalesia. O se tasi aso a o ou i ai i le aoga faafomai, na ou aumaia ai se tusi mai le faletusi e ta'ua *O le Galuega Taua ma le Ofoofogia*. Na tusia e se Aposetolo e igoa ia Elder LeGrand Richards. O le tusi atoa lava sa faatatau i le Ekalesia a Iesu Keriso o le Au Paia o Aso e Gata Ai. Na ou faitauina le tusi ma toe faitau. Na ou suesue ma tatalo e uiga i le tusi. Na saunia au e le tusi e auai i le Ekalesia i ni nai masina mulimuli ane.

Ina ua maea ona papatisoina au, na ou iloa e mafai ona ou alu i le malumalu ma papatisoina mo lo'u tama. Na ia faia se eseesega tele i lo'u olaga. Ua iu ina mafai ona ou faia se mea faapitoa e faafetai ai ia te ia mo mea uma na ia faia mo au.

O loo ou fiafia pea e faitautusi. O le meaalofa na tuuina mai e lou tama ua faamanuiaina ai lou olaga i aso uma a o ou faitauina tusitusiga paia ma upu a perofeta. ■

UO Faifeautalai

Saunia e Jane McBride Choate

E faavae i se tala moni



"Valaaau atu i tagata uma ia o mai ia Keriso" (MF&F 20:59).

Na talosagaina e Alex ia lana uo o Jake la te taaalo i lona pale i le Aso Toonai. Na la fiafia i taavale tutuu ae vaia loa e Jake se ata o loo tautau i luga o le puipui. "O ai le la?" Na ia fesili atu ai, a o tusi lona lima i le ata o Thomas S. Monson.

"O Peresitene Monson le la," sa fai atu ai Alex.

E lei faia se tala a Jake.

"E te iloa, o le perofeta o la matou Ekalesia," sa fai atu ai Alex.

Sa foliga matamuli Jake.

"Matou te le'o toe o i le lotu," na ia fai atu ai.

"Aisea na tou le toe o ai?"

Na fesili atu ai Alex.

Na faamimigi tauau o Jake.

"Ou te le iloa."

"E te manao ta te o i le Aso Sa?"

Sa fesili atu ai Alex. E mafai ona ta o faatasi i le Peraimeri. E ese le lelei o lo'u faiaoga."



Sa susulu mai foliga o Jake. "Sei ou fesili i lou tina, ae ou te iloa o le a ia faataga au ou te alu," sa fai atu ai Jake.

I le taimi o le aiga o le aauli, na fesili ai Alex i lona tina, "E mafai ona ma o ma Jake i le Peraimeri taeao?"

"E tatau ona ta fesili i le tina o Jake," sa fai atu ai Tina. "Afai

e fai mai o ia ioe, ona mafai lea ona ia alu."

Mulimuli ane i lena aso, sa sau le tina o Jake e ave o ia.

"E mafai ona ma o ma Jake i le Peraimeri taeao?" Sa fesili atu ai Alex.

"E mafai, Tina?" Sa fai atu ai Jake. "Fai mai Alex e ese le manaia o le Peraimeri. E fai a latou tala, usu pese, ma aoao e uiga i tagata i totonusi o tusitusiga paia."

"Ou te le iloa," le tala a le tina o Jake, ma foliga le mautonu.

"Ua leva tatou te le o toe o i se lotu."

"Faamolemole, Tina," sa fai atu ai Jake. "Ou te fia alu."

"E talia fiafia Jake matou te o faatasi," sa fai atu ai le tina o Alex.

"E te mautinoa e te fia alu?" sa fesili atu ai le tina o Jake.

"Ou te mautinoal!"
Sa fai atu ai Jake.

"Ou te manatu la e le afaina," sa fai atu ai le tina o Jake.

Sa opo faavave e Jake lona tina, "Faafetai," sa ia fai atu ai.

I le taeao o le Aso Sa, na piki ai e le aiga o Alex ia Jake. Sa ia ofuina ona ofu o le Aso Sa. Ina ua uma le sauniga faamanatuga sa o tama i le Peraimeri. Ina ua la taunu i le vasega, na fai mai le faiaoga, "Ua matou fiafia lava e faatasi ma oe, Jake."

Ina ua tuua le lotu, na ave e le aiga o Alex Jake i le fale.

"Faafetai mo le aveina o au i le lotu faatasi ma outou," sa fai atu ai Jake.

Na ataata atu le tina o Alex ia te ia. "E le afaina, Jake. Matou te faamoe moe tatou te toe o foi," sa ia fai atu ai.

I le aiga o lena afiafi, na fesili atu Alex, "E mafai ona ou valaaulia Jake tatou te o i le lotu i le Aso Sa lea?"

Na lue atu le ulu o Tina. "O le a ou mulimuli i lau faataitaiga ma valaaulia foi lona tina tatou te o faatasi," na ia fai atu ai.

"O oe o se faifeatalai lelei, Alex," sa fai atu ai Tama.

Sa tei Alex. "Sa na o na avea lava o au ma se uo," sa ia fai atu ai.

"O le mea lena e ta'u o se faifeatalai," sa fai atu ai Tina, "o se uo." ■



"O le galuega faigofie lava ma masani ai o le faasoaina atu o le talalelei ia i latou tatou te popole ma alolofa i ai o le a avea ma galuega o le olioli i o tatou olaga."

Elder David F. Evans o le Fitugafulu,
"Pe na Aoga?" Liahona, Me 2012, 106.

O La Tatou Itulau



Nicolas M., 5 tausaga,
Colombia



Taitaiau o Moronae,
saunia e Ezra B., 9 tausaga,
Filipaina



O tamaiti o le Uarota a La Huerta, i le Siteki o Guadalajara Mekisiko Mirador, o loo sauni mo la latou polokalama o le sauniga faamanatuga.



Aiga e Faavavau,
saunia e Nicole M.,
5 tausaga, Pasila



Fofoaga,
saunia e
Melanie M.,
6 tausaga, Pasila



Alondra E., 5 tausaga, mai Kuatemala, e fiafia tele i le Peraimeri. O lana pese e sili ona fiafia i ai "O Au o se Atalii o le Atua." E iloa e ia e alofa le Tama Faalelagi ia te ia ma e moni le Ekalesia. E fiafia o ia i le vaega a tamaiti i le Liahona.



Sauniuniga e oo atu i le Konafesi Aoao

Emafai ona e saunia mo le konafesi aoao i le otiina o pepa nei ma faapipii pito ia maua ai se filifili. O aso taitasi mo le lua vaiaso a o loma le konafesi, ia aumai se sootaga mai le filifili ma fai le mea o loo tusia i le pepa. A o faasolo ina puupuu le filifili, ua faasolo ina lata mai le konafesi!

1. Faitau e uiga i le Liahona a Liae (tagai i le 1 Nifae 16:10, 28, 29 ma le Alema 37:38–40). E faapefea ona avea upu a perofeta e pei o se Liahona mo aiga i aso nei?

2. Saili ata o le perofeta ma aposetolo i le *Liahona* o Me po o Novema po o le [lds.org/church/leaders](https://www.lds.org/church/leaders) ma aoao o latou igoa.

3. Faapea ua valaaulia oe e fai se lauga i le Peraimeri e uiga i perofeta. O a au tala o le a fai?

4. Usu le viiga "la Via Oe le Atua, mo le Perofeta" (*Viiga*, nu. 10).

5. O le a le autu o le talalelei o le a e manao e aoao atili i ai i le konafesi? Fai se lisi o upu o le a e saili e faalogo i ai.

6. Tatalo mo le fesoasoani ina ia mataala ma lagona le Agaga i le konafesi. E mafai foi ona e tatalo mo taitai o le Ekalesia o le a lauga.

7. Faamatala i ou matua po o tagata o le aiga pe aisea ua e tulimatai atu ai i le konafesi.

8. Faitau e uiga i le Tupu o Peniamina o loo lauga atu i lona nuu (tagai i le Mosaea 2:1, 5, 9, 41). E faapefea ona tutusa lena sauniga ma le konafesi aoao?

9. Tusi se ata o le perofeta e sili ona e fiafia i ai mai tusitusiga paia.

10. Ia fai se api o talaaga lea e mafai ona e tusia ai faamatalaga pe tusi ni ata e uiga i lauga o le konafesi. E mafai ona e maua se tusigamanatu o le konafesi e mafai ona lolomi i le [lds.org/general-conference/children](https://www.lds.org/general-conference/children).

11. Usu le pese "Mulimuli i le Perofeta" (*Tusipese a Tamaiti*, 58–9).

12. Faitau e uiga i sa Nifae amiotonu i le 4 Nifae 1:12–13, 16. O le a le mea na latou faia ina ua latou potopoto faatasi?

13. Faitau le tala "Uo Faifeautalai" i le itulau e 60 o le lomiga lenei.

14. Talanoa e uiga i lenei aoaoga mai ia Elder M. Russell Ballard: Afai o le a outou faalogo i le perofeta soifua ma aposetolo ma usitai ia latou fautuaga, o le a outou le se ese lava" ("Ua Latou Saunoa Mai ia i Tatou," *Liahona*, lulai 2001, 116).



E mafai ona e faaaogaina le lesona ma le gaoioiga lenei e aoao atili ai e uiga i le autu o le Peraimeri i le masina lenei.

E Aoao Au e Tulafono e Sefulu ina ia **Alofa i le Atua** ma **Ana Fanau**

Na pisi lou aso! Na fesili mai lau uo i le vasega pe mafai ona ia kopiina lau meaaoga na fai i le fale. Na e manao e faamaoni, ma na e fai atu ia te ia e leai ae mafai ona e fesoasoani ia te ia.

Ina ua e foi mai le aoga, na e vaai i lou tuaoi o tau sii i luga se ato lapoa o fualau aina na ia faatoa tauina mai lana togalaau. Na e fia alu i le fale, ae na e tamoe atu ma fesoasoani ia te ia e sii le ato i totonu.

I le maea ai o le aiga o le afiafi na fai atu lou tama e fai lau meaaoga o le numera. E faigata le numera ma e te lei manao e fai, ae na e filifili e usitai i lou tama.

Na e lelava i le taimi e moe ai, ae na e tootuli i lalo ma faafetai i le Tama Faalelagi mo ou faamanuiaga.

Pe na e iloaina o le faia o nei filifiliga lelei uma, sa e mulimuli i Tulafono e Sefulu? Ina ua sosola tagata Isaraelu mai Aikupito, na latou manaomia le taitaiga mai le Alii. Na ala mai i le perofeta o Mose, na tuu mai ai e le Alii i tagata tulafono e sefulu e mulimuli ai ina ia ola i se olaga amiontonu. Ua aoao mai Tulafono e Sefulu e uiga i le faaaloalo i le Atua, faamaoni, ava i o tatou matua, tausia o le Sapati

PESE MA LE MAU

- "Tausi Poloaiga," *Tusipese a Tamaiti*, 146–47.
- Mataupu Faavae ma Feagaiga 42:29

ia paia, ma le avea ma tuaoi lelei. O nei tulafono o loo tumau pea le taua i aso nei e pei ona i ai i le fia afe tausaga talu ai. Afai tatou te mulimuli i poloaiga a le Alii, ua tatou aoao e alolofa ma faaaloalo i le Atua ma agalelei ma agaalofa ia i latou o siomia ai i tatou. ■

NA O OE

E mafai ona e maua Poloaiga e Sefulu i le Esoto 20. Pe mafai ona e faitauina uma le 10? Faailoga i se peni maka mau pe a e manao ai.



GAOIOIGA O LE FMT OLA I POLOAIGA

E mafai ona vaevae Poloaiga e Sefulu i ni vaega taua se tolu:
(1) faamamaluina o le Atua, (2) faaaloalo i matua ma aiga,
ma le (3) faaaloalo i isi.

Oti pepa faailoga e tolu o loo i lalo. E mafai ona e faapipiina
i ni fagu po o ni ato pe faataatitia i luga o se laulau. I luga o ni
fasi pepa eseese, tuu atu i tagata o le aiga e tusi i lalo ni nai mea
lelei na latou faia pe vaai o fai e se isi i le vaiaso ua tuanai ina ia

mulimuli i se poloaiga. Atonu na e faaalia le faaaloalo i le taimi o
se tatalo, pe na fesoasoani lou uso i ou matua e fai le meaai.

Faitau se tasi o pepa ona filifili lea faatasi o se aiga po o fea o
nei vaega e tolu e fetaui ma le aafiaga. Tuu le pepa i le fagu po o
le ato pe tuu i tafatafa o le faailoga i luga o le laulau. Faitau uma
pepa o totoe ma tuu i o latou vaega sao. O nisi o aafiaga e mafai
ona fetaui i ni vaega e sili atu ma le tasi.

FAAMAMALUINA O LE ATUA

FAAAALOALO I MATUA MA AIGA

FAAAALOALO I ISI

Saunia e Chad E. Phares

Mekasini a le Ekalesia

Talofa! O au o Timofei

mai Kyiv, Lukureini

*Na ou fesili i au uo e toatolu
i le aoga pe latou te talitonu
i le Atua. Na latou fai mai ioe.
Na ou fai atu e faa-
pena foi au. Na
ou tuuina atu ia i
latou se valaau-
lia ina ua tatala
le malumalu
mo maimoaga.
Na latou fai
mai, "Ua
lelei, o le
a matou
o atu."*



O Timofei e ono tausaga e nofo i Kyiv, Lukureini, le laumua o Lukureini ma le nuu o le malumalu muamua a lona atunu. Ua fafia lava Timofei i le malumalu fou ma isi mea e tele. Na faapitoa lava lona fafia ina ua pauu ona nifo muamua e lua. Na se'i e lona tama le isi i le fale o lona tina matua, a o le isi na pau ese lava ia.



*Na amata i le tausaga lenei ona fai au
lesona karate ona o loo aoao foi e
iou tama ma lou uso le karate.
Na ou aoao e velo atu ni tu'i
malolosi, puipuia au, ma sii
ni mea mamafa.*





*Ma te fiafia ma
iou uso e fausia
ni fale, taavale,
ma ni tagata laiti
ia ma fasi poloka.*

*Na auauna atu ou uso i le fale
tatala o le malumalu. Na ou
manao ou te auauna atu foi, ae
na ou laitiiti tele. Na ou alu faa-
lula i le maimoaga i le fale tatala
o le malumalu. Na ou matuai
fiafia lava i ai.*



*I le taimi o le taumafanafana
na aoao ai a'u e ou uso e toalua
e taalo soka. Na aoao au e tamoe
i le malae ma puipui le tini. E ui
lava e matutua i laua, ae matou te
taaalo ma i laua ma a la uo.*



*Ou te fiafia i au tamai taavale.
Ona e fai i uamea, e le ta'e ai
ma faaleagaina. Ua umi tele o i
ai au meataalo, ma e tau leai ni
maosiosia.*

*Ou te matuai fiafia lava e
momoe ma au meataalo i le po.
Pe a momoe o'u uso, ou te taalo
pea mo sina taimi i au meataalo.*



Sa Asiasi IESU i **TAGATA SA NIFAE**

Saunia e Diane L. Mangum

Na ufitia le laueelele o sa Nifae i le pogisa mafafia mo aso e tolu. Na leai sina susulu o le la po o se emo mai o se malamalama o se fetu. Na matuai pogisa lava e oo lava i se moli gao ua le mumu.

Na faalogo sa Nifae matatau i le faiitili ma afa matautia ma lagona le eleele ua luluina e mafuie. O le taimi lea ua fetagisi tagata ma uio i le pogisa. Na latou mafaufau mai-mau pe ana latou mulimuli i aoaoga a le perofeta o Nifae ma salamo!

E PEI ONA OFAOFATAI E LE MATUA MOA O LANA TOLOAI


Na tau atu e lesu i sa Nifae na la taumafai e ofaoftai ia i latou e pei ona ofaoftai e le matua moa lana toloai i lalo o ona apaa ina ia latou saogalemu ai. O le uiga o Lana fetalaina e alofa o la ia i latou uma lava ma na finagalo e leoleo i latou ma tausia i latou ia saogalemu.

Na faafuasei ona faalogoina se leo i le laueelele uma: "Faauta, o au o Iesu Keriso le Atalii o le Atua. O au na foafoaina le lagi ma le lalolagi, ma mea uma o i ai. O au na ou i ai faatasi ma le Tama mai le amataga."

Na fetalai atu Iesu na afio mai o Ia i le lalolagi e faaolaina le lalolagi mai le agasala. Na Ia tuuina i lalo Lona soifua ma ua toetu nei. Na Ia valaaulia tagata uma ia salamo ma ia faaolaina.

Na matuai ofo sa Nifae e faalogo i le siufofoga o Iesu ma na latou nonofo filemu mo le tele o itula, ma mafaufau loloto i mea na latou faalogo i ai.

Na toe malama le taeao, ma na amata ona olioli tagata. E toatele tagata na potopoto faataamilo i le malumalu i le laueelele o Nuumau e talanoa e uiga i mea ofoofogia na tutupu. Ona latou faalogoina



lea o se leo filemu mai le lagi. Na mu o latou loto ona o le leo, ae latou te lei malamalama i ai.

Na toe oo mai le leo, ae latou te lei malamalama lava i upu.

O le taimi lona tolu na oo mai ai le leo, ma faapea mai, "Faauta i lou Atalii Pele, o le ua ou fiafia lava i ai, o le ua ou faamamaluina ai lou goa—ia outou faalogo ia te ia."



Na tetepa ae tagata i luga ma
vaaia Iesu ua afio ifo i lalo mai le
lagi seja oo ifo o Ia ma tu i le toto-
nugalemu o i latou. Na pauu sa
Nifae i le eelele. Na latou manatua
upu a perofeta—o le a asiashi atu
Iesu Keriso ia i latou pe a maea ona
faasatauroina ma toetu mai o ia.

Na faatagaina e Iesu tagata uma
e tagotago atu i Ona lima ma vae

ma tagotago i tulaga na
tutu'i ai o Ia i le satauro
i Ierusalem. Ina ua
vaai ma tago atu i latou
lava, na latou iloa o Ia
o le Faaola toetu. Na
latou alalaga, "Osana!"
ma tapuai ia te Ia.

Na valaau Iesu i le
perofeta o Nifae e sau



NIFAE

E toafa perofeta e
igoa ia Nifae i le Tusi a
Mamona. O Nifae, lea
na vaai ia lesu toetu
ma o Lona soo, na
soifua i le 600 tausaga
ina ua mavae Nifae, le
atalii o Liae.

ia te Ia. Na Ia tuuina
atu ia Nifae ma isi alii
amiontonu e 11 le pule
e aoao ma papatiso ai
pe a toe foi atu o Ia i
le lagi. O le 12 lenei
na avea ma soo o le
Ekalesia a Iesu Keriso
i le Lalolagi Fou. ■

Mai le 3 Nifae 8–12.

Peraimeri Faataitai

Saunia e Tryn Paxton

E faavae i se tala moni

1. Sa lei mauaina e Sofia se lagona lelei a o nofo ifo o ia i lalo i le 'aiga o le taeao o le Aso Sa.

Talofa e, Sofia.
Ua e ma'i tele e alu ai nei i le lotu.

2. Na amata ona tagi Sofia.

Ae ou te fia alu i le Peraimeri.

Atonu e mafai ona ta faia se mea faapitoa i le fale.



3. Sa faanoanoa Sofia. Na alu o ia i lona potu ma ufi ona foliga i lona palanikeke. Ona oso ae lea o sona manatu.

Atonu e mafai ona ta faia nei se Peraimeri faataitai i le fale.

4. A o sauni tuagane o Sofia mo le lotu, na fai foi e Sofia ona ofu mo le Aso Sa. Na ia faafouina foi ana pepe ma manu meataalo i ofu mananaia ina ia latou o mai foi i le Peraimeri faataitai.



5. Ina ua o uma le aiga i le lotu, na suia e Sofia ma Tina le potu malolo e avea o se potu o le Peraimeri faataitai. Na faapipii e Sofia ata o Iesu i le puipui ma aumai le *Tusipese a Tamaiti* mai le fatatusi. Na ia aumai foi ni penivali gao ma tusitusiga paia.



6. Na saofai Sofia i le nofoa faatasi ma ana pepe ma manu meataalo. Na fai e Tina se tatalo amata. Ona usu lea e Sofia ma Tina le "O Au o se Atalii o le Atua" ma le "Ou Te Fia Vaai i le Malumalu."

7. Na fiafia Sofia i le taimi o le Peraimeri faataitai. E oo foi i ana pepe ma manu meataalo na nonofo filemu.



8. Ina ua maea le Peraimeri faataitai, na faataoto e le Tina ia Sofia i lona moega mo se malologa.

Faafetai mo le
faia o se Peraimeri faataitai
faatasi ma au. Ae ua le mafai ona
ou faatali e alu i le Peraimeri
moi i le vaiaso lea.



O LE A LE MEA E TUTUSA AI?

Ina ua mai tele Sofia e alu i le Peraimeri, na la faia ma lona tina le potu malolo e avea ma potu o le Peraimeri faataitai. Vaai pe mafai ona e mauaina mea e tutusa ai ata e lua.





ATA NA TUSIA E VAL CHADWICK BAGLEY

Saunia e Val Chadwick Bagley

Olenei faifeautalai ua toe foi i le aiga ina ua maea ona auauna atu i le Tama Faalelagi o se faifeautalai. Vaai i le ata ma sue pe fia ni mea o loo nanaina e mafai ona e mauaina, e aofia ai peisipolo, tusi, pesini, pepe

lele, taavale, penivali gao, ipu ti, vaemoa, teutusi, tui, pate tapolo, samala, maua, naifi, apefai, pulumu vali, penitala, fasi pepa, vase, sikulukalaiva, totini, sipuni, faleie, pulumu fulunifo, faamalu, ma le fasi meleni.

Tala Fou o le Ekalesia

Asiasi ane i le news.lds.org mo se faaopoopoga o tala fou ma mea e tutupu i le Ekalesia.

Ua Faamanatuina e Tamaitai o le Aualofa i le Salafa o le Lalolagi le 170 Tausaga

Saunia e Lok Yi Chan

Tala Fou ma Mea e Tutupu i le Ekalesia

Na ia faamamaluina le 170 tausaga o le faalapotopotoga a le Aualofa, ua auai ma le filiga ia tamaitai mai le salafa o le lalolagi i auauлага ma isi gaoioiga ua latou punouai ai i le galuega a le faalapotopotoga.

Na auina atu e le au pulega aoao a le Aualofa, ia Fepuari se valaaulia i tamaitai i le lalolagi atoa, ua fautuaina atu ai ni gaoioiga talafeagai faifai pea se valu mo le faamanatuina o le aso fanau—lea na faataunuina i le Aso Toonai, 17 o Mati, 2012. E mafai ona fuafuina gaoioiga i lalo o le taitaiga a taitai perisitua o le lotoifale.

Ma na tali mai tamaitai i le salafa o le lalolagi. O nisi nei o otootoga faapitoa mai nisi o faamamaluga na faataunuina i le Ekalesia atoa.

Ripapelika Tominika

O tamaitai mai le Paranesi Muamua a Primavera o le Itu o La Vega i Ripapelika Tominika na manatuaina le lē manatu faapito o tamaitai mai le talafaasolopito anamua o le Au Paia o Aso e Gata Ai ma la latou talatuu faavavau i le faamamaluga a le paranesi i le aso 17 o Mati.

O tamaitai taitoatasina auai na oofu faapaonia ma faasoatua se savali e uiga i le Aualofa. O María Elena Pichardo de Gómez, le fesoasoani muamua i le au peresitene

o le Aualofa, na ia faamanatu atu i tamaitai lo latou tiute o le saunia mo taimi faigata, e pei ona aoaoina mai e perofeta o aso nei. Na ia faaopoopo atu, “O le malosi sili o le Aualofa a le Paranesi Muamua a Primavera o loo i totonusi o lo matou eseesege ae ua fusia faatasi i matou e le talalelei e tasi.”

Fiti

I le mulimuli ai i le fautuaga a le au peresitene aoao o le Aualofa ia “faatulaga ni auauлага a le Aualofa i le alalafaga,” na faalauiloa ai e le Aualofa a le Uarota a Samabula o le Siteki a Suva Fiti i Matu se galuega faatino faifai pea e taua o le “Faia o se Eseesege—E Le Uma le Alofa.” Na tofutama i le uarota ma se sini ina ia faia se galuega fesoasoani, alofa, po o le agalelei atu e faa-170 taimi—i tagata eseese uma lava—seia oo i le faaiuga o Setema o le 2012.

Na faia foi e le uarota se gaoioiga e fesoasoani ai i tamaitai ina ia malamalamai atili ai ma talisapaia ia olaga ma saofaga a peresitene aoao uma o le Aualofa, e amata mai ia Ema Samita.

Hong Kong

I Hong Kong, na faamamaluina e tamaitai mai le Siteki o New Territories le aso fanau o le Aualofa e ala i le toe

tepa o latou lava talafaasolopito faapea ma le Aualofa.

Sa latou faatulagaina se faaaliga, e faaautu faapea “Sailiga mo le Alofa Tunoa,” lea na latou faaalia ai ni atatuai o faifeatalai, faamaumauga a aiga, ata vali, ma galuega taulima na faia i gaoioiga e Aualofa anamua, e aofia ai ni moli matagi ma pipi e fai i taga pepa mumu, galuega suisui, tautau ki, ma ato tupe.

Kenya

I le Paranesi a Bamburi o le Misiona a Kenya Nairobi, na foaina atu ai e tamaitai o le Aualofa le tupe semanu latou te faaaaogaina i se gaoioiga ae faatau ai mea e manaomia mo le umukuka ma isi aitema na manaomia e le paranesi. Ina ua uma ona faamamaina maeaea le falelotu i le lotoifale, na faapotopoto tamaitai o le uarota mo se taimi o le toe tepe i tua i le foafoaina o le Aualofa i le 1842, i le faaaaogaina ma le talanoaina o punaoa mai le *O Afafine i Lo'u Malo: O le Talafaasolopito ma le Galuega a le Aualofa*.

“O le mafaufau atu i le avea ma se vaega o lenei faalapotopotoga i le lalolagi atoa o le Aualofa e faapitoa,” o le tala lea a Irene Kioi, le fesoasoani lua i le au peresitene o le Aualofa. “Ua faamautinoa mai



Na faia foi e le Aualofa o le Uarota a Samabula o le Siteki a Suva Fiti i Matu se gaoioiga e fesoasoani ai i tamaitai ina ia malamalama atili ma talisapaia ia olaga ma saofaga a peresitene aoao uma o le Aualofa, e amata mai ia Ema Samita.

ai ia te au faapea o le [Aualofa] ua faauuina e le Atua ae le o tagata.”

I le Paranesi a Mombasa, na suesue tamaitai e uiga i soo tamaitai o Iesu Keriso mai le *O Afafine i Lo'u Malo* ma le Feagaiga Fou. O le peresitene o le Aualofa o le paranesi, o Jael Mwambere, na faapea mai, “O la matou faamomaluga muamua lenei mo le Aualofa a le Paranesi a Mombasa. O lou faamoemoe ina ia matou amataina se tautinoga fou i o matou tiute i le Aualofa. Tau ina ia matou fetausiai, auai i a matou sauniga Lotu, ma fesoasoani i e manaomia le fesoasoani, e amata atu nei.”

O Le Ripapelika o le Atu Maresala

O le Aso Toonai, aso 17 o Mati, e faitau selau tamaitai mai le Paranesi

a Ajeltake, le Uarota a Laura, ma le Uarota a Long Island Majuro o le Siteki a Majuro Marshall Islands na feiloai i Rairok, o se taulaga e latalata i le Majuro Atoll, i le 4:30 i le taeao. O le mafuaaga: sa latou savavali mo se itula ma le afa agai i le falelotu o Delap e faaali atu ai le uiga o le taua naua o le tumau. Na latou feiloai mulimuli ane ma tamaitai o Uarota a Delap ma Rita, o e na savavali foi i le falelotu, mo se faigalotu ma le malu taeao. Ma mulimuli ane faatino ai e tamaitai tala ma siva ma faalogologo i se lauga mai le peresitene o le siteki.

Sepania

Na faia se faaaliga o le talafaa-solopito o le Aualofa a le Uarota a Dos Hermanas o le Siteki a Seville i

Sepania ma na faaaofia ai se tusi faapitoa o ata o le auaunaga ma gaoioiga na faatinoina faatasi e tamaitai i le aluga o taimi.

O María Pérez Sánchez, o le fesoasoani muamua i le au peresitene o le Aualofa, na saunoa mai, “[O le] mafai ona auai i le aso fanau o lenei faalapotopotoga ua ou latalata atili ai i na tamaitai paionia o e na ositaulagaina le tele o mea mo i tatou. Ma o lenei, i le aso, e mafai ona tatou faaauauina le faiga o lenei galuega na latou faia.”

O Le Iunaite Setete

Sa faamanatuina e tamaitai o le Uarota a Gardner o le Siteki a Springfield Massachusetts, le 170 tausaga o le Aualofa i se taumafataga o le afiafi na faia i le aso 15 o Mati. Na aofia ai i le afiafi ni saunoaga mai ni tamaitai se toafa, sa latou talanoa taitasi mai e uiga i se tamaitai na faatosinaina lona olaga i se tulaga lelei. Na aumaia foi e failauga taitoatasie se mea faitino laitiit i faamamafa mai ai lana aoaoga.

“O lenei gaoioiga na siitia ai le malosi ma le taua o tamaitai” na saunoa ai Jennifer Whitcomb, le peresitene o le Aualofa, “ma na faamalolosia foi i matou e vaai atu i malosiaga, mea e tutusa ai, ma le taua o isi.”

E ui lava ina ua tuanai atu le aso fanau, ae o le valaaulia mo tamaitai ia auai i auaunaga ma isi gaoioiga faamamaluina e faaauau pea mo le 2012 atoa. ■

Na tatalaina e le Polokalama o Lima Fesoasoani le Ala mo le Galuega Faafaifeautalai Faamisiona, i le Siteki Fou i Amapá, Pasila

Saunia e Michelle Sá, faatasi ai ma le fesoasoani mai ia Elder Fabiano Cavalheiro

O le Aso Toonai, 10 o Mati, 2012, e toa 21 tagata na ui ifo i le vai o le papatisoga. O se fuainumera sili lea le toatele o ni tagata i tausaga ua tuanai i setete o Para ma Amapá i Pasila, i vaega uma o le Misiona a Brazil Belém, na mauaina le sauniga o le papatisoga i le aso lava lea e tasi ma avea ma “nuu faatasi” ma le Au Paia (Efeso 2:19) ma savavali “i le ola toefuataiina” (Roma 6:4).

O papatisoga na oo mai ina ua faatoa maea lava le faasalauga o le itu o Macapá o le a avea ma siteki, lea na tupu i le aso 14 ma le 15 o Aperila.

Na tuufaatasia uma au taitai,

tagata, ma faafeautalai faamisiona i le galulue ai i lenei ituaiga o le tuputupu ae. O le galuega o le polokalama o Lima Fesoasoani ua avea foi ma mea faigaluega i le galuega faafaifeautalai talu ai.

“O galuega faatino a Lima Fesoasoani na faia i le lua tausaga talu ai i le setete o Amapá ma ua aumaia le Ekalesia mai le pogisa, fagua ai taitai faale-malo, le au tusitala, le atunu lautele i le manao ia iloa lenei polokalama matagofie ma le lotu o loo lagolagoina,” na saunoa i ai José Claudio Furtado Campos, peresitene o le Misiona a Brazil Belém sa faamalolo talu ai nei.

O le mea moni, na matua

fesoasoani tele ia galuega faatino i le setete ma o lea na tuuina mai ai e taitai faalemalo ni aso malolo fou se tolu i lea itu: O le aso 6 o Aperila, o le Aso o Le Ekalesia a Iesu Keriso o le Au Paia o Aso e Gata Ai; aso 30 o Iulai, Aso o Lima Fesoasoani Tuufaatasi; ma le aso 23 o Setema, o le Aso “O Le Aiga: O Se Folafolaga i le Lalolagi”. Ma le isi, o se tuufaatasiga o le faafetai i le Ekalesia na tuuina atu ia Elder Jairo Mazzagardi o le Fitugafulu, Fesoasoani Lua i le Au Peresitene o le Eria i Pasila.

“O galuega faatino a Lima Fesoasoani ua fesoasoani i le mauaina e le Ekalesia o le faatuaua a tagata o Amapá,” o le saunoaga lea a Peresitene Campos. “Pe a faailoa atu e a tatou faafeautalai faamisiona i latou lava . . . , e tau atu e tagata ia i latou ua leva ona latou faalogo e uiga i le Ekalesia aua na latou vaai i ni tusi po o ni ata i le televise, i le leitio, ma le nusipepa. Ua latou faalogo i mea maoae e uiga i le Ekalesia, ma o lenei mea e masani ona faateleina ai le taliaina o le galuega a faifeautalai.”

O Michelle Sá o le faatonu fesoasoani o mataupu tau i le va i fafo, o le Siteki o Macapá Brazil; o Elder Fabiano Cavalheiro o se faifeautalai faamisiona o loo galue i le Misiona a Brazil Belém. ■

ATA NA PUEINA E MICHELLE SÁ



Ua Saunoa Taitai o le Ekalesia i Faauuga i Hawaii, Idaho, Iuta

Na malaga taitai o le Ekalesia i aoga a le Ekalesia i Hawaii, Idaho, ma Iuta, ISA, ia Aperila e tuuina atu ni upu apoapoi i le au faau.

Sa tuuina atu se fautuaga i tamaiti aoga o le Iunivesite o Polika Iaga–Idaho i le aso 7 o Aperila, 2012, e Elder M. Russell Ballard o le Korama a Apostolo e Toasefululu faapea, ia “sui le fefe i le faatuatua.”

“Ou te talitonu ua tatou tutu nei i le amataga o se vaitaimi fou o le faatupulaia, uluola, ma le tamaoaiga,” na ia saunoa ai. “Ou te uunaia outou ina ia faia se tautinoga ia te oe lava ia ma le Tama Faalelagi ina ia tuuto atu lou ola ma faapaiaina ou taimi ma taleni i le fausiaina o le Ekalesia a Jesu Keriso ma ia tulimatai atu i le toe Afio Mai Faalua o le Faaola.”

Na asia e Elder D. Todd Christofferson o le Korama a Apostolo e Toasefululu le Kolisi Faapisinisi a le AAG i le Aai o Sate Leki, Iuta, i le aso 13 o Aperila, 2012, e tuuina atu le saunoaga faapitoa i tamaiti faau mai setete uma e 50 o le IS ma atunu 67.

Na ia faamamafa atu le manaoga mo tamaiti aoga ina ia auauna atu i o latou olaga atoa. “O le auauna atu o le a avea ma puipuiga i le manatu faapito ma le manatu e te maua mea uma lava lea e faaleagaina ai pea lava pea ia atunu i le salafa o le lalolagi. . . . O lau auaunaga o le a faamamuiaina ai isi, ae o le a puipuia ai foi oe,” na ia saunoa ai.

O le aso na sosoo ai, na tuuina atu ai e Elaine S. Dalton, o le peresitene aoao o Tamaitai Talavou, nei upu apoapoi i tamaiti aoga i le BYU–Hawaii: “Manatua po o ai oe.” Galue malosi. “Saunia oe lava mo le fili.” “Miti mo mea tetele.” “O tagata manumalo e le o taimi uma e tini muamua ai.”

“Momo’e i lau malafoni o le faatuatua ma le olaga,” sa ia saunoa ai. “Aua le lotovaivai ona o

a’ega, ae vaai mo le avanoa i taimi faigata. Alu ma se vae mautu ma se malamalama mausali e le tuua lava na o oe. . . . Ou te talitonu moni lava e mafai e se alii talavou po o se tamaitai talavou amiomama e toatasi o loo taitaia e le Agaga ona suia le lalolagi.”

O le aso 19 o Aperila, 2012, na faalogo ai tamaiti faauu o le BYU i Provo, Iuta, ia Elder Dallin H. Oaks o le Korama a Apostolo e Toasefululu, o saunoa e uiga i luitau o le lalolagi ae sa ia tau atu i le au



Na faalologolo ia tamaiti faauu o le Iunivesite o Polika Iaga i Provo, Iuta, ISA, ia Elder Dallin H. Oaks o le Korama a Apostolo e Toasefululu i le aso 19 Aperila, 2012.

faauu ina ia taulai atu ma le faatuatua i le lumanai.

“E ui lava e oti foi tagata i le matatau, e tatau ona e matau. Na i ai lava taimi faigata,” o le saunoaga lea a Elder Oaks. “O i matou, o tupulaga a o outou tuaa, ua manumalo mai luitau, ma e faapena foi outou. . . . O loo i ai so tatou Faaola, ma ua ia aoaoina i tatou i mea e ao ona tatou faia.”

Mo nisi faamatalaga i lenei tala ma isi savali mai taitai o le Ekalesia, asiasi i le itulau o Prophets and Apostles Speak Today i le prophets.lds.org. ■


O Faafanua ua Faaleleia a le AAG ua Fesoasoani i Tagata Lotu e Iloa ai Nofoaga o le Ekalesia

O se vaega fou o ata e tele o Faafanua a le AAG e aofia ai le tele o ituaiga ata o le a faaleleia ai le aafiaga o tagata lotu i le sailia o tagata o le siteki, faletapuui, malumalu, ma isi fale o le Eklesia.

Ina ia maua ia Faafanua fou a le AAG, alu i le **LDS.org > Tools > Maps**. O loo maua i gagana e 16—Saina, Siekisolovakia, Tenimaka, Take, Igilisi, Finelani, Farani, Siamani, Italia, Sapani, Korea, Nouei, Potukale, Rusia, Sipaniolo, ma le Suetena.

O nisi o ata fou e aofia ai faamaoniga o fale, le tele o filifiliga o ata faaalia o faafanua, e sili atu le faigofie i iPad ma tamai api komepiuta, faafanua o tuaoi o iunite, le Ata o le Locate Me, ma isi lomiga ua faaleleia.

O se faalauiolaina fou o Faafanua o le AAG e aofia ai faamaoniga o fale, le tele o ituaiga o ata faaalia o faafanua, e sili atu le faigofie o iPad ma tamai api komepiuta, faafanua o tuaoi o iunite, le ata o le Locate Me, ma lomiga ua faaleleia.



O tagata o loo faaaogaina le lomiga fou e mafai ona sailia nofoaga o le AAG mo tapuaiga, maimoa i faatonuga o ala o taavale ma lolomiina, ma faasoa atu fesootaiga o le faafanua i faasalalauga lautele. E faapea foi, pe a saini i totonus o le Faitotoa a le AAG, e mafai e tagata lotu ona maimoa i faamatalaga o uarota ma siteki e faapitoa ia i latou ma eria o loo siosiomia ai i latou.

Valaaulia Tagata Lotu e Auina Mai Ata Pue o le Konafesi Aoao i Mekasini

Ua talosagaina e mekasini o le *Liahona* ma le *Ensign* ia tagata lolotu ina ia auai i le konafesi a sau, ma isi konafesi aoao o mulimuli mai, e ala i le auina mai o ata e faatatau i konafesi mai ia latou eria o le lotoifale i le taimi lava e maea ai le konafesi. O nei ata pue o le a fuafuaina

e faasalalau atu i lomiga o mekasini o Me ma Novema.

E mafai ona vave ma faigofie le auina mai e tagata lotu o a latou ata i le LDS.org e ala i le alu i le **Menu > Magazines** (po o le ta i totonus o le **lds.org/magazine**), ma kiliki le **Auina mai Lau Tusiga** i le koluma taumatau o le itulau autu o le mekasini.

E maua foi i itulau o le *Liahona* ma le *Ensign* vaega ua ta'ua "Auina mai Tusiga" lea e mafai ai e tagata lotu ona maua ia fomu i le initoneti e auina mai ai ata.

E tatau i tagata lotu ona iloilo le Image Guidelines ao lei auina mai a latou ata. O taiala i lalo o le "Ata o le Konafesi Aoao" o loo faamanino mai ai le faatulagaina o le ata, le tulaga lelei, ma le atoatoa o loo sailia e faatonu o le mekasini, e faapea foi le taimi faatapulaaina mo ata o le konafesi e auina mai.

Ua Maua Nei i le Tamai Api Komepiuta le *Liahona*

Ua fai e le Eklesia se ituaiga fou o tamai api komepiuta o loo faaalia ai anotusi o le mekasini. O loo aofia i le api komepiuta *Liahona* a le AAG ni lomiga o le mekasini o Oketopa 2011, Novema 2011, ma Me 2012—i nisi upu, lomiga o le Tusi a Mamona ma lomiga o konafesi aoao e sili ona lata mai e lua.

E maua le *Liahona* a le AAG i le gagana Peretania, Potukale, ma le Sipaniolo ma e ofoina atu aafiaga e sili atu le fesootai—ma loloto foi o le mekasini—; mo se faataitaiga, e mafai e tagata o faaaogaina le mekasini ona faitau i le mekasini ao faalogologo i se faila faalogologo o lena lava tusiga. Ua manamuina le api komepiuta mo le faaaoagaina i luga o komepiuta Android po o le Apple. ■

O Mea Laiti ma Faatauvaa

O loo auauna atu lou atalii o Taylor (Elder Mulford) i se misiona i le motu o Bora Bora i Tahiti. Sa ia tau maia ia te au e lei leva talu ai nei na sau ai le peresitene o le siteki i Bora Bora ma tau atu i faifeautalai faamisiona lona asiasi atu i se tagata oti ulu, o se tagata lotu, e oti lona ulu. Na ia fesili i le oti ulu pe aisea ua leai ai ni mekasini o le *Liahona* faapea ma isi mea mo ana malo e faiatau. Na folafola atu e le oti ulu o le isi taimi e sau ai, o le a i ai *Liahonaiina*. Ae peitai, o le isi taimi na alu atu ai le peresitene o le siteki i le oti ulu, e lei i ai lava ni *Liahona*. I lona faanoanoa tele, na ia fesili ai i le oti ulu pe aisea. Na faalmalamalama mai e le oti ulu o taimi uma lava na te tuuina ai se *Liahona* i luga, e faiatau e se tagata, fesili atu ni fesili se tele, ona fesili mai lea pe mafai ona ave ma ia. Na fai mai le oti ulu ua leai ni ana mekasini e tuuina atu, ae na ia faaopoopo mai o le tele o tagata na aveina mekasini ua fai nei a latou lesona ma faifeautalai.

Pe mafai ona e mafaufau po o le a se mea e tupu pe afai e tuu e fomai, fomai nifo, ma oti ulu uma o le Ekalesia ni nai mekasini a le Ekalesia i totonu o lona potu faatalitali? Ua agai i luma le Ekalesia ona o mea laiti ma faatauvaa ua faia e tagata lolotu.

Burdell Mulford, Iuta, ISA

Faamolemole auina mai ni finagalo faaalia po o fautuaga i le liahona@ldschurch.org. E ono faapupuuina tala mo le uumi po o le manino. ■

O lenei lomiga e aofia ai tusiga ma gaoioiga e mafai ona faaaoga mo afiafi faaleaiga. O nisi nei o faataitaiga.

**"Atiina Ae o le Faatuatua ia Keriso,"**

itulau 12: I le faiuga o le tusiga, na saunoa ai Elder Christofferson i le avea o le faatuatua o se mataupu faavae o le faagaoioi ma le mana. I le avea o se aiga, mafaufau i le talanoaina o nisi o luitau o feagai ma oe ma sini e mafai ona e faatuina e foia ai. Filifili se sini se tasi e galue ai i lenei vaiaso, ma manatua, faatasai ai ma le fesoasoani a lesu Keriso, tatou te maua le mana e fai ai mea uma, e tusa ai ma Lona finagalo ma Lana taimi. I se afiafi faaleaiga o sosoo ai, atonu e te manao e talanoaina le alualu i luma o lou aiga i le sini na e faatuina.

"Faasoaina atu o le Talalelei e ala i le Faasoaina atu o Oe Lava," itulau 16:

Ao e faaso atu tala mai tusiga, fesili atu i lou aiga e mafaufau i uo ma tagata o aiga e mafai ona faasoa i ai le talalelei. Talatalanoa pe faapefea ona avea ma se uo ma faalogologo atu ma le alofa ma pe a oo mai avanoa e tuuina atu ai le molimau, ua e saunia.

"Tatalo o le Alualu

i Luma o le Tagata Lava ia," itulau 58: Faitau le aafiaga a Amalia i le aoaoina e tatalo i le taeao faapea foi ma le po. Mafaufau e faitau le aoaoga a Amoleka i le Alema 34:17–27 i le auala e tatau ona tatou tatalo ai. Atonu e te manao e fesili atu i tagata o lou aiga po o a aoaoga ua tuuina mai e nei fuaiupu e uiga i le auala ma po o afea foi tatou te tatalo ai. Faaiu i le tuuina atu o lau molimau i le mana o le tatalo.

"Uo Faifeautalai," itulau 60: A maea ona faiatau le tusiga, mafaufau i le faia o se lisi o gaoioiga ma fonotaga ua lata mai a le Ekalesia e ono fiafia i ai uo a tagata taitoatas i le aiga. Atonu e te manao e faataitai ma faatino auala e valaaulia ai uo i se tasi o gaoioiga. Talanoa e uiga i le avea ai ma se uo moni, ae maise lava ia i latou e le o ni tagata o le Ekalesia. Faaiu i le faia o se fuafuaga e faafesootai le uo ma tuuina atu i ai le valaaulia. ■

O i Matou o se Aiga Fiafia


O le afiafi faaleaiga sili ona matou fiafia i ai matou te manatuaina o le afiafi faaleaiga lea na faia i se taimi faigata lava. Ona o se suiga i le pulega o galuega, sa feagai ai lou toalua ma ni luitau tau i le galuega ma sa lagonaina le lotovaivai.

Na matou filifili o le afiafi faaleaiga i lena vaiaso o le a faamamaluina ai o ia. Na tusia e tagata uma o le aiga se tusi faafetai, e tau atu ai matou te alolofa ia te ia ma le mea matou te faamoemoeina mo ia. Ona matou faia lea o se tusi ata o le aiga i taimi faapitoa, e pei o aso faailogaina, faaipoipoga, faamauga, aso fanau, ma isi gaoioiga. Na matou tusia se faamatalaga i talaane o ata taitasi, ae faaiuina i le "Ma o i matou o se aiga fiafia." I le faiuga o le afiafi, na ma usuina ma lau tama teine se pese Peraimeri o loo i ai se fuaiupu faapena (tagai i le "O se Aiga Fiafia," *Tusipepe a Tamaiti*, 198).

Na matou lagonaina i le taimi o le afiafi faaleaiga le alofa o le Faaola mo i matou ma le alofa o le tasi i le isi.

Ou te faafetai mo le poloaiga musuia ia faia afiafi faaleaiga. O le usitai i ai ua faamalosia ai i matou, ma saunia ai i matou e avea ma se aiga faavavau. ■

Kenia Duarte dos Santos, Pasila



O LE A LO'U TAU?

Saunia e Adam C. Olson

Mekasini a le Eklesia

Ina ua mavae le fa tausaga e aunoa ma se televise ma le isi ono tausaga o ola pea i seti televise tuufaasolo mai isi, na ma filifili loa ma lou toalua e faatau se TV fou. Ona o le tau, na ma faatusatusa ai ma le faaeteete ia fausaga, ituaiga, o vaega o i ai, ma tau a o lei faia mulimuli se faatauga. O le mea malie, na ou savali ese e le gata na ave le TV ae faapea foi ma se malamalamaga ttau i le fuafuaina o le tau-faaletagata.

O o tatou aafiaga ua aoaoina ai i tatou o lo tatou tau e fuaina e ala i le faatusatusaga—e faasaga i o tatou uso ma tuafafine, uo i le vasega, tupulaga, ma tagata e faigaluga faatasi. Ae, e ui o le fuafuaina o le tau e ala i le faatusatusaga e talafeagai pe a faatau se TV, ae i le olaga, o i tatou o TV.

O le faatusatusaina o i tatou i isi ina ia fuafua ai lo tatou tau e tutusa lava le talafeagai ma le tilotilo atu o le tasi TV i le isi i le faleoloa ma moomoo maimau pe ana o ia e 40 inisi (102 sm) nai lo le 27 (69 sm). E le talafeagai lena mea, aua “o ai ea so outou na te mafaia i lona popole ona faateleina le umi o lona olaga i le kupita e tasi” (Mataio 6:27) po o le tasi le inisi i le lautele o le lau? Na lapatai mai le Apostolo o Paulo o tagata “e fefuafuaai i latou ia te i latou, ma fefaaatusatusaai i latou ia te i latou, e le popoto i latou” (2 Korinto 10:12).

E tatau foi ona tatou faaleamanaiaina i latou e faia le faatusatusaga mo i tatou ma tau mai ia i tatou lo *latou* manatu i lo tatou tau. E ui lava e pulea e le faatauoloa le tau o se TV, ae e le mafai ona fuafuaina e ia lona taua.

O le ki lenei: O le tagata faatau e vaai i le tau, iloilo le oloa, ma filifili pe talafeagai lona tau. Ma i lenei olaga, e na o le tasi lava le Tagata Faatau o taunuuga.

*O le tagata
faatau e filifili
pe talafeagai le
tau o se aitema.*

O lo tatou Faaola, o Iesu Keriso, na iloilo-inia “le oloa”—o tatou, i le tuufaatasiga faapea ai ma tagata taitoatasi. Na Ia silafia le loloto o le amioleaga lea o le a fesoottai ma le aiga o tagata.¹ Na Ia malamalamama i le tau mataga, ma le le mafuatia o le a manaomia ona Ia totogiina, “o le mafatia lea na oo ai ia te [Ia] o le Atua lava lea, o le ua silisili i tagata uma, le gatete ona o le tiga, ma tafe toto ai i pu afu uma, ma mafatia ai i le tino atoa ma le agaga” (MF&F 19:18).

Ma le iloaina o mea uma, *na Ia filifili pea ou te agavaa mo le tau lea.*

E tusa lava po o lea le le atoatoa ou te manatu ou te maualalo ai i le faatusatusa i isi, e tusa lava po o le a le itiiti o lo'u taua i le vaai a isi, na lagona lava e Iesu ou te agavaa mo le tau o le a Ia totogia.


O le osofaia o lo tatou taua-faaletagata o se tasi lea o mailei poto ae matautia a Satani. E taua mo au le talitonu o le Alo o le Atua na maliu e le gata mo agasala a le lalolagi ae na Ia maliu foi mo *au* agasala. Afai e mafai e le fili ona taitai au e talitonu i se isi mea, o lo'u masalosalo e ono taofia ai au mai le saili atu i le togiola alofa tunoa a le Faaola ma toe foi atu ai i Lona afioaga.

Afai ua e masalosalo i lou taua, alu i le Tagata Faatau e maua mai ai le iloilogia e tasi lava lena e taulia o le oloa. “E mafai ona tatou tatalo ma le talitonuga e mafai ona tatou lagonaina le alofa o le Faaola mo i tatou,” na saunoa mai ai Peresitene Henry B. Eyring, Fesoasoani Muamua i le Au Peresitene Sili. “... Sa lava Lona alofa mo i tatou ... na Ia totogi ai le tau o a tatou agasala.”²

O le mauaina o le faatuatua i lena alofa e faatagaina ai le Togiola e suia o tatou olaga ma aveina atu Lana faatau i le aiga. ■

FAAMATALAGA

1. Tagai i le *Aoaoga a Peresitene o le Eklesia: Iosefa Samita* (2007), 139.)
2. Henry B. Eyring, “O se Tamaitiiti ma se Soo,” *Liahona*, Me 2003, 29.



**Ua Faamalolo e Iesu ia Tagata
Mamai ma Faamanua Tamaiti**

3 Nifae 17

O lenei tausaga o le tele o lomiga o le *Liahona* o loo i ai se seti o faatusa o tagata o loo i mau o le Tusi a Mamona. Ina ia faamaloina ma faigofie ona faaaoga, oti ata ma faakelu pe faapipii foi i se pepa malo, tamai taga pepa, po o ni fasi laau. Ia teu seti taitasi i se teutusi po o se ato, faatasi ma le faailoga e tau mai ai po o fea le mau e maua ai le tala e fetoui ma faatusa o tagata.



*O loo saunia e le uelefea ma galuega faatino agaalofa,
nofoaga autu mo galuega, ofisa o misiona, nofoaga autu
mo talafaasolopito o aiga, malumalu, nofoaga autu mo
tagata asiasi, ma le anoanoai o isi nofoaga, ia ni avanoa
mo auaunaga a faifeau faamisiona matutua. Ma e
mafai foi ona faamautinoa atu i le au matutua o lo latou
valaauga e sau mai le Alii, e ala mai i Lana perofeta.
E silafia e le Alii le avanoa sao mo faifeautalai taitasi o
loo nauau e auauna atu. Tagai i “Faifeau Faamisiona
Matutua: O Le Tali Atu i le Valaaau a le Perofeta,” itulau 20.*